

POLIS RIPOT

MOSBI, NeseNel Kapital:

Stat long las wik Fraide Novemba 8 taim tambu (kefiu) i stat long Mosbi na ol arapela taun long kantri we i gat bikpela hevi bilong lo na oda i stap long en, i gat ripot olsem level bilong ol trabel i kamap long kantri i go daun tru.

Polis i holim pasim 120 pipel long brukim ol kefiu lo we i tambuim ol man long wokabaut raun namel long 9 kilok nait na 5 kilok moning olgeta de. Wankain namba em ol polis i givim tok luakaut long ol na larim ol i go. Dispela em long ol provins we kefiu i stap long em nau.

I kam inap nau, samting olsem 500 kefiu pepa we i oraitim ol man long wok leit na yusim ol dispela pepa long go pas long ol polis rotblok em polis opis we i lukautim dispela wok i givim aut pinis. Moa pipel i wet yet long aplikesen bilong ol long kisim ol kefiu pepa pas.

Asisten polis komisina Philip Taku i tok ol polis i wok long kisim ol infomesen long wok bilong ol raskel na ol lain husat i ranawe long haus kalabus. Bihainim dispela, ol polis long Mosbi na Lae long wiken i bin go insait long ol ples na hclim pasim sampela man we ol i gat bilip olsem ol i mekim ol stil pasin na pasin bilong kilim dai narapela man.

Polis i bin painim wanpela hai pawa semi otometik raifel, pistol, gan ol i wokim long ples, ol katres samting, na ol ka we ol stil lain i stilim long taim ol polis i go insait long ol sampela ples we i gat trabel long en.

Mista Taku i bin tok stat long kefiu i bin stat faivpela de i go pinis, i nogat ripot long kilim dai narapela man i kamap. I bin gat wanpela keis long bagarapim meri i kamap long Mosbi na namel long 50-60 pipel we polis i holim pasim na sasim ol long brukim ol kefiu lo.

MOSBI, NCD:

Polis long Mande nait i bin holim pasim na putim long Boroko sel haus tripela sekyuriti gad wokman bilong Alert sekyuriti Sevis bikos ol i brukim kefiu lo.

Polis i autim nem bilong tripela long Tarzi Sevese na Max Akis bilong Galp provins na Stanley Lagam bilong Nu Ailan provins. Polis i bin holim pasim tripela sekyuriti man ya long Badili polis rotblok taim ol i no soim ol kefiu pepa pas bilong ol.

Konstobol Joe Buana bilong Badili polis stesen i bin holim pasim tripela na em i tok bekim we ol i bin givim em long ol i wok long go pikim ol wanwok bilong ol.

Konstobel Buana i tok em i bin ringim supavaisa bilong tripela man na em bin kam na kism dispela ka we ol i wok long ron long en.

Supavaisa i tok em bin tokim tripela man ya long noken lusim wokples bihain long kefiu i stat bikos ol no gat pepa long dispela, Konstobol Buana i bin tok.

Long ol arapela senta, polis long Kokopo i amamas long ol kefiu program na ol i wok long abrusim wokabaut bihan long kefiu taim i stat long 9 kilok nait.

Polis long Is Nu Briten i bin holim pasim tasol wanpela man long Mande nait long brukim kefiu.

Long Manus polis i no bin holim pasim wanpela man long brukim kefiu tasol ol i go hetim yet na was kefiu long provins.

Kot painim Avini asua long K100,000

....em bai apil long Suprim Kot

MEMBA bilong Finsafen Yaip Avini bai apil i go long Suprim Kot bihain long NeseNel Kot i painim em i asua long paulim K100,000.

NeseNel Kot long dispela wik i painim Mista Avini na Filipino man Nonoy Acosta asua long paulim ol dispela mani na i laik holim tupela long sel inap Fonde (tude). Tasol loya bilong tupela Greg Sheppard i salim pepa bilong beil long tupela na tupela i stap ausait. Bikos loya i laik wokim aplikesen bilong dispela kot bilong tupela i go long Suprim Kot egensim dispela disisen bilong NeseNel Kot.

NeseNel Kot aninit long Jas Moses Jalina i sasim tupela aninit long sas bilong paulim mani (misappropriation).

Insait long 12-pela pes jasmen bilong Jas Jalina, em i tok Mista Avini i bin raitim pas i go long Morobe Edministreta Aine Sengero long Februari 10 1993. Em i askim long kisim mani aninit long Rurel Trensport Developmen Program

YAKAM KELO i raitim

(RTDP) bilong ol projek insait long Finsafen Open elektoret. Haponondong i go long Makini rot na Merikeo i go long Zafino rot projek tu i stap long dispela askim bilong em.

Ripot i tok Mista Avini i bin pulapim pepa (fom) bilong Dipatmen bilong Trensport Rural Trensport Developmen Program Skop bilong Woks long Ogas 23, 1993 na salim i go long dipatmen bilong Trensport long givim tok orait long en. em i bin kisim tok orait.

Ripot bilong Jas i tok em i raitim pas i go gen long andaseketeri bilong Dipatmen bilong Fainens, Titus Philemon long Ogas 26, 1993 long kisim tenda bilong K100,000 bilong baim i go long A&Z Invesmen Pty Ltd (kampani) we Mista

Acosta i menesing dairekta long en.

Ripot bilong Jas i tok long pastaim Mista Avini i bin laik givim dispela mani i go long narapela kampani ol i kolim First Morobe Holdings, tasolbihain em senisim na salim dispela mani i go long A&Z Invesmen. Tasol em i no givim wanpela toktok long wanem as em i senisim dispela kontrak long narapela kampani.

Anda-seketeri bilong Fainens Titus Philemon i oraitim tasol na givim mani ya i go long A&Z Invesmen long Septemba 1, 1993. (K100,000). Long Novemba 15, 1993 kampani i kisim sek (sek namba 251489).

Jastis Jalina i tok em i klia long ol bekim bilong Mista Avini long askim namba 30 na 31 we em i tok em i kisim sek mani ya long han bilong em na i go givim Jackson Zozingao. (Zozingao em siaman bilong

A&Z Invesmen kampani), Jastis Jalina i tok.

Ripot i tok long Novemba 16, dispela K100,000 sek mani i go insait long pasbuk bilong A&Z Invesmen kampani. Na long Novemba 7 1994, wanpela krismas bihain, dispela K100,000 we gavman i givim long baim greda na buldosa bilong wokim rot long Haponondong i go long Makini na Merikeo i go moa long Zafino long Finsafen distrik i nogat long pasbuk bilong kampani ya. Mani i stap long pasbuk em K25.95 tasol wanpela krismas bihain, Jas Jalina i tok.

Bihain long NeseNel Kot i wokim disisen bilong em, loya Greg Sheppard i askim jas long givim isi sas long tupela bikos long hatwok bilong tupela insait long pablik sevis, tupela i nogat rekot nogut long bipo na tu skelim famili bilong tupela tu.

Manam maunten paia kamapim pret

MANAM ailan long Madang provins i stap long birua bilong volkenu long Tunde dispela wik.

Manam volkenu i kamapim pret long ol manmeri long hap taim maunten i pairap na tro-moi long ston na das long ailan long Tunde nait.

Ripot i kam long Madang long dispela wik olsem birua bilong volkenu i bin go bikpela mak ol i kolim Stets 3 long Tunde nait na bihain kol kliklik gen long Stets 2 mak.

Long Trinde moning (aste) mak bilong volkenu i bin go antap gen long Stets 3 mak inap aste long apinun em i go daun long level 2.

Long hap pas 8 long Tunde nait, dispela guria bilong vokenu i bin kamap long ol arapela hap olsem Bogia na Not Kos eria we ol

pipel i pilim. Ripot i kam long opis bilong Madang rijenol memba Peter Barter i tok.

Long Tunde nait inap aste, olgeta wokman bilong Emejensi sevis na polis lain i bin stap redi long Manam long rausim ol manmeri sapos volkenu ya i go bikpela. Bikpela sip bilong memba yet, Melanesian Discoverer tu i go sanap redi long rausim ol manmeri sapos hevi ya i go bikpela, ripot i tok.

Ripot i tok ol pipel long Manam i kisim tok-save long stap redi tasol long tekov sapos samting ya i go bikpela.

Ol wokman bilong NeseNel na Provinsal Disasta lain i bin go insait long Manam long Tunde nait na wet klostu long sekim ol hevi ya. Ol i no mekim wanpela ripot yet bikos ol bai wet tasol long

lukim hevi ya bai i go bikpela olsem wanem.

Long dispela taim yet nogat man inap luksave o tokaut long mak bilong dispela birua we volkenu inap kamapim. I gat sampela saveman bilong glasim volkenu long Rabaul i go pinis long Manam long Trinde aste. Tasol long rot bilong kisim stori long ol i hat. Tasol ol manmeri long Manam i kisim toksave long redi nau long kirap lusim ples sapos samting ya i go bikpela na wara bilong volkenu i stat long bruk kam daun.

Rejinol Dairekta bilong NeseNel Disasta na Emejensi Sevis (NDES) Leith Anderson bai ol lain bilong em i kisim toksave pinis long dispela na ol i kisim tok-tok long stat redim ol plen bilong kisim ol pipel i go aut Manam ailan sapos birua bilong Manam volkenu i go bikpela.

Baim K400,000 kompensesen, rausim Wabeg pipel long siti

i kam long pes 1

ol i givim gavman 14-pela de (tupela wik) long lukim olsem tupela askim bilong ol i mas karim kaikai. Ol i tok sapos gavman i no mekim wanpela samting, ol bai lukluk long kamapim sampela samting. Petisen i no tok klia long wanem samting ol bai kamapim.

Komanda bilong NeseNel Kapitel Distrik na Sentral provins, Asisten Komisina Philip Taku i no mekim wanpela toktok bihainim dispela petisen bilong ol.

Long makim gavman, Mista Barter i tok olsem gavman i gat wankain belsori we ol famili bilong 4-pela yangpela boi i gat long nau yet. Na i wok long traim long daunim hevi bilong lo na oda insait long siti na tu long ol arapela taun insait long kantri.

Long sait bilong askim bilong rausim ol Wabeg pipel insait long siti, Mista Barter i tokim ol pipel bilong Gerehu olsem Papua Niugini em i

wanpela kantri. Dispela i min olsem, em i tok, gavman i no inap brukim ol pipel bilong kantri, wankain olsem hevi nau i wok long go het yet long Bogenvil.

Mista Barter i tokim ol pipel bilong Gerehu olsem petisen bilong ol, em wantaim Minista Tohian bai givim i go long Praim Minista Sir Julius Chan. Na wanem disisen gavman i kamap wantaim, gavman bai tokaut long dispela disisen.

Ol arapela samting i stap long petisen bilong ol pipel bilong Gerehu komyuniti em: Gavman i mas stopim olgeta blakmaket bilong salim bia, smok na buai insait long siti, rausim olgeta takabokis stua insait long siti, olgeta sekyuriti kampani i mas i gat gutpela trening program long trenim ol wokman bilong ol na stretim ol PMV bas sevis insait long siti.

• Lukim arapela stori long pes 8 na ol poto long pes 11.

Gavman i no inap rausim fridom bilong media- Micah

SIAMAN bilong KonstituseneR Rivi Komisin (CRC) Ben Micah i tokaut long dispela wik olsem CRC i no inap rausim pawa bilong ol pipel long i gat fridom bilong toktok na autim tingting long niuspepa na redio.

Mista Micah i mekim dispela toktok long strongim wok bilong CRC we em i pusim pinis bilong strongim lo antap long wok bilong media (nius).

Mista Micah i tokim ol niusmanmeri long dispela wik olsem gavman na grup bilong em, CRC i nogat tingting long daunim o haitim fridom bilong raitim nius o kisim nius ripot. Tasol em (gavman) i laik strongim lo bilong dispela wok bilong raitim na kisim nius.

Em i tok bikpela samting ol i laik mekim senis long en em long ol niusmanmeri i mas kisim sas tu long kot long sampela kain stori ol i no raitim krangi we i bagarapim nem bilong arapela long pablik.

Mista Micah i mekim ol dispela toktok tu long bekim bikpela salens toktok bilong bos bilong Ombudsmen Komisina Simon Pentanu, long Sarere las wik insait long bung bilong PNG Journalism Association (PNGJA).

Mista Pentanu i tok wanem as tru na gavman i laik pusim dispela bil na mekim i kamap lo long wok bilong raitim na ritim nius (media). Bikos dispela em i yumen rait o fridom bilong olgeta manmeri long dispela kantri long i mas gat dispela save long wanem samting i kamap long kantri, lida na ol yet. Na dispela em i rot tru bilong ol long kisim save long ol kain senis. Olsem na gavman i no ken pusim lo i go insait long kain bikpela fridom bilong ol pipel olsem, Mista Pentanu i tok.

Tasol Mista Micah husat em memba bilong Kavieng Open i bekim tok olsem Mista Pentanu i mekim kain toktok olsem em i no gat save long wanem samting i stap insait long dispela bil pepa we CRC i laik pusim i go long palamen.

Mista Micah i tok pasin bos bilong Ombudsmen Komisina i toktok tu i soim olsem em i no Komisina. "Em i no tokaut long wanem tingting o helpim emi ken givim long dispela media bil. Na em i paia tasol na dispela i no gutpela tumas long kain man i gat nem olsem em, Mista Micah i tok.

Mista Micah i tok toktok bilong Mista Pentanu i no tokaut long wanem eria bilong dispela bil i no stret long lukluk bilong em. Em i tok em (CRC) i no save kisim wanpela bekim ripot o pepa i kam long Ombudsmen Komisina taim ol i bin redim na wok long stretim dispela bil.

Long toktok bilong givim laisens, Mista Micah i tok ol bai kamapim wanpela bodi ol i kolim Komyunikesen na Infomesen divisien. Wok bilong em long sekim na glasim ol wok bilong niusmanmeri na wanem samting ol i ropot long en. Na em bai go pas tu long givim ol laisens long ol wok bilong nius, media grup.

Mista Micah i tok dispela laisens i wankain olsem ol papa bilong pmv i baim laisens bilong ronim pmv bisnis bilong ol. Sapos ol i brukim lo, gavman i rausim laisens bilong ol.

WANTOK

All departments. Phone: 325 2500 - Fax: 325 2579 P.O. Box 1982, Boroko, NCD, Papua New Guinea

Published Weekly, Thursday, for Word Publishing Company Pty. Ltd.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola for Word Publishing Co. Pty Ltd.

Acting General Manager and Group Editor in Chief: Anna Solomon

Advertising Manager: James DeLisle

Editor of Wantok: Leo Wafwa

Advertising Deadlines: Display Bookings and Camera ready copy: Tuesday midday. Classified Advertising: Wednesday 2pm.

Papers distributed by air throughout PNG

Available by airmail subscription within Papua New Guinea and overseas.

Australia and New Zealand Representatives: Tonkin Media Pty. Ltd. P.O. Box 101, Avoca Beach, NSW, 2251 Australia Sydney, James Tonkin, (043) 851746, Melbourne, Glen Smith, (03) 8072311

Word Publishing Company Pty Ltd is owned by the four major churches of Papua New Guinea: Catholic 55%, Lutheran 25%, Anglican 10% and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms of acceptance are available at Word Publishing Company Pty. Ltd., and are set out in full on the reverse side of its official Display Advertising Booking Form.

WANTOK

NIUSPEPA BILONG OL PAPUA NIUGINI STRET

Kolim stret ples o eria

Famili bilong 4-pela yangpela boi husat i lusim laip bilong ol long wanpela birua long Dogura nambi ausait tasol long Mosbi siti i askim nau lain husat i kilim ol long baim K400,000 kompensesen-K100,000 long wanwan bilong ol. Long wankain taim, ol i askim gavman long rausim ol Wabeg pipel insait long siti i go bek long ples bilong ol.

Askim bilong kompensesen i orait. Bikos kompensesen i no nupela samting. Tasol askim bilong gavman long rausim ol wantok Wabeg long Mosbi siti i no gutpela tumas.

Luksave i mas stap olsem i no olgeta Wabeg pipel i asua. Nogat. Wanpela liklik lain grup o pipel tasol. Dispela lain i bagarapim gutnem bilong ol pipel bilong Wabeg. Bikipela lain o grup em ol gutpela lain.

Mipela i mas luksave long wanpela samting we mipela i save asua. Mipela i save asua long tok olsem ol Wabeg o ol Sepik o ol Tolai o ol Kerema. Mipela i mas kolim stret liklik ples o eria bilong lain husat i asua. Mipela i noken tok "ol Wabeg." Bikos i no olgeta Wabeg i asua o i kamapim dispela birua we 4-pela yangpela boi ya i lusim laip bilong ol.

Nau long hevi bilong 4-pela yangpela boi i bin lusim laip bilong ol, sapos mipela i tok "ol Wabeg", dispela i ken kamapim arapela hevi. Eksampel-ol gutpela lain Wabeg pipel bai holim protes mas na tok olsem i no olgeta pipel bilong Wabeg i asua. Ol bai gat belhevi ken long mipela i sutim o poinim pinga long olgeta Wabeg.

Gutpela samting long mekim em long putim olgeta hevi na wari bilong mipela i go long han bilong lo na God. Na God yet bai givim gutpela tingting long ol lain i lukautim lo long kamapim jastis long lain i asua.

Siwai eria kamapim gutpela toktok

GUTPELA toktok i wok long kamapim long Siwai eria insait long Saut Wes Bogenvil wantaim ol lidaman, pis komiti lain, ol sios woka bilong ol BRA na resistens grup long lusim ol samting bilong pait wantaim.

Long ol ripot i kam long Bogenvil, ol toktok i wok long go hat nau long ol BRA long Tonu na tu Mihero sait i mas lusim ol samting bilong pait na stap insait long wok bilong stretim tingting, kamapim bel isi na sekan na gutpela sindaun i ken kamap bek gen long ol famili, komyuniti na pipel long provins.

Long las wik Mande Novemba, ol Sipako resistens grup long Konga eria i bin lusim ol samting bilong pait na lusim long han bilong ol atoriti long Saut Wes Interim opis long Konga yet. Tasol bikos long pasin we ol Buin na Muka/Ruhwaku BRA i mekim long go insait long Konga long neks de, ol

sekyuriti fos i bin tokim ol Sipako resistens long holim bek ol gan long sotpela taim tasol inap long ol hevi long hap i go daun gen. Ol i mekim dispela long lukautim ol pipel, ol sekyuriti fos lain i bin tok.

Ol Sipako resistens lain em laspela resistens grup long Siwai eria husat i save holim gan samting bihain long ol arapela resistens grup long distrik i bin lusim bilong ol long tupela yia i go pinis. Ol Sipako resistens lain em ol i save wok wantaim ol sekyuriti fos memba husat i stap na wok lukautim Siwai distrik.

Samting we ol Sipako resistens grup i bin mekim long lusim ol samting bilong pait em i wanpela gutpela samting we ol manmeri na pikinini bilong Siwai i bin amamas long lukim. Bikos ol i tok nau, sindaun bai i kamap gut bikos nogat man bai i bagarapim narapela long wanem gan.

em i as long sindaun nogut na kilim man.

Tasol narapela de tasol long Tunde, Novemba 5, ol raskol grup insait long BRA bilong Laguai insait long Buin distrik wantaim ol wanlain bilong ol long Muka na Ruhwaku eria long Siwai i bin bung wantaim na go insait long Konga Saut wes Interim Atoriti (SWIA) opis long biksan. Long hap ol i bin kisim redio we SWIA opis i save yusim long wok bilong salim tok i go na i kam wantaim hetopis long Buka na tu long ol arapela hap bilong kantri.

Ol bin kisim tu ol taiprait na ol arapela steseneri we ol opis wok manmeri i save yusim. Long Tonu Hai Skul we i stap klostu long SWIA opis, dispela BRA raskol grup i kisim ol kaikai samting na ranawe wantaim.

Bikos nogat man i holim gan, olge-

ta i stap isi lukluk tasol taim ol BRA i wokim ol dispela samting.

Long ol ripot Wantok i kisim long Bogenvil, ol dispela BRA i bin kism ol dispela masin na ol steseneri bilong SWIA bilong kirapim wanpela opis bilong ol long Mukakuru eria namel long Buin na Siwai.

Ripot i tok BRA militeri komanda Sam Kawona i bin givim tok orait long kirapim dispela opis long las mun.

Ripot i tok dispela wankain BRA raskol grup, Laguai, Muka na Ruhwaku i bin go insait long Hari eria long Siwai long bagarapim sindaun long hap na ol pait i bin kamap namel long ol na ol resistens grup bilong Hari eria yet.

Long ol ripot, tripela BRA i bin kisim bagarap long wanpela pait namel long tupela grup ya. Wantok i no bin kisim ripot long bagarap we i

Elektorel Komsin kauntim Bogenvil pipel

VERONICA HATUTASI i raitim

HEVI long mani na tu ol trabel insait long bikailan Bogenvil i holim bek wok bilong kauntim, namba bilong ol pipel insait long Not Solomons provins.

Long dispela wok, ol opisa i wok long kisim nem bilong ol manmeri na rekotim long buk we ol i kolim long Komon Rol buk. Husat man o meri nem bilong em ino stap insait long dispela buk bai i no inap long vot long nesenel ileksen bilong neks yia Jun 1997.

Ol i bin givim olgeta 19 provins long kantri inap long mun Septemba bilong dispela yia long pinisim ol dispela wok. Tasol pait na taim nogut i bagarapim Bogenvil na olsem Ilketrel Komsin i bin surukim taim bilong ol long mun Disemba dispela yia long pinisim dispela wok.

Kantri i karimaut dispela program bilong kisim nem bilong ol manmeri husat inap long givim vot bilong ol i go long ol man ol i laikim long makim maus bilong ol pipel long nesenel palamen.

Provinsal Ritening opisa o man husat i go pas long wok bilong karimaut ileksen long Bogenvil Mathias Pihei i tok wok bilong kauntim long Buka distrik i bin stat long aste Trinde Novemba na ol i ting em bai pinis bipo long pinis bilong mun Disemba. Long Atols distrik we i kamapim Nissan, Katerets, Motlok, Tasman na Nuguria Ailan, wok long dispela samting i bin pinis long las mun yet.

Mista Pihei i tok wok long Sentrel

na Saut Bogenvil i no stat yet bikos opis bilong em i wetim yet mani bilong mekim wok i kam long Ilketrel Komsin hetkota opis long Mosbi. Dispela mani em bilong baim helikopta sata bilong karim ol opisa long lusim na kism ol bek gen long taim ol i pinisim ol wok long bik ailan Bogenvil.

Em i tok provins i laikim K12,000 bilong haiarim tasol helikopta long karimaut gut dispela wok long Bogenvil.

Opis bilong em i bin basetim K54,000 na givim i go long hetopis bilong ol long Ilketrel Komsin long Waigani.

I kam inap nau, provins i kisim pinis K18,000 long karimaut ol wok bilong baim ol samting bilong wok olsem ol pepa, pen na ol arapela samting olsem bilong yusim, trenim ol opisa, satarim helikopta long mekim wok, ples bilong slip na ol kaikai samting.

Mista Pihei i tok i kam inap nau, opis bilong em i amamas bikos hetkota i save salim hap mani i go long Bogenvil we ol i skelim long dispela wok.

Em i tok kautim bilong olgeta manmeri na pikinini long Bogenvil nau i stap olsem 156,000. Long dispela mak, 60,000 inap long vot. Dispela mak i kamapim ol bikipela manmeri husat inap long vot insait long eria we gavman, na BRA wantaim i lukautim, Mista pihei i tok.

Mista Pihei i bin tok mak olsem 156,000 pipel em Viles Sevis i wok long yusim nau taim em i karimaut plening na tu givimaut ol sevis i go long ol pipel long Bogenvil.

Sios wok long Siwai eria bringim senis

WOK bilong ol sios grup i kamapim sampela gutpela senis insait long ol hap bilong Siwai eria long Bogenvil ailan.

Wanpela long ol senis em long ol BRA na resistens bilong eria i laik lusim ol samting bilong pait na stap insait long program bilong stretim ples, kamapim bel isi na sekan pasin long ol pipel bilong Bogenvil i ken stap gut gen long ol ples bilong ol.

Long dispela taim, ol toktok namel long ol grup long dispela samting i wok long go het wantaim ol siefs, sios, ol meri na komyuniti grup i go pas long en.

Ripot i kam long Bogenvil i tok wok i stap nau long han bilong ol wan wan konstituensi o eria bilong lukautim wok bilong stretim ples, kamapim pasin wanbel na program bilong gutpela sindaun long eria bilong ol. Dispela wok i wok long kamap gut nau namel long ol pipel na tupela lain grup ya.

Korikunu em i wanpela eria long Siwai distrik we program bilong stretim ples na wok i go het strong nau long sait bilong lotu na bung wantaim long felosip.

Katolik Sios long eria i wok strong long dispela program na nau ol grup i statim foapela ministri we ol i wok aninit long ol. Em long Rihabilitesen, Hiling, Kaunseling na Musik ministri.

Ripot i tok i gat gutpela wokbung nau i kmap na go het namel long ol siefs, ol meri, sios na yut groups long eria.

Wok i kamap long Korikunu eria join wantaim ol wok ol i mekim long narapela eria long distrik.

Wanpela samting we i bin strongim go het bilong dispela senis em intasios kruset we i bin kamap long Siwai long dispela yia. Tim Hatah i bin go pas long dispela kruset na planti pipel i tanim bel bihanim kruset ya.

Bikos long dispela nau long Siwai, ol toktok na program bilong kamapim gutpela sindaun long ples na long olgeta hap bilong Bogenvil i stap long top lista.

WANTOK

NIUSPEPA BILONG OL PNG STRET

P O Box 1982 BOROKO
Telepon namba: 3252500
Feks namba: 3252579

PE BILONG WANPELA VIA 52 NIUSPEPA

PLES	AIR
Mosbi	K30.00
Arapela PNG eria	K60.00
Australia na Nu Silan	K92.00
Esia pasifik na Japan	K123.00
Amerika na Yurop	K180.00



Dispela wik long palamen

Oposisen pusim lo na oda hevi long gavman

LIDA bilong Oposisen Roy Yaki i tokaut long palamen olsem gavman i as bilong olgeta dai, stil na raskel pasin insait long kantri.

Mista Yaki i mekim dispela tok-tok bihain long planti ripot na tok-tok long hevi bilong lo na oda inait long kantri we planti manmeri i wok long dai, ol raskel i wok long stil, ol man i bagarapim ol meri na planti arapela raskel pasin moa.

Em i askim Praim Minista Sir Julius Chan long wanem plen bilong 1996 Yia bilong Lo Enfosmen we i no bin wok gut na hevi bilong lo na oda i go antap moa. Praim Minista i bin tokaut long dispela yia olsem em i yia bilong strongim lo.

Em i askim Praim Minista long tokaut na yesa olsem gavman bilong em i as bilong hevi bilong lo na oda i kamap bikpela insait long kantri.

Mista Yaki i tok planti liklik man bilong Papua Niugini i lusim wok bilong ol na stap nating bikos planti bisnis kampani i wok long kam insait long kantri na stopim ol PNG manmeri yet long kamapim na kirapim bisnis bilong ol. Taim ol dispela ovasis bisnis i kam, ol i kisim ol wantok bilong ol yet i kam na mekim ol wok we ol PNG manmeri yet inap long mekim na dispela i pusim ol manmeri aut long wok bilong ol, em i tok.

Em i askim Praim Minista long tokaut long wanem kain plen tru bilong em long tokaut long yia bilong Lo Enfosmen tasol hevi bilong lo na oda i wok long go antap yet.

Lida bilong Oposisen i sutim tok long gavman tu olsem planti bikpela hevi long ol projek na wok insait long kantri em gav-



• Sir Julius Chan.

man yet i kamapim. Em i kolim ol bikpela projek we i gat toktok long ol olsem, bikpela POSF haus long Australia, wara projek insait long Mosbi na arapela moa. Ol dispela i kamapim hevi bilong lo na oda long go bikpela, Mista Yaki i tok.

Praim Minista Sir Julius Chan i bekim olsem i tru olsem i gat hevi long lo na oda insait long kantri.

"Yia bilong Lo Enfosmen i wok gut. Bikos mipela i gat rekot olsem gutpela wok na senis i wok long kamap insait long eria bilong polis fos na long wok bilong karimaut lo na oda."

Sir Julius Chan i tok Yia bilong Lo Enfosmen em ol i lukluk long stretim planti samting insait long polis fos na wok bilong karimaut

lo na oda. Na i gat ol gutpela senis i kamap long ol dispela eria.

Praim Minista i tok nau kantri i gat planti manmeri abrusim mak bilong bipo. Olsem na hevi bilong lo na oda bai i go wantaim dispela senis long namba bilong pipel we i wok long go antap. Na dispela tu em wanpela bikpela eria polis i skelim insait long wok bilong ol tu, em i tok.

Sir Julius Chan i tok long tok-tok bilong ol ovasis lain i wok long kam insait long kantri na tekova long ol bisnis wok we PNG manmeri yet inap ronim na tu rausim wok bilong ol PNG manmeri, em bai toktok wantaim Minista i go pas long dispela eria. Dispela em eria bilong Foren Afeas Dipatmen.

Sekyuriti stopim pablik long palamen

OL sekyuriti gad long palamen haus long Tride aste i bin tait tru long larim ol man nating i go insait long banis bilong nesehel palamen. Ol sekyuriti i bin stopim olgeta manmeri ausait long geit na askim ol gut tru long wanem as ol i laik go long palamen o husat memba ol i laik lukim.

Long Waigani opis bilong Lens na Dipatmen bilong Praim Minista long Morauta Haus tu, ol sekyuriti i no larim ol man nating i go insait. Wanpela sekyuriti gad i tokim wanpela wokman bilong mipela olsem opis bilong Praim Minista i tambuim ol manmeri long i no ken go long opis bilong em. Opis bilong Praim Minista tu i stap wantaim opis bilong Lens Dipatmen.

Dispela tait sekyuriti i bin kamap long Trinde aste bikos ol manmeri long Gerehu i laik holim wokabaut mas i go long haus palamen long Trinde aste. Dispela mas i bilong autim wari bilong ol long dai bilong foapela yangpela manki ol sampela lain sekyuriti gad i bin kilim ol long las mun long Mosbi.

Insait long mas tu, ol i laik putim aut

arapela wari bilong ol long hevi bilong lo na oda we i pretim laip na sindaun bilong ol manmeri insait long Mosbi siti.

Dispela wokbaut i go long haus palamen i no bin kamap bikos ol polis i kisim oda long stopim ol long Gerehu.

Long raun bilong mipela i go long haus palamen aste, i no gat man tru long eria bilong palamen haus. Bikos sekyuriti i pasim bikpela geit na olgeta manmeri i stap ausait.

Insait long palamen samba tu, i no gat planti manmeri long pablik galari we ol pablik i save go sindaun long harim ol toktok bilong ol memba long palamen.

Polis i bin rausim tu ol sampela lain husat i wokabaut long grup na i laik go long haus palamen.

Dispela wik na tupela moa wik bihain, em taim bilong palamen i bung. Na olgeta manmeri long Mosbi na sampela i kam long ples i gat wok o hevi long go lukim ol memba bilong ol long palamen. Tasol dispela hevi bai bagarapim laik na tingting bilong ol dispela lain.

Bus pipel kisim K100,000 long Haiveta

KAMEA pipel insait long Malalawa, Galp provins i kisim K100,000 long rijenol lida bilong ol Chris Haiveta long dispela wik long Mosbi. Dispela K100,000 i bilong helpim na strongim asples bisnis, Kamea Developmen Kopresen (KDC) long mekim ol wok developmen insait long eria bilong ol.

Ol pipel bilong Kamea i save stap insait tru long maunten na bus bilong Malalawa na Kaintiba eria we i nogat rot bilong ka. Ol i save wet tasol long wanem taim balus i kam, bai ol i ken kalap long en o salim ol kaikai na kopi bilong ol.

Dispela wik ol i bin kamap long Mosbi palamen haus long lukim rijenol memba na Minista bilong Fainens na tu lida bilong Pangu Pati Chris Haiveta. Mista Haiveta em namba tu Praim Minista tu.

Ol pipel bilong Kamea i bin kamapim KDC kampani we em i sut long kamapim ol wok developmen insait long eria bilong ol.

Mausman bilong KDC Daniel Itu i tokaut olsem ol i lukim hevi ol pipel bilong ol i gat long ples. Ol i gat bek kopi bilong salim tasol i nogat rot bilong kisim ol i go long Lae o Mosbi long salim. Ol i save wetim balus tasol. Taim balus i no kamap, ol i slip wanpela wik long ples balus inap balus i kam na ol i putim kopi bilong ol antap long balus.

Mista Itu i tok ol pipel bilong em i gat ol planti samting bilong gaden na long bus bilong salim na kisim mani. Tasol ol i gat gutpela sevis bilong gavman long helpim ol i kisim ol samting bilong ol i go long maket na salim.

Em i tok long dispela as, ol i statim dispela Kamea Developmen Kopresen (KDC) kampani bilong lukluk insait long dispela hevi bilong ol.

Mista Itu i tok bikpela samting ol i laik kamapim pastaim em trenspot bilong karim ol kopi na samting bilong ol i go salim long Mosbi o Kerema. Long dispela, ol i lukluk long baim wanpela balus bilong mekim dispela wok.

Em i tok taim sapos wok bilong KDC i ron gut na pulim moa mani long bihain, bai ol i ken go het long wokim rot bilong ol i go long Kerema bai ol ka i ken ron na ol i ken go olgeta long Mosbi long salim ol samting bilong ol.

Fainens Minista Chris Haiveta i tok em i gat bilip long dispela tingting na wok bilong ol Kamea pipel olsem na em i givim dispela K100,000. Em i skelim olsem dispela em wok bilong helpim ol pipel stret na tu i ken kamapim bisnis long ol manmeri long ol i ken helpim ol yet long bihain.

Mista Haiveta i tok em i gat ol mani bilong em long Elektorel Developmen Fan (EDF) i stap yet long givim aut long ol pipel bilong em. Em i no bin yusim ol yet bikos em i save go aut o mekim tumas wok bilong Fainens Ministri, go aut long ovasis long wok bilong Papua Niugini na mekim planti bikpela samting bilong kantri. Olsem na em i nogat taim long toktok na raun long ilektoret bilong em long lukim ol hevi ol pipel bilong em i gat.

Mista Haiveta i tok em i holim yet olgeta mani bilong ilektoret bilong em na bihain long palamen i pinis long dispela yia, em bai i go long ples na lukluk long ol eria na wok we em inap long skelim ol mani i go long ol.

Namba tu Praim Minista i tok em bai glasim na lukluk gut long wanem eria em bai givim mani long en. Ol eria we i gat gutpela helpim na sevis long ol pipel bai em i givim mani long wok bilong ol, em i tok.



wantaim YAKAM KELO

Sambre laikim telefon sevis long Nuku

MEMBA bilong Nuku Christopher Sambre i askim Minista bilong Komyunikesen Michael Egilio long sanapim 20 telefon lain long ilektoret bilong em long Nuku, Sandaun provins.

Mista Sambre i askim Mista Egilio long dispela wik insait long palamen kibung olsem ilektoret bilong em i gat tasol tupela telefon lain na dispela i no sevim gut ol pipel bilong em. Ol pipel bilong Nuku i laik ringim ol wantok bilong ol ausait long provins o long Mosbi long ol toktok na hevi bilong ol. Tasol ol i no gat telefon bilong ring.

Mista Sambre i toktok strong olsem Minista bilong Komyunikesen i mas givim oda long ol lain bilong em long Telikom long lukluk insait long dispela hevi bilong ol na stretim.

Memba bilong Nuku i mekim dispela toktok bihain long em i luksave olsem wanpela bus ples insait long senta bilong Manus provins i ken toktok long telefon i go long Mosbi. Na tu em i lainim olsem bai Telekom i mekim wankain wok olsem i go long Simbu provins, Milen Be na Galp provins we ol bai go sanapim telefon sistem insait long ol distrik na bus eria.

Tasol Minista bilong Komyunikesen Michael Egilio i tok Nuku em i olsem olgeta arapela ilektoret insait long kantri we ol tu bai kisim dispela sevis bihain.

Mista Egilio i tok Telikom i statim pinis dispela plen bilong bringim telefon sistem i go klostu long ol lain insait long rurel na bus ples.

Em i tok ol i makim Milen Be, Simbu na Galf provins long statim dispela plen. Ol i statim pinis long Manus na i op pinis. Olsem na lukluk nau em long ol pipel bai inap bosim na lukautim gut ol dispela sevis o nogat.

Minista i tok tu olsem wanpela hevi nau em long ol pipel i save oltaim kros long graun na askim long kompensesen we ol i brukim ol ripita stesin long Isten Hailans provins pinis.

Dispela em wanpela hevi we inap bagarapim dispela kain telefon sevis long i no ken go insait long ol pipel long ples, em i tok.

Tasol em i tok sapos tripela provins ya i wok gut long dispela plen bilong Telikom, bai ol i kisim i go moa long olgeta arapela provins tu. Olgeta provins bai kisim dispela sevis, em i tok.

Nesenel baset redi long Tunde

1997 nesenel baset, K1.5 bilien bilong Papua Niugini bai kamaut long Tunde neks wik. Minista bilong Fainens Chris Haiveta i tokaut long dispela wik.

Dispela 1997 nesenel baset inap kamaut long dispela wik. Tasol dipatmen bilong Fainens i senisim taim i go gen long neks wik Tunde.

Mista Haiveta i tokim ol niusmanmeri olsem i nogat wanpela samting i pasim baset long go aut. Na tu baset i redi pinis long kamaut long neks wik.

Mista Haiveta i mekim dispela toktok long bekim ol toktok olsem baset i no redi gut yet olsem na dipatmen i holim bek.

Mista Haiveta i tok dispela baset i redi pinis. Tasol ol i laikim bai olgeta savemen long olgeta dipatmen, privet sekta na pablik i lukim na skelim pastaim. Ol i mas autim tingting bilong ol long dispela baset pastaim long ol i baset ya i ken go long palamen long neks wik.

Mista Haiveta i tok em i no laik

hariapim dispela baset. Olgeta lain i mas gat sans long lukim baset ya na skelim na givim tingting bilong ol long en.

Em i tok sapos husat man o lain i lukim olsem i gat hevi long dispela baset, orait ol i ken go long em na autim tingting bilong ol we ol i ken mekim senis long ol hap bilong baset, em i tok.

Fainens Minista i tok dispela em las baset bilong dispela gavman (Chan/Haiveta) long 1996. Bikos neks yia, 1997 em taim bilong nesenel ileksen. Olsem na dispela wik em wik bilong skelim na toktok wantaim narapela na stretim baset ya long i go long palamen long neks wik Tunde.

Mista Haiveta i mekim dispela bihainim ol kain kain toktok we i bin kamap pinis long maus bilong ol lida long palamen long Septemba palamen taim bihainim wanpela mini baset gavman i bin kamapim.

Dispela mini baset, ol lida olsem Bernard Narokobi na

Oposisen lida Roy Yaki i mekim bin mekim toktok egensim olsem Praim Minista Sir Julius Chani laik yusim dispela baset long daunim nem bilong Pangu Pati na Chris Haiveta.

Long dispela taim Praim Minista i bin stap long ovasis na Chris Haiveta i bin ekting Praim Minista na i bin putim aut dispela mini baset. Bihain long mini baset i kamaut gen, Chris Haiveta i bin tekov gen long Amerika na i no stap long bekim ol askim bilong oposisen egensim baset ya.

Mista Narokobi i tromoi tok olsem Sir Julius Chan i laik mekim dispela long olgeta toktok egens o kros i mas go tasol long bagarapim nem bilong Pangu pati na lida bilong em.

Dispela mini baset, bin kamapim planti tok kros bikos long ol takis we gavman i apim i go antap long planti samting olsem pe bilong ol wokman, kampani takis, bensin na disel, poka masin na arapela samting tu.

Tasol Minista bilong Fainens Chris Haiveta i tok maski Praim Minista i stap long ovasis, ol i save toktok wantaim em long wanem samting ol i laik kamapim long baset ya. Dispela i min olsem Mista Haiveta yet i no mekim samting long laik bilong em olsem Ekting Praim Minista.

Neks wik bai palamen i putim aut 1997 nesenel baset na tu ol manmeri bai lukim tu bekim bilong Oposisen long wanem kain tingting na save bilong em, em i ting baset i mas kamapim.

Nupela Spesel Tektikel Fos bilong polis

MINISTA bilong polis Castan Maibawa i tokaut olsem Polis Dipatmen bai kamapim wanpela Spesel Tektikel Fos bilong polis yunit.

Mista Maibawa i tokaut long palamen long dispela wik olsem polis fos i kamap wantaim dispela plen na ol bai strongim long mekim em i kamap. Bai ol i yusim ol polis fos insait long Mobail Yunit long go pas long dispela spesel fos.

Mista Maibawa i tok long nau yet i gat olsem 16 Mobail fos i stap na ol bai yusim sampela bilong ol long dispela nupela plen.

Dispela plen i sut long ol polis fos bai i gat ol nupela ka bilong ron long en na tu helikopta bilong yusim insait long taun na long ples tu long mekim wok bilong lo na oda.

Mista Maibawa i mekim dispela toktok long bekim askim bilong

memba bilong Ambunti Drekiir Judah Akesim.

Mista Akesim i askim Minista bilong polis long kamapim wanpela strongpela lo we inap i stap olgeta taim long ol manmeri i bihainim.

Mista Akesim i tok nau gavman i kamapim dispela kefiu o taim tambu, ol raskel na man nogut i save na ol tu i go hait nabaut. Ol i go kisim malolo na wet long taim kefiu i pinis, bai ol i statim gen wok


bilong ol.

Mista Akesim i tok maski ol dispela raskel i wok long hait long nait, ol no stop long stil long de taim.

Olsem na polis fos i mas kamapim wanpela strongpela lo bilong olgeta manmeri i ken bihainim na dispela lo i mas stap olsem, em i tok.

Mista Maibawa i tok kefiu i bilong pasim olgeta manmeri long haus na bai polis i ken go het long

NEW AXION LEMON GREASE STRIPPER



**ISI WE LONG
KLINIM OL DIS
NA SOSPEN
BILONG YU!**

NCDC bod rausim Lawa Sekyuriti kontrak

BOD bilong Nesenel Kapitel Distrik Komisin las wik Sarere i holim miting na rausim kontrak bilong Lawa Sekyuriti Kampani insait long Mosbi siti.

Dispela disisen bilong bod bilong NCDC i bihainim wanpela birua i no longtaim i go pinis we 4-pela yangpela skul manki i lusim laip bilong ol. Na i gat luk-save i stap olsem sampela wokman bilong dispela sekyuriti kampani i stap insait tu long wanpela lain pipel husat i kilim dispela 4-pela yangpela sumatin long Dogura nambis ausait tasol long Mosbi siti.

Long dispela wik Mande taim Gavana bilong Nesenel Kapitel Distrik, Bill Skate i tokaut olsem Komisin i gat wok long lukautim ol pipel. Na i no laik ol pipel bai lukim Komisin olsem wanpela oganaisesen husat i wok long amamasim ol lain husat i gat nem nogut long kamapim kain ol

hevi na birua olsem.

Disisen bod bilong NCDC i kamapim long rausim kontrak bilong Lawa Sekyuriti Sevis i bihainim ol toktok i kam long ol pipel na ol bisnis haus insait long siti we ol i no amamas tumas.

"Dispela disisen bilong bod bilong Komisin i no bilong soim olsem kampani ya i wanpela kampani nogut. Disisen ya i bilong banisim nem bilong Komisin. Mi toktok pinis wantaim menesing dairekta bilong Lawa Sekyuriti Sevis Laipen Wallen na em i kisim dispela disisen wantaim wanbel na belisi," Gavana Skate i tok.

Gavana Skate i askim Mista Wallen wantaim woklain bilong em long helpim polis long sekap ol i wok long go het yet long karim aut long dispela birua we 4-pela yangpela skulmanki i lusim laip bilong ol.

Long kibung em i holim wan-

pela Mista Wallen, Mista Skate i givim tok tenkyu bilong em i go tu long ol sevis Lawa Sekyuriti Sevis i bin givim long Komisin.

Long wankain taim tu, NCDC bod i rausim tu kontrak bilong Aerato Sekyuriti Sevis husat i save lukautim ol maket insait long siti. Bikos NCDC bod i painim aut olsem sekyuriti kampani ya i no mekim gut wok bilong en long lukautim ol maket.

Mista Skate i tok bihainim singaut bilong ol pipel long lukautim na holim ol maket insait long siti i stap klin, Komisin i putim kamap sekyuriti long lukautim ol maket.

"Ol maket em ol ples we mipela i baim ol kaikai bilong mipela. Na Komisin i gat wok long lukim olsem ol maket i klin olsem na mipela i putim ol sekyuriti kampani," Gavana Skate i tok.

Redio Madang sot long mani na stop wok

REDIO Madang i bin pas long Mande nait long dispela wik na bai i stop olsem inap mani bilong ronim wok i kamap.

Dispela toksave i bin kamap long Tok Save program bilong Redio Madang long Sande na gen long Mande nait long dispela wik. Bikpela miting bilong ol wokmanmeri bilong Redio Madang i bin kamap na ol i tok-tok tu long dispela hevi long dispela wik.

Wanpela opisa insait long Madang redio stesin i tok ol i bin sot tru long mani bilong ranim operesen bilong redio stesin olsem na ol bai pasim wok long nau inap wanem taim mani i kam na ol bai statim gen wok.

Foapela wik i go pinis tu, ol wokman bilong PTC i bin go katim telefon waia bilong ol bikos long telefon bilong ol.

Wokman ya i tok long dispela wik, ol i bin kapsaitim las dram bilong bensin long ka long yusim raun long mekim wok. Na ol arapela wokman tu i stat long rausim mani long poket bilong ol long baim petrol na disil bilong ka long meki wok raun.

Bil bilong ol long telefon i kos olsem K2,000 na moa. Na tu Redio Madang i gat sampela dinau we i kos olsem K18,000. Dispela dinau i bilong PTC na Madang Plant & Transport Bod long sevis ol i bin kisim long ol long 1994 i kam inap nau, 1996.

Opisa ya i tok ol gat olsem 15 woka na ol i no inap stop wok. Ol bai wok yet long bungim nius na arapela program we i bikpela samting long ol pipel bilong Madang. Na ol bai salim i go long Mosbi long yusim NBC Karai Sevis long ritim aut nius bilong ol Madang pipel.

Maino Heduru amamasim 20 yia

MAINO Heduru Yut Senta long Erima insait long Nesenel Kapitel Distrik i bin amamasim 20 yia bilong en long ol Katolik Brigidine Sista i opim senta long 1976.

Long las wik Sarere Novemba 9, ol sumatin na tisa i bung na amamasim 20 yia bilong senta i stap laip yet. Ol i bin putim kamap ol tumbuna singsing na danis, salim ol henkraf, ol plawa, ol klos we ol sumatin yet i samapim, ol kaikai na ol samting we ol sumatin bilong wutwok klas i wokim na tu ol arapela samting.

Long nau i gat samting olsem 120 sumatin i skul long Maino Heduru Yut Senta na 11-pela tisa i skulim ol. Dispela 11-pela tisa, 4-pela em ol Brigidin Sista na ol arapela em ol PNG manmeri. Senta ya i save painim mani bilong em yet long ranim ol wok bilong en. Na ol rot we

VERONICA HATU-TASI i raitim

em i save kisim mani em salim ol samting we ol sumatin bilong senta yet i wokim olsem ol siot we ol sumatin i printim, ol klos we ol sumatin meri i samapim, ol samting we wutwok klas i save wokim ria ol arapela samting. Skul i save kisim helpim mani long ol famili na wanlain bilong ol Brigidine Sista long Victoria, Australia.

Long dispela yia, skul i bin sasim K100 olsem skul fi long wanwan sumatin. Ol sumatin i kam long ol kainkain PNG famili na tu long ol setelmen eria. Dispela em ol lain husat i bin i no inap long go insait long ol hai skul insait long Nesenel Kapitel Distrik.

Long 1976, skul i bin stat wantaim 10-pela sumatin man. Na ol i

bin yusim haus ol sista i save yusim long putim ol ka long olsem klasrum bilong ol.

Sista Athanasius i wanpela sista i stap long senta long planti yia nau. Em i tok insait long las 20 yia, ol voluntia i givim gutpela helpim tru long skul long sait bilong wok olsem tisa. Dispela i karamapim ol rilises na leiwok voluntia. Em i amamas tu long gutpela sapot we planti praivet bisnis haus insait long NCD i givim long skul- bikpela tru long sait bilong kisim ol sumatin long wok ekspiriens na tu long kisim planti long ol sumatin bilong dispela skul long wok.

Long NCD i gat tripela yut developmen senta we Katolik Sios i ranim na Maino Heduru Yut Senta (MHYC) em i wanpela bilong ol. Narapela tupela em Hohola Yut Developmen Senta we ol Kristen Bruda i ranim na Gerehu St Charles Yut Developmen Senta. Tripela yut senta ya i givim wankain helpim na sans i go long ol yangpela husat i no inap long go insait long ol hai skul bihain long ol i pinisim gred 6.

Hetmistres bilong senta nau em Sista

Maurus Dallard. Sista Dallard na Sista Athanasius i tupela bilong namba wan Brigidine Sistasusat i bin kirapim komyuniti na yut senta long Erima Katolik peris. Maski sampela yia tupela lusim Erima peris na go wok long ol arapela hap long NCD na Sentral provins, (Sista Maurus long Tapini Hai Skul na Sista Athanasius long Hohola Yut Senta), tupela i go bek na tis long Maino Heduru.

"Bikpela samting mipela i amamas long helpim ol yut long skruim save long helpim ol yut long developmen bilong laip bilong ol. Na ol i ken mekim samting na wok we i helpim laip bilong ol long kamap olsem ol gutpela sitisen bilong kantri," Sista Athanasius na Siata Maurus i tok.

Tupela i tok planti sumatin husat i skul long senta i save kisim wok. Na sampela i save go hetim save bilong ol aninit long Koles bilong Disten Edukesen (CODE).

Tupela i tok ol dispela sumatin husat i kisim wok bihain long skul long senta i gutpela na long wankain taim tu i wanpela bikpela samting.

Raskelman tanim bek long famili

...Kot sasim em 8 yia kalabus

NESENEL Kot long Lae i sasim wanpela yangpela manki Sepik long 8-pela krismas kalabus long yusim hom med sotgan na ol samting bilong pait, brukim haus na stil na i laik bagarapim meri tu wantaim.

Yangpela man ya em Michael John Wambat krismas bilong em 18.

Jastis Timothy Hinchliffe i tokaut long disisen bilong em olsem, long 17 Disemba 1995, Wambat wantaim ol poroman bilong em i bin yusim ol samting bilong pait na hom med sotgan na brukim haus bilong Bernard Apo na kisim wanpela jenereta, TV skrin na ol kolos long ples Kamkumung insait long Lae.

Ripot bilong kot i tokaut olsem Wambat wantaim ol poroman bilong em i brukim dua bilong haus na i go insait na kisim ol samting na tu i go insait long rum bilong ol meri na i laik holim na bagarapim ol. Tasol ol i bin abrus long holim yangpela meri ol i go long en.

Wambat yet i bin tokaut long kot olsem dispela ol samting ol i mekim em i tru.

Jastis Hinchliffe i tokim Wambat long kot olsem kot i skelim krismas bilong em olsem em i yangpela manki tru na em i nogat ol kain rekot bilong raskel pasin long bipo. Tasol em i mas klia olsem sas bilong brukim haus na go insait na stilim ol samting em laip yia long kalabus. Sas bilong holim na i laik bagarapim meri em 14 krismas long kalabus.

Jastis Hinchliffe i tok long stori em i kisim, Wambat i bin holim sotgan na i pulim meri. "Yu save long meri ya na meri ya wantaim ol famili bilong em i save long yu. Yu sampela taim i save

go kaikai long haus bilong ol. Olsem na taim yu mekim dispela trabel, ol lain i luksave stret long yu na kotim yu we polis i holim yu stret na i no narapela man".

Wambat i tokaut long kot olsem em i bin dring spak long dispela taim na em i mekim dispela pasin. Tasol Jas i tok taim Wambat i bin holim meri ya na pretim em wantaim sotgan na i laik kilim em na ol poroman bilong em i bin pulim narapela meri i go na bagarapim em.

Jas Hinchliffe i tok i no gat rait bilong wanpela man long go insait long haus bilong arapela na bagarapim sindaun bilong ol. Ol i gat olgeta fridom bilong sindaun amamas long ol yet. Olsem na mi skelim dispela hevi olsem yu i mas kisim sas long kamapim dispela bagarap long ol manmeri long haus bilong ol, em i tok.

"Mi i no inap bilip olsem arapela man i pusim yu long mekim dispela. Bikos yu yet i bin holim sotgan, yu save long wanem samting i stap haus, wanem meri i stap long haus, yu save kisim kaikai long ol na ol save gut long ol. Dispela i soim olsem yu yet i go pas long dispela samting olsem na mi no inap bilip long arapela i pusim yu o yu spak nogut na mekim dispela", Nesenel Kot Jas i tok.

Wambat i bin askim kot long givim em Gud Bihevia Bod tasol jas i tok dispela i no stretpela panisem long kain trabel olsem. Maski em i bin wokim olsem namba wan taim bilong em, dispela hevi i bikpela tumas we inap kisim man i go kalabus long 15 krismas olgeta.

Jas Timothy Hinchliffe i mekim dispela disisen bilong em long Novemba 6 long las wik na salim Michael John wambat bilong Is Sepik provins i go long 8-pela krismas kalabus.



Madang polis holim ol lain i gat kefiu pas

POLIS long Madang i yusim dispela wik long skulim ol manmeri insait provins long wok bilong kefiu.

Dispela taim tambu, we nesenel gavman i bin kamapim long las wik Fraide, 8 Novemba bai i stap tupela mun olgeta.

Tasol Madang Provinsal Polis Komanda Peter Nessett i tok dispela kefiu o taim tambu

em nupela samting long ol pipel bilong Madang provins. Planti manmeri i no klia long lo bilong dispela kefiu bikos em i nupela na namba wan taim long Madang provins.

Mista Nessett i tok dispela wan wik, ol polisman bilong Madang i yusim long skulim na toksave long ol manmeri long lo bilong kefiu. Bihain long dispela wik i pinis, olgeta manmeri i mas bihainim lo bilong

kefiu bikos ol polisman bai go het long karimaut dispela lo bilong kefiu insait long Madang provins.

Mista Nessett i tok tu olsem wok bilong karimaut kefiu long Madang i wok long go gut bikos ol manmeri i harim tok na bihainim. Maski ol i no klia tumas long kefiu, tasol ol i harim tok na stap isi long haus na banis bilong ol wanwan.

Dispela wik bai polis i mekim moa toksave na skulim ol manmeri gut long dispela samting.

Bos bilong Madang polis i tok insait long wok bilong ol polis long karimaut kefiu, ol i holim pinis sampela man husat i gat kefiu pas. Ol i gat kefiu pas tasol ol i brukim lo na yusim kefiu pas long arapela bisnis bilong ol yet long ron ovanait.

Indai em i wanpela tok nogut

Klostu nau yumi laik pinisim sios yia. Na em i bilong dispela taim, long ritim olkain tok bilong baibel i pas gut wantaim pinis bilong laip. Long 1 Tes 5:2 yumi rit olsem: Ol brata, yupela yet i save pinis, de bilong bai kamap wantu tasol olsem stilman i kam long nait. Ol manmeri bai i tok olsem, 'Nau em i gutpela taim tru. Yumi stap. Na wantu samting na bilong bagarapim ol bai kamap long ol. Na ol bai no inap abrusim dispela samting.' Em hia stori bilong wanpela man husat i save taim bilong em i pinis, tasol dispela i no bin helpim em liklik.

Wanpela kukurai bilong kantri Arabia i painim wanpela yangpela boi i sanap long haus sel bilong em. "Yu husait?" em i askim. "Mi tultul bilong God. Mi gat nem 'ensel bilong indai.'" Kukurai i pilim nogut na i askim moa: "Yu laik kisim wanem samting long mi?"


Ensel i tok: "Mi laik tok save long yu olsem las de bilong yu i kamap pinis."

Yu mas redi. Tumora long taim san i laik go daun, mi bai kam kisim yu." Na wantu ensel i go. Kukurai ya i lap na givim oda long namba wan kamel tru bilong em i mas kamap. "Tumoro bai dispela ensel i painim dispela haus sel i emti na mi stap long we tru." Em i sindaun long kamel na i resis i go long nait na long neks de long san. Taim apinun i klostu, em i kamap long dispela taun we em i laik hait. Em i stapim kamel long wanpela tri, em i go daun na i bringim kamel i go hul wara. Na em i painim husat i sindaun klostu long hul wara? Dispela ensel bilong indai. Ensel i tok, "Asde mi kisim nupela oda long kam kisim yu hia i no long haus sel bilong yu. Pastaim mi no klia long dispela oda, tasol nau mi save pinis."

Tudak i kamap na enjel i kisim kukurai i go....

Long PNG planti pipel moa i save dai olgeta yia long haiwe. Na i no long ol pait namel long ol lain pipel. Na as bilong trabel em i draiva i spak na i draiv.

TUMINIT TINGTING



FRANK MIHALIC i raitim

Long yia 1976 Wantok niuspepa i bin prinin planti photo i soim ol ka na PMV na trak i bam na i bagarap olgeta long haiwe. Sampela taim bodi man/meri i stap insait long ol yet. Sampela rida bilong niuspepa i traut long taim ol i lukim ol photo. Sampela rida i kros long Wantok i prinin ol dispela poto; ol i pretim ol pipel. Tasol edita i tok, em i laik bai ol dispela poto i pretim ol spakman i laik draiv na ol pipel husat i larim ol spakman i draiv.

Long wanpela kantri sapos ol polisman i sasim waspela drava bikos em i bin spit, kot i save tok, dispela man i mas go long bokis ais long haus sik na lukim ol bodi bilong man/meri i bagarap nogut tru long haiwe bikos ol i bin spit. Taim man/meri ya i lukim ol dispela bodi i brukbruk nabaut, ol polis i askim em: "Yu laik stap olsem?" Na draiva i kisim save pinis.

Bipo i no gat ol rot long na tu i no gat man/meri i dai long rot. Tasol tude planti pipel moa i dai long ol haiwe-na no long han bilong ol raskol-tasol long han bilong ol draiva i spak o i no bihainim lo bilong haiwe.

Ol ka na bas PMV i bin pinisim laip bilong planti man, meri, pikinini long PNG. Ol inap pinisim laip yu na mi tu. Na yumi no save long wanem de.... Olsem mobeta yumi redi oltaim. Na yumi orait long ai bilong God. Sapos God i laik singautim yumi long haiwe na yumi redi orait, dispela em inap stap i go long heven.

Soaba em nupela presiden bilong Angliken Mamas Yunien long Mosbi

VERONICA HATUTASI i raitim

ANGLIKEN Mamas Yunien bilong Pot Mosbi Daiosis i gat nupela presiden. Nem bilong nupela presiden ya em Wendy Soaba.

Misis Soaba i bin wok wantaim Matas Yunien insait long Mosbi daiosis.

Ileksen em ol i bin holim long Holi Famili Angliken Sios long Hohola long las wik Fraide Novemba 8. Em i kisim ples bilong Mama Koieba husat i bin holim wok olsem presiden long 9-pela yia olgeta.

Ol arapela eksekutyutiv memba bihainim nupela ileksen em: Seketeri- Alice Agapie na tresara em Cymbelyn Awui.

Moa long 100 mama na ol arapela meri husat i memba bilong Mamas Yunien insait long 5-pela Angliken peris long Nesanel Kapitel Distrik i bin stap insait long seremoni bilong tok gutbai na tenkyu long Mama Koieba long gutpela wok we em i bin mekim long helpim ol Angliken Sios mama insait long ol komyniti long Nesanel Kapitel Distrik. Olsem na planti meri husat i memba bilong yunien i bin sori nogut tru na kra i wantaim long lusim em.

Wanwan peris i bin redim ol presen we wanpela mauseri bilong ol i bin givim i go long Mama Koieba long dispela taim.

I bin gat ol tumbuna singsing we ol mama i makim 5-pela peris insait long NCD i putim kamap long dispela de. Bisop Isaac Gadebo, bisop bilong Angliken Sios long Pot Mosbi daiosis na ol arapela pater bin stap wantaim ol mama insait long dispela seremoni.



• Wendy Soaba . . . nupela presiden bilong Angliken Mamas Yunien bilong Mosbi.

Ol mama i bin givim bikpela tok tenkyu long Mama Koieba long bikpela sapot na gutpela wok em bin mekim long helpim ol meri insait long 9-pela yia we em bin holim wok olsem presiden bilong yunien.

Nupela presiden Misis Soaba i bin tok wok em i kisim nau em i lukim olsem wanpela salens we em i mas fesim tasol wantaim helpim bilong God em bai karimaut gut wok bilong em. Wantaim sapot, gutpela wok-bung wantaim ol arapela yunien memba, na gutpela eksampel bilong Mama Koieba, Misis Soaba i tok ol dispela poin bai helpim em long karimaut gut wok bilong em. "Mama Koieba i bin trenim gut ol mama na em i no bungim bikpela hevi long karia-mut nupela wok bilong em," Misis Soaba i tok.

Em i tok olsem nupela presiden, wanpela bikpela samting we em bai lukim i karimaut em long literesi program bilong ol bikpela manmeri. Dispela em long skulim ol mama long rit na rait long tripela tokples-Inggris, Tok Pisin na Hiri Motu.

Em i tok long nau yet planti mama i no save long rit na rait. Olsem na ol i nogot kliapela save long ol samting we i save kamap insait long komyniti, kantri na wol. Na tu dispela hevi i mekim na planti mama i no save tumas long lukautim gut helt bilong famili na tu dispela i stopim ol mama long go

hetim gut laip bilong ol. Olsem na nupela eksekutyutiv bilong Mamas Yunien long Mosbi bai givim luksave long literesi program.

Em i tok ol bai askim YWCA long helpim ol wantaim dispela program. Ol i luksavs pinis ol risos meri long dispela wok tasol ol i laikim YWCA long givim trenim i go long ol meri long kari-maut dispela program.

Ol narapela prosek we Misis Soaba i tok eksekutyutiv bilong em bai i lukluk, skelim na traim long karimaut em program bilong lukautim ol liklik pikinini, rilises na Sande skul program na ol pastoral program, wok bilong go lukim ol siklain long haus sik na ol kalabuslain long Bomana haus kalabus.

Bai wasim gut long kol wara



Na i smel gutpela mo!



Trinde moningtaim long Gerehu protes mas bung

GODFRIED YASSAFAR i raitim

LONG aste Trinde Novemba 13, ol famili, wanpisin na ol arapela pipel long Gerehu Komyuniti insait long Mosbi siti i sapos long holim wanpela protes mas i go long Haus Tambaran bilong Papua Niugini ol i kolim Palamen Haus we ol nesenel memba bilong mipela i save bung na holim kibung. Na warkurai i go i kam na kamapim ol lo, polisi na ol arapela samting bilong ranim kantri.

Pien bilong holim dispela protes mas i bin stap olsem long moningtaim, olgeta pipel husat i laik stap insait long protes mas ya i mas bung long Gerehu Spot Senta. Bihain, ol bai wokabaut long hap bihainim rot i go long hetkwata bilong Nesenel Kapitel Distrik Komisin ol i kolim Siti Hol. Na bung wantaim Nesenel Kapitel Distrik Gavana, Bill Skate na ol bai wokabaut i go antap long Haus Tambaran. Taim ol i kamap long hap, ol bai givim wanpela petisen o pas bilong ol i go long Prais Minista Sir Julius Chan.

I gat luksave i stap olsem dispela protes mas i bin sapos long kamap aninit long lukaut na supavisen bilong polis. Bikos polis i givim tokorait moa long wanpela wik i go pinis long ol pipel long Gerehu komyuniti i ken holim dispela protes mas.

Astingting bilong protes mas ya we i bin sapos long kamap, em long givim pas i go long Prais Minista Sir Julius long indai bilong 4-pela yangpela boi i no longtaim i go pinis long Dogura nambis bihainim Maghi Haiwe i go ausait tasol long Mosbi siti.

Sampela lain i bin kisim 7-pela yangpela boi i go long dispela hap na kilim 4-pela bilong ol. Tripela i bin laki na nau ol i stap laip yet. Bihainim dispela birua, i gat luksave na bilip olsem sampela wokman bilong sekyuriti kampani bilong wanpela man Wabeg, Laipen Wallen, i asua long kamapim dai long dispela 4-pela yangpela boi. Nem bilong sekyuriti kampani bilong Mista Wallen em Lawa Sekyuriti Kampani.

Polis i wok long karim aut wok sekap yet long dispela birua.

Stat long 6 klok long moning yet, ol pipel i kam na bung long Gerehu Spot Senta, arere tasol long Sen Charles Luwanga Katolik peris na Papindo Supamakot. Ol i bung



• Mista Barter na Mista Tohian husat i stap long kisim petisen bilong Gerehu komyuniti.

long hap-yangpela manmeri, ol mama, ol papa na ol lapun. Ol lain long Sentral provins i kam, ol lain long Oro provins i kam, ol lain long Galp provins i kam na tu sampela bilong Momase na Niugini Ailan rijon.

Taim ol i bung na ol lidaman bilong grup i wok long toktok long wokabaut bilong ol, sampela yangpela man i go long bas stop na stat long stopim ol PMV ba's na tokim ol wokmanmeri husat i wok long go long wok long stap bek. Astingting em long ol woklain tu i mas stap insait long dispela protes mas i go long palamen haus. I no longtaim na polis i kisim ripot bilong samting ol yangpela man i wok long mekim.

Long samting olsem 7 klok long moning, polis i kamap pinis long Gerehu Spot Senta na i wok long toktok na traim kontrolim ol pipel. Ol polis i wok long toktok na traim long tok klia long ol samting tasol ol toktok bilong polis i go popaia. Bikos ol pipel i wok long toktok na singaut nabaut we i soim olsem ol i no laik long harim toktok bilong polis.

Ol i no luksave olsem polis i no traim long stopim ol long holim dispela protes mas. Nogat. Polis i wok long traim long helpim ol long ol i mas stap isi na toktok na go het wantaim protes mas bilong ol aninit long gupela pasin, rot na i noken kamapim ol hevi.

Bikos long ol krangi pasin bilong ol pipel, polis i luksave ples klia tru olsem sapos ol i larim dispela protes mas i go het, i gat ol hevi na bagarap bai kamap. Em nau polis i tokim ol pipel i bung olsem sampela gavman lain bai kamap na toktok long ol na kisim petisen bilong ol. Tasol ol pipel i no wanbel. Na ol i stat long singaut na tok olsem ol gavman lain em ol giaman lain na ol bai no inap kamap. Olsem na ol i mas go het wantaim protes mas i go long palamen. Ol i strong tru na i laik wokabaut tasol ol polisman i mekim gupela na smatpela wok na stopim ol.

Ol lidaman bilong ol i tokim ol long stap isi tasol planti yangpela man i toktok nabaut na strong tru long wokabaut. Tru tumas, ol polisman i sambai pinis long olgeta kona na redi tasol long mekim wok bilong ol. Maski san i hot, ol i no wari long hot bilong san.

Ol polisman i pulim taitim wantaim ol lain i bung na mekim i go na Komanda bilong Nesenel Kapitel Distrik na Sentral provins polis, Asisten Komisina Philip Taku i go kamap. Na em i toktok na tok klia i go long ol olsem sampela bikman bai kamap na harim wari na kisim petisen bilong ol. Komanda Taku i askim ol tu long stap isi na wetim ol bikman long kam kamap. Tasol westap, ol i no rispektim Komanda Taku o hariim tok bilong em.

Bihain long dispela, Komanda Taku i go long sekap long ol bikman bai kamap. Bihain long em i go, ol lain i bung i strong tru long ol i mas wokabaut i go long palamen haus. Polis i tokim ol long stap isi tasol ol i strong moa moa yet na i laik stat long wokabaut. Taim ol i laik redi long tromoi lek, polis i kirap tasol long pairapim ol sotgan i go antap long skai na ol manmeri na pikinini i ranawe nabaut. Bihain polis i singautim ol i kam bung na ol i tokim ol olsem i moa gupela long stap isi na wetim ol bikman long kam kamap.

Bihain long sampela taim na Komanda Taku i salim toksave i go long ol polisman bilong em long ol i mas tokim ol pipel long stap isi bikos ol bikman i redi long lusim palamen haus na i go long kisim petisen bilong ol.

Long 11 klok (moning) stret, sampela polis ka i eskotim opisal ka bilong praim minista (PM) i go kamap. Insait long ka bilong PM em Minista bilong Provinsal na Lokol Gavman Afeas, Peter Barter na Minista bilong Edministretiv Sevises Paul Tohian.

Taim ol pipel i lukim Mista Barter na Mista Tohian, ol i bel kaskas olgeta na stat long tromoi kainkain tok. Sampela i tok ol i laikim ol lida bilong Papua rijon, bikpela tru em Gavana Bill Skate na Deputi Prais Minista na Fainens Minista Chris

Haiveta i mas kamap long kisim wari na petisen bilong ol. Ol i tok Mista Barter na Tohian i no bilong Papua rijon. Ol i laikim ol lida bilong Papua rijon stret i mas kisim wari na petisen bilong ol i go long gavman.

Komanda Taku i tok klia i go long ol na tokim ol olsem em i stopim Gavana Skate long kamap. Bikos em i tok sapos Gavana Skate i kamap na mekim ol samting i go moa bikpela, em (Komanda Taku) bai arestim em. Tasol ol pipel i no wanbel long toktok bilong Komanda Taku.

Bipo long ol i givim petisen i go long Mista Barter na Tohian, tupela mama bilong tupela bilong 4-pela yangpela boi husat i lusim laip bilong ol i toktok.

Namba wan mama, bipo long em i toktok, em i brukim kraik. Em i painim hat long toktok na autim wari bilong em na brata bilong em i toktok.

Brata bilong meri ya i toktok na tok strong tru olsem ol lain husat i kilim 4-pela yangpela boi ya i mas lusim graun bilong Papua. Na em i tok olsem, ol pipel i singaut na sapotim em.

Na tu em i laikim olsem ol lain husat i kilim 4-pela boi ya i mas baim kompensesen insait long tupela wik tasol. Sapos nogat, ol bai mekim samting long lukim olsem ol i baim kompensesen. Em i tok olsem na ol pipel i singaut long soim sapot bilong ol.

Namba tu mama tu i tok olsem ol lain husat i kilim 4-pela boi ya i mas lusim Mosbi siti. Na tu ol i mas baim kompensesen insait long arapela tupela wik tasol.

Em i askim tu Mista Barter sapos gavman bai mekim sampela samting o nogat. Sapos nogat, orait ol bai aninit long was na lukaut bilong polis, wokabaut i go long palamen haus.

Bihain long Mista Barter i kisim petisen na mekim sotpela toktok, em wantaim Mista Tohian i kalap long ka na i go. Orait Komanda Taku i askim ol pipel husat i bung long wokabaut isi na gut i go bek long wanwan haus bilong ol.

Bihain long Komanda Taku i kalap long ka bilong em na i go, ol pipel i bung na stap yet. Polis i tokim ol long i go long haus tasol ol i sanap na toktok yet. Em nau polis i kirap na sut long tiages na sut long sotgan i go antap long skai na brukim bung bilong ol. Na ol manmeri na pikinini i ranawe nabaut i go long haus bilong ol.

Tu-we redio sistem bringim Unggai Bena klostu long taun

SAPE METTA i raitim

UNGGAI-Bena ilektoret insait long Isten Hailans provins i ken amamas long kamap wantaim wanpela komyunikesen sistem we ol i no bin i gat longpela taim i go pinis.

Olgeta gavman ka na ambulensi i save operet long dispela rurel eria wantaim ol et pos, edministretiv opis, kaunsil opis na ol arapela gavman divisen we i save givim sevis i go long ol pipel bilong Unggai-Bena bai kamap wantaim tu-we redio komyunikesen sistem. Dispela sistem bai bringim Unggai-Bena eria i go klostu long Goroka taun bai givim gupela komyunikesen namel long tupela eria wantaim.

Taim ol pipel long Unggai-Bena i gat hevi na laik salim toksave long ol gavman opis, kaunsil opis, haus sik, ol polisman na laikim ol arapela gavman sevis long Goroka taun, isi tasol ol bai hapim tu-we redio sistem bilong ol na toksave long ol dispela opis long Goroka taun.

Man husat bai go pas long putim kamap ol dispela tu-we redio sistem, Robin Novi husat i wanpela redio/teknisen tredsmen na tu em i bin i stap insait long dispela wok inap 15-pela krismas, i tok em i bin kamap wantaim dispela tingting bikos longpela taim ol pipel long Unggai-Bena i nogat dispela kain sevis. Olsem na wantaim sapot bilong memba bilong Unggai-Bena ilektoret long nesenel palamen Kevin

Masive, em bai kamapim dispela komyunikesen sistem namel long Goroka taun na Unggai-Bena.

Mista Novi i tok taim em i joinim ol waia na mekim kamap dispela komyunikesen sistem, toktok long dispela tu-we redio sistem bai kamap klia long olgeta hap bilong Isten HaiAns na tu i ken kamap long bilong Madang provins na long sampela hap bilong Simbu provins.

Distrik edministreta bilong Unggai-Bena, Charles Gotto husat i bin wanbel long dispela sistem i tok em i gat bikpela amamas long dispela sistem. Bikos nau em i ken sindaun isi long opis bilong em long Goroka na harim tasol long redio wanem kain hevi ol pipel long hap i autim na em i ken salim ol sevis i go long ol.

Em i tok long bipo taim ol pipel long Unggai-Bena i save i gat hevi, ol i save westim taim long wokabaut i kam long bikrot na kalap long ka na i save kam long opis long Goroka na toksave long em wantaim ol opisal bilong em. Tasol nau wantaim dispela wok bilong putim kamap ol dispela tu-we redio sistem, i luk olsem olgeta samting bai kamap isi tru long sait bilong bringim ol sevis i go insait long Unggai-Bena.

Mista Gotto i tok i luk olsem dispela komyunikesen sistem i kam long gupela taim. Bikos lukluk long ol hevi nau ol i stap long en we i hat tumas, dispela komyunikesen sistem bai mekim kamap olgeta samting i isi long ol long sait bilong edministresen na ol arapela divisen tu.



When all the work is done...



**RAMU
SUGAR**



“Natural as Life”

Eko-forestri kampani long Kikori win tru

JANE SALIN i raitim

TUDE insait long planti wol maket insait long wol, i gat interes i stap long baim ol fores prodak we i kamap aninit long pasin bilong mekim wok na wankain taim lukautim envairomen.

Insait long Papua Niugini, Hope Fores Invesmen, wanpela papagraun kampani i wok long karim aut eko-forestri wok insait long Kikori distrik, i stap long gutpela posisen long go pas long wokim ol timba aninit long wok we i no inap bagarapim envairomen.

Hope Fores Invesmen (HFI) i stat long salim ol timba bilong en i go aut long ovasis dispela yia. Long mun Jun HFI i salim namba wan 16 kiubik mita timba i go aut long ol maket long Amerika. Nau yet HFI i wok long redim namba tu 18 kiubik mita sipmen. HFI i salim ol timba bilong en i go long ol lokol maket long Mosbi. HFI i wok long stretim ol samting tu long salim ol timba bilong en i go long ol maket long Australia na Yurop.

HFI i kisim kontrak long saplaim ol timba long Gobe Prosek na tu long Kopi/Kaiam rot na bris prosek.

Operesen bilong HFI i no long taim i go pinis i kisim luksave i kam long wanpela eko-forestri kampani long Amerika. Dispela kampani i wok long tingting long kam na kirapim wanpela gutpela miling operesen long HFI long maus bilong wanpela liklik wara ol i kolim Utiti. Dispela liklik wara i ron i go na joinim Kikori Riva.

Taim ol timba prodak bilong HFI i pulim ol kastoma long ol ovasis maket, ol eko-forestri kampani long Amerika i tok i gat ol somil i stap we i ken wokim ol gutpela timba prodak.

Bikos operesen bilong HFI i wanpela pailot prosek, ol i mas karim ol diwai bihainim ol lo.



□ Somil bilong HFI we ol i save wokim ol timba.

Astingting em long katim ol diwai we ol kastoma i laikim. Na diwai ol i katim i mas i gat inap wankain yangpela diwai long gro.

Wok bilong katim ol diwai tu i mas kam aninit long lukluk na lukaut bilong wanpela profesenel foresta long lukim ol wok bilong katim diwai i noken kamapim bikipela bagarap long envairomen. Na ol i save yusim trakta i gat raba taia long pulim ol diwai long bus i kam aut long somil.

HFI i bilong 5-pela papagraun grup bilong Rumu wanpisin long Kikori. Ol i papa tu long 17,000

hekti fores we i stap namel long Kopi kem bilong Kutubu Prosek na go not long ples Kaiam.

HFI i karim aut operesen bilong en aninit long lukaut na supavisen bilong biknem non gavman oganaisesen ol i kolim Wol Wailaip Fan (WWF). Chevron Niugini na ol join vensa patna bilong en i bringim WWF i kam long promotim ol rot we ol papagraun bilong fores i ken yusim fores risos bilong ol long karim aut wok long helpim ol yet. Ol dispela wok i mas kamap long ol gutpela rot long lukautim ol risoses na envairomen na i no long bagarapim ol.

Lens dipatmen gat nupela menesmen tim

SEKETERI bilong Lens dipatmen, John Painap long dispela wik Mande Novemba 3 i tokaut long nupela menesmen tim bilong dipatmen bilong em.

Tasol i gat luksave i stap olsem dispela nupela tim i no bilong stap oltaim. Tim ya i bilong sotpela taim tasol long lukautim opis inap long taim apoinmen bilong stap oltaim i kamap.

Em i tok apoinmen bilong menesmen tim long stap oltaim. bai kam aninit long Jenerel Oda 5 we i karamapim Rikrutmen na Seleksen bilong ol Opisa long holim posisen insait long Pablik Sevis.

Em i tok apoinmen bilong ol nupela divisene het i kam aninit long nupela straksa long karim aut ol wok bilong rifom sistem. Dipatmen bilong Pesenel Menesmen i oraitim dispela nupela straksa long mun Ogas

dispela yia.

Em i tok long bipo dipatmen i gat tupela deputi seketeri. Aninit long nupela straksa, dipatmen bai gat wanpela deputi seketeri tasol na ol divisene het.

Nupela menesmen tim bilong Lens dipatmen Seketeri Painap i tokaut em: Morris Alaluku-Deputi Seketeri, Elias Masta-Dairekta bilong Pisikel Plening, Clement Kuburam-Velyua Jenerel, Anthony Leuben-Seveya Jenerel, Lindsay Gideon-Taitels Rejistra, George Baure-HRDFA Fes Asisten Seketeri, Philip Isaacs-Risos Infomesen Menesa, Pepi Kimas-Fes Asisten Seketeri bilong Polisi na Plening, Silas Peril-Len Edministresen Dairekta, Mervyn Taumomoa-Sauten Divisen Deputi Dairekta, Daniel Katakumb-Noten Divisen Deputi Dairekta, Leo Minjan-Ailan Divisen Deputi Dairekta,

Gabriel Donump-Hailans Divisen Deputi Dairekta, Peter English-Fes Asisten Seketeri bilong Nesenel Meping Biro.

Mista Painap i tokaut olsem nogat apoinmen i kamap long posisen bilong Risos Invesmen Dairekta.

"Olgeta divisene het husat i kisim apoinmen bai kisim na lukautim wok wanwan divisene bilong ol. Na mi laikim gutpela wok i mas kamap insait long wanwan divisene bilong ol," Mista Painap i tok.

Em i tok ol dispela apoinmen i bilong sotpela taim tasol. Apoinmen bilong stap olgeta bai kam aninit long wok wanwan bilong ol divisene het i mekim na karim aut. Mista Painap i askim tu ol wokmanmeri bilong wanwan divisene long wokbung wantaim wanwan divisene het bilong ol.

Skul sabsidi skim i no wok gut

...ol politisen yusim skim long pulim vot

JOE KANEKANE i raitim

WANPELA saveman bilong Nesenel Rises Institut (NRI) long Mosbi i tok olsem skul fi sabsidi skim i no bin wok gut na ol politisen i giamanim ol pipel long yusim dispela skim long winim ileksen.

Hetman bilong Dipatmen bilong Politikel na Ligel Stadis seksen long NRI, Dokta Henry Ivarature i tok olsem ol pipel i bin painim bikipela taim tru long wanem ol i bin lusim bikipela bilip long dispela skim.

Em i tokim ol papamama olsem bai nogat fri edukesen. Na ol i mas redim mani bilong baim skul fi bilong ol pikinini na nogut ol i was long dispela skim tasol na gavman i no inap long mekim dispela skim i kamap trupela.

Long wankain taim ol i bin putim was long sabsidi mani long kam longpela taim na planti bilong ol i bin baim skul fi bilong ol pikinini bilong ol.

Em i tok long dispela skim ol politisen tasol i bin kamap olsem ol wina. Long wanem ol yet i bin go pas long mekim ol lo bilong dispela skim olsem na ol yet i ken kisim helpim long winim ileksen bilong ol.

"Wanem taim ol politisen i laik winim ol vot, ol i save yusim dispela nem fri edukesen, long paulim ol manmeri long winim ol vot," Dokta Ivarature i tok.

Dokta Ivarature i tok planti taim ol politisen i save tokim ol pipel olsem taim ol i winim ileksen, ol bai lukim olsem fri edukeisen i mas kamap. Tasol bihain long ol i winim ileksen,

fri edukesen i no save kamap tru.

Dokta Ivarature i tok arapela samting ol i mekim em pasin we gavman i givim mani long han bilong ol memba long givim i go long ol skul.

Em i tok dispela pasin bilong gavman i bin givim hevi long ol pipel long wanem planti taim ol memba i no save go long ol skul hariap na ol skul i save bungim bikipela hevi. Long wanem ol i nidim mani long baim ol buk na ol arapela saplai bilong ol na taim dispela mani i no i go kamap long ol, planti skul i bin pas o i tokim ol papamama long baim skul fi.

Em i tok Simbu provinsal gavman tasol i bin winim ol arapela provins long givim fri edukesen long olgeta skul sumatin. Tasol taim ol arapela provins i laik bihainim dispela, planti bilong ol i pundaun long wanem i nogat gutpela plening na mani i sot.

Long dispela as planti papamama long ol provins i bungim bikipela hevi long baim skul fi bilong ol pikinini.

Mista Ivarature i tok arapela asua gavman i no mekim em long tok klia gut long fri edukesen i min wanem na skul sabsidi skim i min wanem. Dispela em long mekim ol pipel i klia gut long mining bilong fri edukesen na sabsidi skim.

Mista Ivarature i tok dispela paul tingting i givim bikipela hevi long ol pipel long wanem planti bilong ol i no save long rit na rait na taim gavman i no tok klia ol i paul olgeta. Bikos ol i bin was tasol long gavman na taim ol mani i no givim, planti bilong ol i kros wantaim ol skul na ol provinsal edukesen opis.

Dokta Ivarature i tok taim bilong ileksen i klostu pinis na ol wankain politisen bai kamap wantaim ol wankaim promis bilong ol na ol papamama i mas was gut.

Ol CODE sumatin long Kikori bai stadi sains neks yia

OL sumatin bilong Koles bilong Disten Edukesen (CODE) long Kikori stat long arapela yia bai stat long sindaun wantaim ol sumatin bilong Kikori Hai Skul long lainim ol samting.

Ol CODE sumatin long Kikori bai kisim dispela sans bikos Kikori Hai Skul na Kutubu Join Vensa, husat i go pas long lukautim na kodinetim CODE long Kikori, i kamapim pinis wanpela tokorait we i oraitim ol CODE sumatin long sindaun wantaim ol wanlain bilong ol long hai skul long lainim ol sabsek olsem sains.

CODE em i wanpela stadi o kos we ol sumatin husat i no inap pinisim stadi bilong ol long hai skul o nesenel hai skul i save mekim long skruim save o edukesen bilong ol. Wanpela bikipela hevi ol CODE sumatin i gat em ol i no save stadi long sains. Dispela long wanem i nogat sains labrotori we ol i ken yusim. Tasol long sait bilong ol CODE sumatin long Kikori, stat long arapela yia ol bai i gat sans long stadi long sains.

Bihainim tokorait namel long Kutubu Join Vensa (KJV) na Kikori Hai Skul, KJV i wokim ol des na putim insait long ol klasrum long dispela hai skul long ol CODE sumatin long yusim taim ol i go long sindaun long

sains klas. Antap long ol des ya ol i karamapim wantaim ol wol mep we fil fainens manesa bilong KJV, Dave Hyams i saplaim.

Sinia komyuniti developmen opisa bilong KJV, Cyril Kondang i tokim ol CODE sumatin bilong Kikori olsem ol i laki tru long kisim dispela kain sans long skruim edukesen bilong ol.

Em i tokim ol sumatin ya olsem ol arapela wanlain bilong ol insait long kantri i nogat dispela kain sans long sindaun long fomel sains klas stat long arapela yia.


Mista Kondang i givim tu wanpela K1000 sekmani i go long ol sumatin bilong Kikori Hai Skul long helpim ol long wokim 1996 skul megesin bilong ol.

Namba wan 10-pela CODE sumatin long Kikori bai greduet long arapela mun (Disemba) dispela yia. Dispela 10-pela sumatin ya, 7-pela man na tripela meri, i pinisim sekondari edukesen bilong ol na bai resis wantaim ol arapela wanlain bilong ol insait long kantri long winim spes long teseri institusen.

Ol bai kisim gred 10 setifiket bilong ol wantaim ol gred 10 sumatin bilong Kikori Hai Skul insait long wanpela seremoni ol bai holim wantaim.

Gerehu protes mas bung long poto

Ol poto: IVAN BAYAGAU




• Sampela mama, yangpela meri, lapun meri na ol arapela pipel husat i kamap na bung long holim protes mas i go long palamen. Tasol o i no wokabaut bikos long sampela liklik hevi.



Eksen mas kamap . . .

Brata ya i holim katbod i gat rait antap i toktok long gavman i mas mekim samting long stretim dis-pela hevi we 4-pela yangpela boi i lusim laip bilong ol.



Wari kilim em . . .

Meri ya i mama bilong wan-pela bilong 4-pela yangpela boi husat i lusim laip bilong em. Aste em i laik toktok na autim wari bilong em tasol wari i moa moa yet na em i painim hat long toktok na em i brukim krai. Mekim nogat na brata bilong em (raithan) i holim em na sapotim em long toktok. Tasol em i no inap na brata bilong em i makim em na tok-tok.



Jastis mas kamap . . . Mama ya i holim wanpela hap katbod i gat rait antap long en long soim osem jastis i mas kamap long lain i kilim famili memba bilong em long mekim sol bilong famili memba bilong em i ken-malolo wantaim pis. Pes bilong ol arapela lain i sindaun wantaim em i soim sore na wari ol i gat.

Printing Haus laik strongim sevis bilong em

JAMES KILA i raitim


PRINTING Haus long Mosbi em i wanpela kampani we i save mekim ol wok bilong prinim ol buk, pepa ol ol posta we ol ampela kampani i save lakim long mekim wok bilong ol.

Dispela kampani i save stap klostu long Hohola long Mosbi.

Printing Haus i bin stat long 1990 na wok bilong en i bin kirap long 1991.

Nau yet kampani i go insait pinis long namba-6 yia bilong operesin bilong en. Long 1993 kampani i bin go strong tru long mekim ol bisnis wok bilong en.

Kampani nau i gat 3-pela ol masin we i save mekim ol bikpela wok bilong en. Ol dispela masin em Ryobi 500 NP we i save wokim ol inouis buk na tu i ken mekim ol wok bilong



• Sevese Sarea i wok long lait-tebol. Ol foto: James Kila.

A3 sais wok. Namba tu masin em Hamada masin, we i ken mekim ol wok bilong A3 na ol narapela wok daunbilo long dispela sais bilong pepa. Ol i gat to 2,800 Ryobi masin

we i ken wok hariap long A4 wok na tu i save wokim ol prodaksin wok bilong ol printing pres.

Long printing haus i gat wanpela seksin bilong Tudak Rum

(Dark Room) seksin we gat ol masin olsem Agfa kamera, wanpela lait-tebol na droing bod we tripela wokman i ken wok long en.

Long narapela flua

seksin i gat wanpela bairding masin bilong stretim na pasim strong ol buk na pepa. Ol igat tu Gullotine masin bilong katim pepa na tu wanpela autometik stepling masin we i save pasim strong ol pepa.

Ol i gat 3-pela selegt masin we i

Printing Haus i gat sampela ol bikpela ol lain em i save mekim bisnis wantaim ol.

ken mekim ol kain kain wok. Ol i gat tu ol pepa plet meka.

Pring Haus i gat 14 wokman meri husat i save mekim wok long printing. Tripela wokman i save wok long dak-rum na pest-ap, tripela long pres rum, 2 pela opis meri na tupela selsman.

Menesing dairekta bilong kampani em, Harry Lewis na prodaksin menesa em Thomas Kahai.

Printing Haus i gat sampela ol bikpela ol lain em i save mekim bisnis wantaim ol. Sampela ol dispela lain em Blake Dawson Loyas, Telikom maketing, Elcom, Associated Distributors, NDCD, Nesenel Kot (NJSS)

na Hohola Softdrink. Ol i save mekim ol wok bilong ol kampani olsem Ok Tedi na tu prinim ol skul megajin bilong ol haikul long provins.

Ol i save mekim wok tu wantaim ol narapela bisnis haus husat i laikim ol printing wok bilong ol.

Prodaksin menesa, Thomas Kahai i tok olsem nau yet kampani i gat bikpela tingting long bringim ap ol sevis bilong en na tu kisim ol sampela lain long mekim bisnis wantaim ol.

"Mipela bai i lukluk long karimaut wok i go inap yia 2000 na bihain na lukim wanem gutpela samting mipela i ken wokim," Mista Kahai i tok.

THE PRINTING HAUS PTY LTD

P.O. BOX 6396 BOROKO,
N.C.D.

FULL TYPESETTING SERVICE
ANNUAL REPORTS
LETTERHEADS
PAMPHLETS
LEAFLETS
BUSINESS CARDS
SCHOOL MAGAZINES
ELECTION POSTERS
INVOICE BOOKS
MEMO PADS

HELP IN THE DEVELOPMENT OF PNG
CALL THE PRINTING HAUS.
A NATIONALLY OWNED COMPANY

FOR ALL YOUR PRINTING REQUIREMENTS
CALL ONE OF OUR SALESMEN
WHO HAVE 12 YEARS PRINTING EXPERIENCE BETWEEN THEM
AND ASK FOR A FREE QUOTATION

TEL: 325 2415

FAX: 325 4743



• Kari Ilagi i wok long 2800 NP masin.

PNG LAIPSTAIL



□ Papa Kanage em i wanpela hapman stret na em i wanpela ami sajen long Moem Bareks long Wewak. Kain bilong ol ami boi na olgeta taim Kanage i save bilas gut tru na raun. Maski em i no stap long duti na stap long haus, em i save bilas gut. Long wiken taim em i laik i go raun long taun, boi nogut i save bilas gut tru winim ol arapela wanwok bilong em.

Wanpela taim Kanage wantaim misis bilong em i go long benk long taun. Tupela i go kamap na lain long benk i longpela na tupela i sanap long lain. Kanage i sanap long fran na misis bilong em i sanap long beksait bilong em. Na beksait long misis Kanage, wanpela yangpela wokmeri bilong Elkem i sanap. Yangpela plawa ya i bilong Tolai.

Taim ol i sanap long lain, yangpela plawa bilong Tolai i lukim papa Kanage i go na bodi bilong em i stat long kol. Em i traim long tingting gut tasol nogat, tingting bilong em i raun olsem masin. Dispela kaparesa bilong ples bilong maunten paia i ting olsem papa Kanage i mas wanpela pailot bilong PNG Difens Fos.

Mekim i go nogat na meri biage (Tolai) ya kirap na tok eskus long misis Kanage na misis Kanage i tanim na em i askim: Mams, ating man ya i mas wanpela pailot bilong ol ami ya.

Misis Kanage i smail tasol na tokim biage ya olsem: Nogat, em man bilong mi ya. Em i wanpela sajen long Moem Bareks.

Taim meri Tolai ya i harim misis Kanage i tokim em olsem, bikpela sik malira, o sori sik malaria, i kisim em na em i lusim benk na i go long haus. Em i no kisim mani long benk bikos lewa bilong Kanage i kolim paia bilong em olgeta.

**Kanage Supporter
WEWAK**

■ Liklik pikinini meri bilong Kanage i wanpela meri bilong toktok stret. Em i gat 5-pela krismas tasol em i save toktok olsem wanpela lapun meri. Kanage wantaim misis bilong em i save painim hat tru long winim em long toktok o stori. Mekim na Kanage wantaim misis bilong em i save kolim pikinini bilong tupela "lapun mama."

Wanpela taim tripela i go soping long stua. Ol i go na soping pinis na misis Kanage i baim wanpela dring bilong em na wanpela bilong liklik pikinini meri. Na tripela i kisim ol plastik kaikai na i go sanap ausait.

Ol i stretim ol plastik kaikai pinis na mama na pikinini i opim dring bilong tupela na dring. Pikinini i dring i go na em i pulap na givim hap long Kanage. Tasol Kanage i les na tokim pikinini long pinisim. I no longtaim na misis Kanage tu i pulap na givim hap dring bilong em long Kanage. Na Kanage i kisim na dring.

Taim pikinini meri i lukim olsem Kanage i kisim hap dring bilong misis Kanage na dring, pikinini i no wanbel. Na em i kirap na tok: Mi givim em hap dring bilong mi na em i les. Na taim meri bilong em i givim, em i kisim na dring. Olsem wanem, wanem taim bai pasin bilong wantok sistem i pinis insait long famili?

**Kanage Rut
KIMBE**

□ Wanpela taim Kanage wantaim misis bilong em i stap insait long haus na pikinini man bilong tupela i pilai i stap ausait. Tupela sindaun stori i go na tupela i go insait long rum na wok long tromoi tumbuna stori i go i kam long ol bubu bilong tupela i kamap olsem wanem.

Tumbuna stori i go swit olgeta na tupela i lusim tingting olsem dua bilong rum i op na stap. Tupela i lusim tingting olgeta bikos olgeta tingting bilong tupela i stap long paradais gaden we Adam na Eva i bin kisim filings long en.

I no longtaim nau pikinini man bilong tupela i pilim hangre na em i go insait long haus. Em i wokabaut isi isi i go antap long leda na taim em i kamap long dua bilong haus, em i ron i go insait long haus na i go olgeta long rum. Taim em i kamap long dua bilong rum, em i tok: Mami, mi laik kaikai ya, mi hangre.

Taim pikinini i sanap long dua bilong rum na tok olsem, Kanage wantaim misis bilong emi katim tumbuna stori bilong tupela long namel. Na misis Kanage i kirap na tok: Devel kaikaim em.

**Kanage's Disciple
SAN KAMAP**

**DON NILES bilong Musik
Dipatmen long Institut
bilong PNG Stadis i
raitim**

Long olgeta yia, i mas i gat konprens insait long wanwan distrik bilong Luteran Sios. Wok bilong dispela konprens em long harim ripot bilong ol komiti na tu long paitim toktok long ol hevi i stap insait long distrik. Planti distrik konprens em olsem tasol. Insait long Jabem Distrik long Morobe provins, ol i save wokim olsem tu tasol em i bikpela taim tu long kamapim kainkain singsing lotu na singsing tumbuna.

Long dispela yia, distrik konprens bilong Jabem Distrik i kirap long Tunde 29 Oktoba na pinis long Sande 3 Novemba. Em i kamap long ples Busong insait long Deka Seket namel long Lae taun na Finsafen. Em i wok bilong ol manmeri bilong Deka Seket long lukautim ol deleget i kam long ol arapela seket bilong Jabem Distrik olsem na ol lain Deka em ol "as paia" bilong dispela konprens. Het tok bilong dispela konprens i kam long Buk Baibel long Kolosi 1:18: "Krais em i het bilong sios."

Ples bilong konprens em i arere long ples Busong tasol pastaim long konprens i kamap, dispela hap i bin bus tasol. Ol lain insait long Deka Seket i hatwok tru long katim bus na kamapim ples bilong konprens. Ol i wokim bikpela haus i stap namel long konprens, em i go antap tru, olsem na em i kamap taua. Em i ples bilong ol man i sanap na toktok. Ol fom bilong sindaun i raunim dispela taua.

Insait long Jabem Distrik i gat 14-pela seket olgeta. Deka Seket em ol as paia. Na olgeta arapela 13-pela seket i gat fom bilong ol yet. Long beksait bilong ol fom, olgeta seket i gat haus bilong slip. Beksait gen long ol dispela haus, em ol haus bilong wanwan kongrigesen bilong Deka Seket. Em i wok bilong ol long lukautim ol deleget i kam long ol arapela seket.

I gat haus bilong lukautim bikpela jenereta i kam long Elkem long givim lait na paua bilong lautspika, haus bilong etpos na haus bilong ol liklik stua bilong salim tin kaikai, kol dring, buai, laplap, ol buk, na kain samting olsem. Long wokim distrik konprens, em i bikpela wok tru, long wanem moa long 1000 manmeri bai kam long ol arapela seket. Ol polismān tu i stap bilong helpim olgeta man i sindaun isi tasol na n ken wari long wanem samting.

Insait long Jabem Distrik Konprens, singsing em i bikpela samting tru. I nogat singsing bilong opim na pasim konprens tasol. Singsing bilong Jabem Konprens i makim dispela samting na tu olgeta arapela samting insait long konprens: bilong bringim ol deleget i bung long nambis i go long haus bilong ol, bilong bringim kaikai long ol deleget, bilong givim pik long ol, bilong kirapim ol long moning, bilong singautim ol long kam sindaun long fom, bilong salim ol i go kaikai long belo na long apinun, bilong pinisim toktok, bilong kirapim na pinisim lotu long olgeta nait na ol samting olsem. Em i wok bilong ol as paia long singsing na amamasim ol deleget.

Samsega bilong Jabem Distrik bilong Luteran Sios



• Ol manmeri bilong Deka Seket i singsing na pairapim garamut na kundu bilong singautim ol deleget i kam bung.

Sapos yu bilong narapela distrik na yu harim ol dispela singsing, bai yu ting em ol singsing bilong ples tasol olsem singsing sia, munge, wesing na sabi. Tru, nek bilong ol singsing em ol singsing bilong ples tasol toktok bilong planti singsing em toktok bilong lotu long tokples o long Tok Pisin. Olsem na wanpela singsing i bihainim nek bilong ples tasol toktok em olsem: Ol Kristen, harim Holi Spirit i kam long tok-save. God i singautim yumi olgeta, strongim bel wantaim Jisas Krais.


Ol manmeri i singsing olsem. Ol man i paitim kundu na sutim garamut na ol meri i samsam. Ol Luteran i lain i go pas tru long tainim singsing bilong ples i kamap singsing lotu. Ol misinari bilong bipo i bin kirapim dispela tingting na planti man long ples i bihainim dispela pasin olsem na dispela i kamap mak tru bilong ol Luteran. Sapos i

nogat dispela kain singsing i kamap long konprens, ol deleget bai ting ol as paia i popaia olgeta na i no wokim samting stret.

Jabem Distrik tu em i asples bilong sel ben na bras ben. Olsem na ol tu i stap long konprens bilong amamasim ol manmeri.

Insait long Jabem Distrik, nem bilong dispela konprens em i samsega. Em i tokples Jabem na mining bilong en "bikpela sam tru". Sam em i makim wanpela pasin bilong ol Jabem bilong bipo we wanpela ples i salim ol pik. Em tu i bin bikpela samting we ol manmeri i kam long ol arapela hap na planti singsing tu i bin kamap.

Namba wan konprens bilong Luteran Sios i kamap long 1911 o 1914, dispela yia em i no klia



• Bikpela taua i stap namei long ples bilong konferens.

tumas. Pastaim ol misinari i givim nem "Melanesian Day" long dispela bung. Tasol bihain, planti samting bilong sam i go pas wantaim wok bilong lotu na sam i gat nupela mining. Olsem na nau sam i makim wok bilong sios tasol planti gupela pasin bilong sam bilong ol tumbuna tu i stap insait yet. Pasin bilong ples i mekim wok bilong sios i kamap strong.

Long pinisim dispela Samsega, ol lain bilong Buenggem kongrigesen i wokim singsing sia. Tupela rop i kam long antap tru bilong taua na i

go daun long graun. Taim ol manmeri i singsing aninit long dispela rop, wanpela stik i gat tripela pisin long em i wok long samsam isi isi i kam daun long rop. Dispela tripela pisin ol man i sapim long diwai. Maus bilong wanpela pisin i holimpas i givim toksave long Samsega long neks yia bai kamap long Lauloc seket. Olsem na taim ol lain Buenggem i singsing na dispela pisin i kam daun, ol lain Lauloc i kam insait long kisim dispela pas na sampela arapela kaving. Ol lain Lauloc i gat bikpela wok nau long wok olsem as paia long Samsega bilong 1997.

PNG i gat planti ples masalai

OLGETA hap insait long Papua Niugini i gat ol bus, maunten, ston na hap ples we yumi tok em ples masalai o ples tumbu. Yumi bilip strong olsem i gat sampela kain spirit o tewel i stap long ol dispela hap ples.

Olgeta hap i gat dispela kain ples i stap na tude ol i save lukim na rispektim long em i mas i stap na yumi mas pret long no ken mekim nabaut long ol. Planti hap i gat kain kain stori bilong ol yet we olgeta i no wankain long narapela.

Mi liklik boi yet na mi save harim planti stori bilong ol dispela kain ples. Na mi save pret na ting olsem i gat ol man nogut i stap long ol dispela kain hap. Sampela taim mi save ting long go lukim sapos i gat man tru i stap na haus bilong ol i olsem wanem. Tasol taim mi tok olsem bai tupela lapun bilong mi i tok, "yu laik indai o wanem?". Dispela kain nek i save pretim mi moa.

Taim wanpela man long ples i painim bikpela sik tru, bai ol famili na ol lain bilong ples i tok, ol i lukim man o meri ya klostu long dispela hap ples, wanpela o tupela de i go pinis. Em nau bai ol i askim em sapos em i tromoi sampela pipia long dispela ples nogut o em katim sampela diwai o bus nabaut long hap o em i mekim sampela samting long dispela ples nogut we i mekim belhat long ol spirit bilong ples nogut ya.

Sapos em i tok yes olsem em i mekim sampela samting long ples nogut, bai ol lain long ples i traim sampela kain rot bilong go bek tok tok wantaim ol spirit ya na mekim bel bilong ol i kol na isi bikos long kros bilong ol.

Planti ples i gat kain kain we na pasin bilong tok tok wantaim ol spirit long mekim ol i wanbel na stretim hevi bilong ol pipel o stre-

tim sik ol i kamapim long man bilong ples.

Wanpela pasin bilong mipela em long pulapim abus, kaikai na nupela bilum na kisim i go long hap dispela nogut i stap. Nau mipela bai hangamapim bilum ya wantaim ol kaikai na abus long hap diwai na mipela bai i go sanap long sait na mekim singaut i go long ol dispela spirit bilong ples nogut ya.

I gat singaut bilong dispela samting na mipela i save singaut long ol spirit ya i mas sori long man ya na lusim sik bilong em. Mipela bai kolim ol nem bilong tumbuna na famili bilong dispela sikman na tu nem bilong ol lain papamama na kandre ol i stap wantaim long nau. Dispela em long tokaut olsem sikman ya i no bilong narapela hap. Em i wanpela famili bilong yumi yet. Tasol bikos em i yangpela man na ol spirit i no klia gut long em na mekim sik long em.

Sapos singaut bilong mipela i winim bel bilong ol lain spirit ya bai mipela i lukim bilum kaikai wantaim ol abus ya i lus nating long han bilong diwai ya. Dispela em soim olsem ol spirit ya i wanbel olsem na ol i kam kisim kaikai bilong ol na ol i lusim sik ol long man ya.

Taim mipela i go kamap long ples, mipela bai lukim stret olsem sikman ya i orait pinis na em kirap sindaun na kaikai i stap long haus.

Mi yet i no lukim long ai o harim long ia long pasin bilong go singautim ol spirit long mekim wanbel wantaim ol. Tasol mi save lukim tasol sikman i save kamap orait na sindaun gut gen.

I gat ol ples nogut mipela i gat we mipela i no ken mekim nabaut long ol bikos bai mipela i kisim hevi.

Mipela i gat wanpela maunten we ol lain long ples i save tok em i

maunten bilong harim tok. Dispela maunten i gat ol naispela diwai bilong wokim haus na ol bus rop na lip bilong stretim sik bilong ol sikmanmeri. Tasol i hat long katim bikos em i ples bilong ol man (spirit). Dispela maunten i save klin olgeta taim. Sapos yu go klostu, bai yu ken lukim long as bilong ol diwai we i nogat lip bilong diwai i pundaun. Ples ya i save klin olgeta taim. Olsem na ol ples lain bilong mi i save tok ol man bilong dispela ples i save klinim haus bilong olgeta taim.

Nogat wanpela man i save tromoi ston o katim diwai o ronim abus long dispela hap maunten long bipo i kam inap nau. Tasol ol pipel i tok dispela maunten i save harim tok bikos maski em i mekim man i sik, kwiktai em bai mekim man ya i orait taim ol lain bilong sikman ya i go singaut long em hariap.

stori long ples tu i tok taim ol yangpela i laik go pilai spot, ol i save singaut long ol spirit bilong dispela maunten long go wantaim ol na go pilai spot. Ol lain long ples i save stori olsem taim ol i singaut pinis na ol i go pilai, i nogat wanpela tim i save winim ol. Bikos ol i save pilai wantaim ol lain spirit bilong dispela maunten.

I gat arapela bus o wara bilong painim abus. Ol lain bilong mipela long ples i save laik raun, long bus na wara bilong painim abus. Na ol i save gut long tumbuna stori bilong mipela long wanem bus o wara bai yu ken painim abus. Yu mas redim yu yet gut tu long mekim dispela wokabaut i go long bus o long het bilong wara. Ol lain long ples i mas wanbel o ol pikinini na meri i noken askim yu long wokabaut bilong yu.

Taim yu wokabaut i go, yu mas tingim tu long wanem hap bus o han rot we tumbuna bilong yu i save go long en. Sapos yu bihain-



• Pukpuk long sampela hap bilong Sepik provins em makim ol spirit o birua. Ol i gat kankain stori bilong ol tu.

im dispela rot bilong tumbuna bilong yu na kamap long dispela hap tumbuna bilong yu i save kisim abus long en bipo, yu dispela man bai i laki long painim planti abus.

Sapos yu abrus i go long narapela hap bus o wara, yu bai i no inap laki. Wokabaut bilong yu long bus bai i abrus tru we yu i no inap painim wanpela abus.

Sampela taim, sapos yu nupela man na yu i no save raun long dispela bus o wara bipo, yu bai laki man tru long painim moa abus winim ol arapela lain yu go wantaim ol. Bikos olgeta arapela lain i save i go i kam olgeta taim na ol i kisim inap abus bilong ol pinis. Olsem na ol spirit bilong bus o wara i ken haitim abus long ol arapela lain na givim long yu dispela nupela man tasol.

Insait long pasin na sindaun bilong yumi long Papua Niugini, yumi i gat dispela kain samting i stap long wanwan ples bilong yumi. Na yumi save was na lukaut gut long no ken abrusim lo bilong dispela bus o wara o maunten bikos yumi bilip olsem i gat man o spirit i stap long ol dispela hap.

Sapos yumi ken skelim gut dispela bilip bilong yumi long ol dispela spirit, yu ken lukim olsem i gat pret na rispek i stap long bel na tingting bilong yumi long ol dispela samting bilong bus. Ol dispela samting o ples tambu i hap bilong laipstail bilong yumi long ples na komyuniti. Maski man i ting em bai go fowet tasol olgeta taim bikos long strong na save bilong em. Tasol i gat dispela kain samting tu i stap long mekim mani kik bek na daunim em yet long komyuniti.


Wankain olsem sapos yu skelim long pasin bilong buk baibel na stori bilong bilip long God papa. Yumi mas pret long em na bilip long em tasol olsem God bilong yumi na olgeta samting. Sapos

yumi gat hevi olsem sik o birua o arapela hevi insait long laip bilong yumi, yumi ba prea long God long helpim yumi na yumi orait long dispela sik bilong yumi. Sapos yu wokabaut long wanpela hap we yu no i no save long en na nogat man i save long yu, yu mas prea long God i strongim yu na yu no ken pret.

Dispela tupela samting em i bilip bilong yumi man. Kain pasin na rot yumi save pret long ol spirit bilong bus o maunten o wara o wanem kain hap, buk baibel tu i tok long yumi mas i gat wankain rispek na bilip na pret long God.

Tasol bilip long stori bilong buk baibel i olsem nupela samting we i kam long sosaiti bilong yumi bihain. Ol waitman i bin karim i kam long skulim na lainim yumi long lusim olpela bilip bilong yumi na kisim nupela bilip we i gat amamas bilong em i stap long taim na oltaim long bihain. Na dispela i traim long brukim na senisim olpela pasin. Tasol sapos yu skelim gut, pasin bilong bilipim olpela pasin o bilip i save strong yet. Bikos em i bin kam long ol blut tumbuna bilong yumi long bipo i kam inap long nau. Na dispela bilip na pasin o pret i stap strong long bel na tingting bilong yumi tude bikos long dispela bilip bilong famili stat long tumbuna i kam inap nau.

Dispela em kalsa na tumbuna stori bilong yumi olgeta manmeri bilong PNG na yumi bai i stap wantaim em olsem. Ating wanpela taim bihain, bai dispela bilip na pret o rispek bilong ol spirit na masalai bilong bus bai pinis olgeta. Dispela em bihain taim we lotu i go strong moa na olgeta manmeri long PNG i kisim gutpela edukesen (skul). Dispela em taim yumi tok long nupela moden Papua Niugini long bihain taim.



• Yanpela manki Manus ya i save gut tru long paitim garamut.

Mama Koieba brukim rekot bilong Angliken Mamas Yunien . . . 9-pela yia stap olsem presiden

HELEN REI i raitim

MAMA Leila Koieba i bilong ples Gona insait long Oro provins. Em i meri bilong Caedmond Koieba, husat i Angliken pater long Holi Famili Sios long Hohola.

Mama Koieba i holim wok olsem presiden bilong Angliken Mamas Yunien insait long Pot Mosbi daiosis long 9-pela yia.

Long las wik, Fraide Novemba 8, wanpela seremoni i bin kamap long peris sios we insait long dispela seremoni Mama Koieba i bin givim sia bilong em i go long nupela presiden, Wendy Soaba.

Hia em stroti long wok bilong em wantaim Angliken Mamas (Mothers) Yunien grup long Nesenel Kapitel Distrik.

Mama Koieba em i kamap olsem namba 4 meri long holim dispela wok stat long taim ol bin kirapim Angliken Sios Mamas Yunien muvmen long kantri. Dispela posisen em wanpela meri i save holim insait long tripela yia na bihain ol i save holim ileksen bilong makim nupela presiden. Tasol long sait bilong Mama Koieba we ol i bin makim em long dispela posisen long

1986 i narakain liklik. Bikos long tupela ileksen we ol i holim long makim nupela meri bihain long tripela yia bilong em i pinis, ol i bin makim em tasol inap long dispela taim nau we Mama Koieba i strong long pinis na givim sans i go long narapela yangpela mama long kisim, go pas na go hetim wok bilong Angliken Mamas Yunien.

Bihain long wanpela wik woksop long Holi Famili Sios, ol meri husat i bin stap insait long dispela woksop i bin holim wanpela ileksen long makim ol nupela eksekutiv bilong Mosbi daiosis yunien.

Wendy Soaba i bin kisim namba long winim posisen bilong presiden long kisim ples bilong Mama Koieba. Seketeri em Alice Agapie na tresera em Cymberly Awui.

Long Janueri nekis yia, ol nupela eksekutiv bai statim wok bilong ol.

Mama Koieba i tok long taim em bin stap olsem presiden, wanpela samting we em i bin laik lukim i kamap em long kisim ol Mamas Yunien memba i go lukluk raun long Australia. Narapela samting tu em long sanapim haus we ol mama na meri i ken stap long en long taim ol i go kam long Mosbi long sotpela taim. Kain haus ol i kolim long trensit haus na em bin laikim ol i wokim long Begabari estet long Waigani.

Namba wan driman bilong em i karim kaikai pinis long las yia taim Mama Koieba wantaim wanpela Mamas Yunien grup bilong Mosbi i go long Kwinslen na Nu Saut Wels long Australia long lukim na skelim kain laipstail bilong ol pipel husat i gat narapela kain kalsa long ol pipel bilong PNG. Dispela lukluk raun bilong ol i bin kisim tripela wik.

Mama Leila husat i gat 4-pela pikinini i stat pinis long namba tu samting we em i laik lukim i kamap long helpim ol meri. Dispela em long wokim dispela trensit haus. Wok bilong kamapim sampela mani long kirapim dispela haus i stat pinis na nau em i wok bilong nupela eksekutiv long go hetim. Mama Koieba i tok mak bilong mani we ol i lukluk long kisim em namel long K40,000 na K50,000. Ol i kamapim pinis K2,000.

Ol meri i wok insait long wanwan peris bilong ol tasol taim dispela haus i pinis, ol mama bai holim ol woksop, lainim samap na kisim skul long kukim kaikai na tu go hetim ol trening program bilong ol. Em i tok tu olsem ol bai holim ol marit kaunseling na ol arapela wok long helpim ol famili long sindaun bilong ol i mas stap gut.

"Mi laik lukim olsem Mamas Yunien i karimaut ol autris na pastoral kea program. Mi laikim tu ol mama i wok strong long go lukim ol siklain long haus sik, karimaut Sande skul, komyniti sevis na rilises tising. Taim mi lusim sia bilong presiden, mi laik lukim olsem husat i kisim ples bilong mi i go hetim ol dispela wok," Mama Koieba i tokim Laipstail.

Taim em i bin kisim dispela wok long namba wan taim long 1989, em bin laik hevi i stap wantaim ol lain husat i holim lidasip posisen. Tasol taim em i tekova, senis long dispela i kamap na nau i gat tim spirit we ol meri i save wok gut wantaim wanpela na arapela.

"9-pela yia bilong mi olsem presiden bilong Mamas Yunien i bin gutpela taim tru. Na mi amamas long tok olsem mi bin mekim ol wok na samting long helpim ol mama insait long daiosis. Nau ol arapela grup bilong ol arapela sios i luksave long Mamas Yunien bilong mipela," Mama Koieba i tok.

Em i givim bikpela tok tenkyu i go long ol eksekutiv na ol mama husat i bin wok gut long helpim na kamapim ol gutpela wok insait long yunien bilong ol. Em i laikim dispela gutpela wok long go het na ol mama i givim wankain helpim i go long nupela

eksekutiv.

Em i tok em bai go het yet long wok wantaim yunien bihain long em i pinis olsem presiden. Ol i makim em pinis olsem kodineta bilong trensit haus prosek na tu vais presiden bilong Agliken daiosis long PNG Angliken Mamas Yunien.

"Wok bilong Mamas Yunien i wok long gro. Mi amamas tu long lukim planti yangpela meri i joinim yunien olsem ol asosiet memba bikos long pastaim i gat dispela kain tingting we ol yangpela i lukim yunien olsem asosiesen bilong ol lapun mama. Nau dispela i senis na planti meri husat i holim ol kain wok i kamap olsem memba bilong Matas Yunien long dispela taim," Mama Koieba i tok.



• Wanpela memba bilong Mamas Yunien i holimpasim Mama Koieba (raithan) long soim amamas na wari bilong em insait long seremoni i kamap long las wik Fraide.



- Locally produced
- Virtually unbreakable
- Resealable (screw on caps)
- Big Thirst Buster for the biggest man or family



NEW 1 LITRE
Coca-Cola
BIG ON THIRST
BIG ON TASTE
BIG ON VALUE

BIG THIRST BUSTER



Bik Bro

REBO

OLGETA MANMERI LONG OPIS I AMAMAS LONG LUKIM EM...

AAH, REBO! MIDELA OLGETA AMAMAS TRU, LONG LUKIM YU!

TENKIU TRU!

OL I KAM NA SEKHA WANTAIM EM...

MI AMAMAS TRU LONG YUPELA OLGETA... LONG BELO, OLGETA GO LONG TREVOLDS, MI SALT!

REBO WOK I STAP NA FON I RING ...

KINNG!!

!?!

MONING, REBO, HIA!

MONING, REBO! EM MI YAH, M.D.* KONGRETULESEN LONG PILAI ASTE, BENK I AMAMAS TRU LONG YU!

* MENEJING DAIREKTA

...ER INAP YU KAM LUKIM MI LONG OPIS BILONG MI?.. MI WETIM YU!

OKE, BOSS.. MI KAM NAU!

Igo moa Neks Wik!!



SIPAK MAIK

FULL-HAUS!!! GO! GO BEIBI!!

KOLEKT MASIN 5, HARIAP!

ER, BRO... MASIN 5 I BAGARAP NAU TASOL... NO KREDIT..

MAIK ILAK GIAMAN TASOL NOGAT...

MASKI LONG BULSIT!! MI WESTIM K50 LONG MASIN, YA!

YU WET!! BAI MI GO TOKIM OL WANTOK BILONG MI I KAM NA...

ORAIT! ORAIT! BAI MI GIVIM YU MONI!

"EM YAH! KISIM DISPELA FRI HUNDRED KINA!"

EM NAU!

INO LONG TAIM NA WANPELA MASIN I GIVIM FULL-HAUS

OH-NO! NARAPELA FULL-HAUS GEN!

AIVOO!! FULL HAUS YAH!! AIVOO!!

Igo moa Neks Wik!!



IVAN BAYAGAU i raitim

GAVMAN i putim kamap pinis tupela mun kefiu insait long kantri we i bin stat long las wik Fraide Novemba 8.

Astingting na gavman i putim kamap dispela tupela mun kefiu em long daunim ol raskol pasin we long nau yet i wok bikpela tumas insait long ol bikpela taun na siti olsem long kantri olsem Pot Mosbi, Lae na Maun Hagen.

Arapela astingting tu em long holimpasim ol raskolman na putim ol i go insait long haus kalabus long mekim ples i klin na fri long ol raskolman bipo long 1997 ileksen i kamap.

Planti pipel, insait long pablik sekta, praiwet sekta na tu ol manmeri nating long pablik i wok long tok olsem kefiu i gutpela tasol bai daunim lo na oda hevi insait long sotpela taim tasol. Ol i tok i gat ol gutpela rot i stap we gavman i ken yusim long daunim lo na oda hevi. Bikos i gat as na ol yangpela pipel i wok long go insait long mekim ol raskol na ol arapela bikhet pasin.

Wanpela yangpela man husat i gat dispela kain tingting

Sapos mi praim minista bilong PNG

na bilip em wanpela man Wabeg insait long Enga provins. Nem bilong man ya em Michael Megen.

Michael i stap long Mosbi siti na i no wok. Tasol em i no save mekim ol raskol pasin long sapotim laipstail bilong em long Mosbi. Em i save salim buai wankain olsem planti arapela pipel i save mekim long kisim mani long lukautim em yet.

Dispela yangpela man Wabeg i tok:

Sapos mi praim minista, mi bai lukluk long daunim prais bilong ol samting long stua na maket. Mi bai lukluk tu long

daunim kos bilong ol sevis we nau yet i dia tumas.

Ol raskolman i save brukim stua, hensapim beng na ol bikpela bisnis haus long stilim mani long baim kaikai, helpim famili bilong ol na amamasim laip bilong ol. Ol yangpela man i mekim ol stilpasin bikos gavman i no givim gutpela helpim na sapot long ol.

Arapela samting mi bai mekim sapos mi praim minista em long putim moa mani i go insait long rihebilitesen wok insait long olgeta haus kalabus insait long kantri. Mi bai lukim olsem olgeta haus kalabus i

mas i gat rihebilitesen progrem, na dispela progrem i mas ron na wok gut wantaim gutpela fainensal helpim i kam long gavman bilong mi.

Wanpela arapela samting mi bai katim potnait mani na tu ol arapela alauwens bilong olgeta memba long palamen. Dispela i min olsem stat long mi yet olsem praim minista i go daun inap long ol bekbensa long ploa bilong palamen. Ol dispela mani gavman bilong mi bai yusim long givim fri edukesen i go long olgeta sumatin insait long kantri. Bikos developmen

bilong kantri i stap long ol gutpela savemanmeri.

Arapela samting mi bai lukluk long gavman bilong mi i mas mekim em long developim ol rurel eria. Dispela i min olsem gavman bilong mi bai putim bikpela mani i go long developim ol rurel eria. Mi tok ya, developmen i mas stat long ol rurel eria na bihain kam aut long ol eben senta. Taim dispela i kamap, ol yangpela pipel na tu ol arapela pipel bai no inap lusim ples na kam aut long taun. Ol bai stap long ples bilong ol.

Nem: Paisa Abbao
Adres: P O Box 1265, Goroka, EHP
Save Laikim: Pilai ragbi lig, soka, go lotu na singim ol gospel singsing na mekim pren.

Nem: Peter Sing
Krismas: 27 (man)
Adres: Portion 1282, Section 16-Barema, Biialla, WNB
Save Laikim: Wokirn gaden, go lotu, tok pilai, harim gospel musik na raitim pas long ol pren.

Nem: Rebecca Afia
Krismas: 17 (meri)
Adres: P O Box 36, Biialla, West New Britian Province
Save Laikim: Raitim pas long ol pen-pren, go lotu, waswas long solwara, go skul, pilai volibal, basketbal na sof-bal. Mi promis long bekim pas bilong olgeta husat i rait long mi.

Nem: Mike Donode
Krismas: 15 (man)
Adres: Avi Community School, P O Box 35, Mt Hagen, Western Highlands Province.
Save Laikim: Pilai basketbal, tas ragbi, ritim buk baibel, singim lotu singsing na ritim ol kainkain buk.

Nem: Polly Gunawi
Krismas: 14(meri)
Adres: Boroko Comm. School, P O Box 144, Wewak ESP.
Save Laikim: Harim musik long redio na mekim poroman.

Nem: Denmark Upio
Krismas: 15 (meri)
Adres: Tairora Provincial High School, P O Box 60, Kainantu, EHP
Save Laikim: Harim redio, lukim vidio, pilai netbal, ragbi tas na harim lokal musik.

Nem: Philip Wangu
Krismas: 28 (man)
Adres: P O Box 1642, Lae, Morobe Province
Save Laikim: Go lotu long Sabbath, harim lotu singsing, lukim TV, na lukim pilai soka na ragbi lig. Mi laikim pen-pren husat i save lotu long Sabbath(man o meri Musau Ailen.

Nem: Matilda Malken
Krismas: 18 (meri)
Adres: P O Box 79, Maprik, ESP
Save Laikim: Mekim fani, harim pop na reg musik, pilai sofbal na volibal, ritim buk, go lotu na raitimpas.

Nem: Benny A
Krismas: 21 (man)
Adres: BP Boroko, P O Box 5873, Boroko, NCD.
Save laikim: Go lotu na singsing ol lotu singsing wantaim ol pren, laikim musik, lukim ragbi, tok pilai na gat bikpela tingting long maritim gutpela meri.

Nem: Serah Top Zera
Adres: Margarima High School, P O Box 33, Meni, SHP
Krismas: 16 (meri)
Save Laikim: Go lotu, pilai, mekim fani, go waswas wantaim ol poroman



na mekim poroman

Nem: Asbin E. Manta
Krismas: 18 (man)
Adres: P O Box, 1640, Lae, Morobe Province
Save Laikim: Pilai gita, volibal, soka, raitim pas long ol pren.

Nem: Eugene K. Moroni
Krismas: 22 (man)
Adres: c/o Lillian Sanapi, Vanimo Forest Products, P O Box 41, Vanimo, Sandaun Province.
Save laikim: Lukim vidio, raitim leta, pilai wantaim ol poroman, pilai volibal na raun wantaim ol mangi.

Nem: Jeffrey Kanai
Krismas: 21 (man)
Adres: Wewak Hill Catholic Mission, P O Box 508, Wewak, ESP
Save Laikim: Go lotu, ritim baibel, harim musik, lukim TV na pilai soka.

Ovasis Penpren

Raitim pas long dispela ol penpren aninit long tok Inglis tasol

Nem: Selma Abban
Krismas: 25 (meri)
Adres: P O Box A-55, Adisaadel, Cape Coast, Ghana, W/A
Save laikim: ol enimel na ol plaua bilong bus, pilai spots na raun nambaut.

Wanpela Adres tasol bilong ol 4-pela manmeri ya.
Adres em: P O Box 487, Agona Swedru, Ghana, West Africa

Nem: Ibrahim Molan
Krismas: 22 (meri)
Wok: Stailim gras bilong ol man na meri
Save laikim: waswas long wara na solwara na lukim ol seksi muvi.

Nem: Janfaru Jenifa
Krismas: 20 (meri)
Wok: Mekim klos
Save Laikim: Lukim olgeta muvi, na pilai wantaim bal.

Nem: Moses Malam
Krismas: 25 (man)
Wok: Samapim klos na laplap
Save Laikim: Soka, lukim muvi na pilai spots

Nem: Joseph Ibrahim
Krismas: 30
Wok: Pawa lain man
Save Laikim: waswas long solwara na war na pilai soka.

Yu ting wanem long Kefiu?

KEFIU o tambu long ol manmeri i raun long nait long olgeta hap bilong kantri i stat las wik Fraide na bai stap i go inap long pinis bilong mun Janueri, 1997. Taim gavman i tokaut olsem bai i-gat kefiu long olgeta hap bilong kantri, planti ol lida, ol bikmanmeri nambaüt i mekim kainkain toktok egensim na tu sampela i sapotim dispela aidia. Ol grasuts manmeri tu i gat tingting bilong ol yet. Sampela i egensim kefiu na sampela i sapotim.

YU TING WANEM LONG KEFIU? Em askim *Wantok Ripota RODNEY KAMUS* askim sampela man long givim tingting bilong ol long telipon.

Mosbi: Joe Kanekane, wanpela ripota wantaim Independent niuspepa long Mosbi i tok olsem, i gutpela tru long kefiu long kamap long wanem dispela i katim daun liklik ol raskel pasin i wok long kamap insait long kantri nau.

"I nogat wanpela moa rot bilong stopim ol dispela pasin nogut. God papa tasol i ken stopim dispela raskel pasin. Olsem na i gutpela long gavman long kamapim dispela kefiu long olgeta hap bilong kantri. Yumi mas amamas tu long wanem dispela kefiu em sotpela taim tasol long mak bilong tupela mun.

Wewak: DEREK Maira, wanpela man Morobe husat i wok long Wewak i tok olsem, dispela kefiu i gutpela long wanem, olsem gavman bilong tudei, ol i mas painim olgeta kain rot long stopim o daunim liklik dispela ol trabel i wok long kamap. Tasol em i tok olsem kefiu i no bin stap long baset bilong gavman. Na gavman i kisim mani bilong mekim ol narapela wok developmen long mekim dispela wok we i no gutpela. "Nau yet kantri i gat hevi long mani na gavman i kisim mani bilong ol narapela wok long mekim dispela kefiu i kamap tru."

Tasol long narapela sait, mi sapotim gavman bilong tudei long mekim dispela kefiu i kamap tru.

Rabaul: Jonathan Misiel, wanpela mangi husat i wok wantaim Vunadidir Komyuniti Gavman long Is Nu Briten i tok olsem kefiu i gutpela long wanpela sait tasol long wankain taim tu i no gutpela. Em i tok olsem dispela tupela mun kefiu long olgeta hap bilong kantri em gavman i mekim gutpela disisen long kamapim long wanem dispela bai daunim liklik ol lo na oda hevi. "Dispela kefiu em bai stopim ol man long mekim trabel long nait olsem kilim man o bagarapim meri. Tasol em bai ino inap long stopim ol stil pasin i wok long kamap nau. Nau yet yu ken lukim olsem ol pasin bilong hensapim ol man, bisnis haus na ol benk i save kamap long bikpela san. Dispela pasin i no save kamap long nait. Olsem na long tingting bilong mi yet, kefiu ya i bai ino inap tru long stopim dispela ol samting we i kamap long san. Ol samting bilong nait tasol bai ol i stopim tasol ol raskel pasin bilong san em bai hat liklik long ol long mekim.

Lae: Chris Namse, wanpela mangi Sepik husat i stap long Lae i tok olsem i nogat wanpela rot moa em ol bai gavmani i ken stopim dispela ol raskel pasin i wok long kamap. Olsem na gutpela long ol kamapim dispela kefiu long stopim o daunim liklik raskel pasin. Kefiu i gutpela long wanem ol bikhet manmeri nambaut bai pret long dispela samting na sindaun isi long haus long taim bilong nait. Taim nogat kefiu, planti man i save gat fridom long raun long nait na mekim kainkain pasin. Sampela gutpela manmeri husat i save wokabaut long nait i save kisim taim long han bilong ol man nogut. Tasol long sait bilong mani, mi bilip olsem gavman bai

westim bikpela mani long dispela wok. Dispela mani em bilong mekim ol narapela developmen wok tasol long bikhet pasin bilong yumi ol manmeri tasol long kamapim ol raskel pasin na gavman i rausim dispela mani i go long stopim lo na oda hevi.

Mt Hagen: Mamos Sabub husat i save stap na wok long Hagen i tok olsem dispela kefiu em i gutpela tru long wanem em bai stopim ol raskel pasin i wok long kamap tudei. Em i tok olsem gavman i gat gutpela tingting long mekim dispela wok na em i sapotim tru. Tasol em i tok olsem lukluk long ples em i stap long em nau yet, i nogat planti birua i save kamap nau yet long wanem ol i pasim bia long Hagen na sampela ol narapela senta insait long hailans rijin. "Bia ol i pasim tasol long sait bilong ol traibel pait na kilim man i dai nating mi ting olsem kefiu i moa gutpela long stopim ol trabel i save kamap long nait." Em i tok moa olsem long PNG, planti ol raskel pasin i save kamap long san em long sait bilong stil na hensapim ol man, benk na ol narapela bisnis haus. Sapos gavman i gat gutpela tingting na mekim kefiu long san we ol wokman tasol i ken raun bai moa gutpela. Ol husat ol man na meri i gat wok long mekim i ken raun long ol taun. Dispela em bai stopim tu ol stil pasin em ol raskel i save mekim long san taim.

Maski kainkain man i gat wanem kain tingting, gavman husat i gat pawa bilong ol pipel i bilip olsem dispela kefiu i moa gutpela long daunim ol raskel hevi i wok long kamap nau yet insait long kantri. Dispela kefiu i gutpela long wanem em bai stap inap long tupela mun tasol long taim bilong krismas we planti manmeri i save kisim holidei bilong ol. Dispela bai helpim tru olgeta manmeri long sindaun amamas gut wantaim femeli bilong ol long dispela taim.


TOKSAVE:

Long Oktoba 10, 1996 long Wantok Namba 1163, nem bilong tupela meri i bin kamap long penpren seksen. Nem bilong tupela meri ya em Monica Peter na Jennifer Peter. Tupela meri ya i bin yusim adres: P O Box 4948, Boroko, NCD.

Wantok niuspepa i kisim wanpela pas long wanpela man husat i tok olsem dispela adres tupela meri ya i yusim em adres bilong em. Na man ya i laikim olsem husat manmeri i laik rait long tupela meri ya, ol i noken yusim adres bilong em long rait long tupela. Bikos tupela meri ya i yusim nating adres bilong em. Man ya i tok bihain long nem bilong tupela meri ya i kamap long penpren seksen long Wantok, em i kisim planti pas long pos opis bokis bilong em.

Man ya i askim nau long ol lain husat i painim penpren long noken yusim adres bilong em long raitim pas long Monica Peter na Jennifer Peter.

Tenkyu tru
 EDITA



• Polis operesen bai go het long tupela mun.



■ Lapun Kanage i go Tok Pisin raun long Manus taun i stap na wanpela guttaim prenmeri bilong em i bungim em. Dispela guttaim prenmeri ya, tupela Kanage i bin pren gut tru na promis long tupela bai marit. Tasol sampela asua na hevi bilong graun i mekim promis bilong tupela i wara nating. Olsem na tupela i luslain na stap i go na Kanage i maritim arapela meri na prenmeri i go maritim arapela man.

Taim meri ya i luksave long Kanage, em i wok-abaut isi tasol i go na holimpasim em. Maski planti manmeri i bung na stap, meri ya i no sem o i gat tupela tingting, em i putim wanpela tingting tasol na i go holimpasim lapun Kanage.

Taim lapun Kanage i pilim olsem tupela han i holimpasim em, boi tanim kwiktai. Tru tumas, ai bilong em i no bilip long pes em i lukim. Yu save, samting bilong sore ya. Olsem na tupela wantaim i lusim aiwara.

Bihain nau lapun Kanage i tokim guttaim prenmeri bilong em: Ol samting bilong bipo mi tingim yet. Sapos yu bungim mi 10-pela krismas i go pinis, tru tumas, ating mi inap brukim marit bilong mi.

Guttaim prenmeri bilong Kanage i harim olsem na tokim Kanage: Kanage, yu ting olsem yu lapun pinis. Tasol long ai bilong mi, olgeta samting i stap wankain yet long yu na tu strong bilong wok i no lusim bodi bilong yu.

Lapun Kanage, MANUS

■ Kanage i stap long Goroka na wok long Melanesian Institut. Wanpela apinun em i pinis wok na i go long pilai pokis long Bird of Paradise Hotel. Em i pilai i go na winim K300. Taim em i winim dispela K300, wan tu em i tingting long mekim wanpela samting long Red Kona maket na em i wokabaut i go.

Em wokabaut i go kamap long flet bilong PNGBC na ol yangpela meri i stap long flet i kirap na singaut i go long em na tok: Kanage yu karim ya.

Kanage harim olsem na bekim: Mi no karim planti, K10 tasol. Sapos yupela inap long givim K8 senis bilong mi bek, mi ken bringim i kam.

Taim Kanage i tok olsem, wanpela meri Tolai i kirap na tok: Yu yet save long prais, kam tasol na rot i no pas.

Kanage harim meri Tolai ya i tok olsem na em i tromoi tok i go long em: Ating wanpela bikipela masin bilong Woks dipatmen i mas stretim rot gut tru ya, olsem na rot i op tasol na stap.

Maunten Mangi Pyka, GOROKA

■ Kanage i go raun long Lae maket na lukim wanpela yangpela meri bilong Tami Ailan long Finsafen. Taim Kanage lukim i sasaitim meri Tami, olgeta waia bilong em i kuk olgeta.

Turangu, em bai mekim wanem. Tasol em pikinini bilong papa ya. Em kisim strong bilong ol bubu na wokabaut i go na tokim meri Tami: Plis, mi lukim yu na mi laikim yu stret ya. Bai yu tok wanel long askim bilong.

Meri Tami harim olsem na kirap tokim Kanage: Gupela askim bilong yu, i gupela tasol ol brata bilong mi i pasim mi long mi noken marit. Long wanem ol bikipela asua bilong mi i marit longwe longwe na i nogat man bilong lukautim tupela lapun.

Kanage sanap na tingting i go nogat na tokim meri Tami olsem: Sapos i hat long yu lusim ples orait yu tok stret na mi bai brukim kastom bilong mi na dai long ples bilong yu.

Robert Hamiako, IGAM BAREKS

■ Kanage i bilong Maprik long Is Sepik provins. Dispela man Kanage em i wanpela kain man yet. Ai nogut na wanpela man bilong mekim planti trabel tumas.

Wanpela taim bikipela pait i kamap insait long ples bilong em Hengwenif. Pait i bin kamap long nait na Kanage i ting olsem em i fit inap tru long pait. Kanage kirap tasol na i no westim taim, em i stat long tromoi lek han i go i kam. I no longtaim na Kanage i kisim bikipela pes solap tru-bikos em ai nogut man tu ya.

Kanage belhat na kirap tokim dispela man husat i solapim em: I orait, nait na yu hambak, tumora moning tu pes tu.

Kanage i laik tok "pes tu pes" tasol maus i popa-ia.

Wawen Heps, KIMBE


Man tru i tanim olsem pisin

Bipo bipo tru mipela i gat wanpela pisin olsave stilim ol pikinini. Nem bilong em, Masiahagai. Em i wanpela posin tru, olsem tarangau. Tasol, em i wanpela man tru i tanim olsem pisin.

Orait, wanpela de tupela nupela marit i gat nupela bebi. Tupela i go long wok long gaden. Na tupela i hangamapim klostu long tupela na nildaun na mekim save long wok.

Taim tupela i nildaun long wok gaden, dispela bikipela pisin i isi tru i kam na autim pikinini wantaim bilum. Em i autim hairap tru na i karim em i flai go. Tupela marit i lukim olsem na ol i krai singaut na tok, ai, yu karim bebi bilong mitupela i kam bek. Tasol pisin ya i no harim tupela. Em i flai i go antap long wanpela bikipela diwai talis. Tupela marit i singaut singaut i go na nek bilong tupela i sot. Tupela i sanap tasol na stat tromoi han. I go i go na han bilong tupela tu i tait. Tupela i stap i go inap tudak i kamap na tupela i go long ples na slip. Bebi ya i wok long krai long susu. Na pisin i wok long giaman givim em kain kain kaikai. Tasol liklik bebi i no pinis krai.

Bihain em i go i givim bol bilong em long bebi ya. Em nau, bebi i pinis krai. Em i sidaun isi na pilai toktok i stap. Tupela stap i go sampela yia bihain na bebi ya i kamap wanpela draipela yangpela man tru. Taim em i kamap bikipela pinis, em i askim papa bilong em olsem, Hey papa, mama we? Papa bilong em i tok, mama biong i dai pinis taim yu liklik yet. Em i kirap na askim gen papa bilong em, na papa, mi kaikai wanem na mi kamap bikipela. Papa bilong em i tok, yu lukluk i go long hap. Em gaden bilong mi i stap long hap. Yu ting yu bikipela nating. Man ya i amamas tru long papa bilong em. Na em i wok long bihainim ol han bilong diwai talis i go i kam olsem ples graun tru long em.



Bihain em i askim papa bilong em, hey papa, bai mi sidaun we na kom? Na papa bilong em i tok, yu bihainim dispela han diwai i go long hap na sidaun komim gras bilong yu. Taim em i laik go daun na kom, em i lukim tupela yangpela meri i pulim apim wara i stap. Em i no bin save olsem piksa bilong em i kamap long wara ya. Bikipela susa i lukim piksa man ya insait long wara na man ya i luk nais tru. Olsem na namba wan susa i kirap hariap na mekim wara i dot. Em i pret, nogut liklik susa bilong em i lukim tu. Liklik susa i

kirap na helpim bikipela susa long mekim wara i doti. I go i go na taim tupela i larim wara i laik klia, tupela wantaim i lukim dispela man i sidaun lap long i stap. Tupela i kirap na ran i go long ples na tokim papa bilong tupela. Na tupela i askim papa tu olsem, papa inap long yu salim tok i go long ol lain bilong yu i kam katim daun wanpela diwai bilong mitupela. Mitupela i bin lukim wanpela gupela samting. Mitupela bai maritim gupela man. Na papa bilong tupela i kilim ol ol pik, pasim buai na brus salim i go long ol lain bilong em. Em nau na ol lain bilong ples bilong em i makim wanpela dei ol bai kam na katim daun dispela diwai. Dispela dei i kamap na ol i go long katim. Ol i katim dispela diwai i go i go inap sampela wik olgeta. Na taim dispela diwai i bruk, dispela man ya i kalap i go anit long ol lip bilong diwai na hait i stap. Ol man i wok long traim i go i tasol ol i no painim em. Na ol i kirap na lusim na i go long ples bilong ol. Na tupela

meri ya i hait klostu long as bilong dispela diwai. Tupela i stap igo igo klostu long apinun, man ya ting olgeta man i go long ples pinis. Em i kirap long ples em i hait long en na em i kam autsait. Em i kam na sidaun stret long as bilong diwai we tupela meri ya i hait i stap long en. Taim em i sidaun i stap, Tupela meri ya i kam isi tasol na holimpasim em. Man ya i tok, plis lusim mi go. Tasol tupela meri ya i tok, plis kam wantaim mitupela long ples bilong mitupela. Em i harim tupela na i go wantaim tupela. Ol i wokabaut i go long rot, na bikipela susa i askim liklik susa olsem, Husat bai maritim em? Mi o yu? Na liklik susa i kirap na tok, maski mitupela i lukim em wantaim. Oke, mitupela i mas maritim em wantaim. Tupela i wok long toktok kros i go kamap long papa bilong tupela. Papa bilong tupela ij skelim toktok i go i go na em i tok, Yu bikipela sua bai maritimem. Olsem na bikipela susa i maritim na liklik susa nogat.

Maritmeri strong long i laik paulim mia

save traim long mekim ol samting nabaut long lusim tingting long em. Tasol mi wok long tingting sapos wanpela samting i rong wantaim mi.

Bai mi mekim wanem samting bipo long dispela hevi i kamap moa bikipela?

MANIPULATED

Dia Pren,

Mipela i amamas long yu wok long traim long abrusim dispela meri na mipela i askim yu long go het yet long mekim olsem. Sapos yu wokabaut raun na yu lukim em longwe yet, wokabaut i go long arapela hap. Na tu traim long noken go insait long pasin bilong toktok wantaim em.

Sapos yu painim olsem yu no inap long mekim olsem bikos long kain pasin bilong meri ya long yu, yu mas tokim em olsem em i noken traim long traim bilip bilong yu. Tokim em long em i mas tingting long man na ol pikinini bilong em na i no long traim na trikim ol yangpela man olsem yu yet long slip wantaim em. Sapos em i no harim na bihainim toktok bilong yu, yu ken tokim em olsem yu bai tokim man bilong em long wanem samting em i wok long mekim long yu.

Mipela i ting olsem yu mas sanap strong long pasin bilong

yu na tu mekim yu yet klia long em. Man bilong em i ken bagarapim yu sapos em yet i painim aut long samting em i wok long mekim. Mipela i ting olsem yu luksave olsem yu ken bungim bikipela hevi sapos yu yesa na bihainim laik na tingting bilong em na mekim samting em i laikim. Bihainim ol filings bilong yu long em, mipela i no ting olsem i gat samting i rong wantaim o long yu. Olsem wanpela yangpela man, yu wok long tingting bihainim laik na tingting bilong wanpela meri long mekim pasin nogut.

Tasol, yu luksave tu olsem, olsem wanpela man we God i mekim long piksa bilong em yet, yu mas kontrolim ol laik na tingting bilong yu na i no long larim laik na tingting bilong yu, o ol lain lain, long kontrolim yu. Dispela em i wanpela hevi tasol sapos yu beten long God wantaim strong tingting na tu long lewa bilong yu, God i ken givim yu strong na helpim long abrusim o daunim ol dispela kain traim.

Yu ken helpim yu yet tu long

sait bilong trenim tingting bilong yu long tingting long stretpela pasin na rot olgeta taim. Baibel i tok olsem: Kisim olgeta tingting na mekim ol i mas bihainim Kraus na pulmapim tingting bilong yu long ol samting i gupela....rausim ol tingting we i nogut na i no gupela we bai i ken paulim tingting bilong yu.

Tanim ol tingting yu gat long meri ya i go long prea long em na famili bilong em. Wankain olsem mipela olgeta, dispela meri ya i gat nid long man i mas lavim em, long marit bilong em na tu long rilesensip bilong em wantaim God. Em i no kisim dispela lav we em i nidim olsem na em i laik kisim dispela lav em i nidim long sait bilong yusim ol arapela pipel.

Yu mas prea long em bai larim God long givim em kaikai bilong spirituel nid bilong em. Na em bai senisim ol pasin nogut bilong em na bihainim lo bilong God long lav-dispela em, givim long ol arapela, respektim ol na long i gat gupela na stretpela prensip.

Laiplain.

TOKSAVE:

Wantok i no kisim ol nupela laiplain stori long Laiplain Senta olsem na i wok long yusim dispela olpela stori we i kamap pinis. Mipela bai printim ol nupela stori taim mipela i kisim ol nupela laiplain stori long Laiplain Senta.

Tenkyu
EDITA

Kabwum memba plai long helikopta tumas

Dia Edita,

Mi wanpela yangpela man long ples mi sindaun na glasim wok blong memba bilong Kabwum i no stret liklik.

Long sapatim na strongim tok bilong brata Henry Tusa bilong Sapmanga. Mi laik tok olsem long dispela pas yu raitim long 3 Oktoba 1996 em tru tumas.

Mi laik putim sampela poin mi lukim i no stret tumas.

Ol taim mipela pipel bilong Kabwum i votim Ginson Saonu i go long palamen mipela wet yet long developmen long Kabwum. Planti bilong mipela i lukim olsem em spendim moni long sampela hap na dispela i no gutpela tumas. Mi laik mekim wanpela tok piksa, dispela rot long Komb na Inapagen o go daun long Langa bai kostim K60,000 to K70,000 long pinisim. Na tu dispela rot ol kampani ken wokim long 3 o 4 mun tasol.

Planti mipela laik save long las yia em bin kisim mani na putim we?

Luk olsem hap bilong dispela moni em yusim long flaim helikopta tumas, na hap em mas wokim ol video bilong kalsa long ol lain bilong Teptep istap. 1. Olsem nogat kalsa long Komba, Timbe, Sapmanga na Selepet.

2. Nao mipela lukim pinis, em wok long holim pasim moni bilong EDF, plis pipol bilong het wara Timbe, samanga, Teptep na Komba - Wamasam yupela mas ai op na lukluk gut, dispela em 100% moni bilong yupela long wokim rot, tasol em pasim sevis bilong mipela.

3. Mi sori tru long yupela Komba ol brata na susa, long independens em bin putim dispela hap palang long Daoga (sil) na i no putim K1 o K2,000 long pilai yupela i no pilai yet na tupela man long Sikam i bun buruk. Bikipela pait tru bin kamap namel long Sikam, Jndagen, Lamga, na Saume bin Kamap. Nau bikipela bruk tru i kamap long Komba eria na i go

kamap bikipela tru long dispela hap palang (sil) tasol. Mi sori olsem em laik kamapim biknem tasol bagarapim biknem bilong em na tu em tingting long brukim rekot bilong kampani nem long Daoga eria tasol em bin brukim na bagarapim nem bilong em. Yet. Husat nau bai bungim ol ples olsem Sikam, Saume na Langa wantaim Indagen, i hat nau.

4. Taim yumi laik skelim wok lida, dispela save kam long skel bilong God, i no skel blong man, yumi man save skelim 5 to 6-pela samting tasol God save skelim leva insait tu. Man inap long givim olgeta save, strong moni o wanem yu ken kolim i save go long ol pipol tasol God bai lukim yu inap givim olgeta bel bilong yu wantaim.

5. Wanpela tok Ginson Saonu mekim, taim em i go opim haus lotu long ples Kumbip em tok ol man i go long yupela lotu em ol mipela Kabwum mas lukim gut long dispela tok na skelim. Em ting em spik wisdom tasol em toktok tasol long ia bilong demoketrik PNG.

6. Mi laik tok olsem i go long ol ples olsem, Teptep, Samangam, Yalumet, Hetwara Timbe, Komba na Wemasam, yupela dispela hap eria, rot i no kamap yet na nao em laik kapsaitim moni long ol komiti bilong em nao, ol bai kaikai hait moni na pusim yupela long vot. Tasol plis skelim pastaim. Nau yu salim kopi stret long haus dua bilong yu? o kar i kam lusim kago long haus dua stret. Sore na sore tru long pipel ai i no op na askim long moni go we?

Sori pipel bilong Kabwum opim tingting na lukim.

Long pinisim dispela pas mi laik tok olsem yu husat Teptep, Sapmanga, Yalmet, Hetwara, Timbe Komba, Wesamab, yu ting olsem ka i go pinis long eria bilong yu orait yu mas egensim mi.

**Soringa Sileng
Kabwum, Morobe provins**

Kisim ol manki nating long ami

Dia Edita,

Mi wanpela manki husat i sapatim dispela pas bilong brata Kuato S Look i bin kamap long Wantok Niuspepa long 12 Septemba, 1996.

Brata ya i bin tok long kisim ol gret 6 long ami.

Plis, em tru gavman i mas lukluk

long dispela kam rot bilong givim sapat long ol grasrut manki.

Dispela i no wanpela opis wok, em bilong ganman tasol long ausait.

Kisim tasol mipela ol gret 6 na trenim mipela na salim i go long Buka.

**John Kerry
Pacific Sales, Kimbe**

Gavman noken mekim birua long wok bilong nius

Dia Edita

Mi laik mekim wanpela toktok bilong mi long tok bilong Prais Ministia i tok long bringim ol wokmanmeri long ol niuspepa long ba. Mi no amamas long dispela toktok, long wanem niuspepa em i olsem was dok o spai lain bilong ol pipel long lukim na ripotim wanem samting em gavman i mekim o kamapim long kantri we ol pipel i mas save long en.

Sapos nogat ol dispela ol man bilong lukim na ripotim ol dispela senis o wok kamap, olsem wanem bai ol manmeri long PNG i save long sindaun na laip bilong ol na wanem kain senis insait long kantri?.

Mipela olgeta man meri mas save long ol dispela samting o sevis i wok long kamap we em i gutpela o nogut. Dispela em i olsem fri kantri na olgeta manmeri i ken tok aut long wanem samting i wok kamap na rait o firdom bilong ol long toktok na save long wanem samting i kamap bikos long disisen bilong gavman. Nogut wanpela man o meri husat i wok long radio, tv o niuspepa bai i kamap long hat taim. Dispela em i no yuman rait. Dispela

em no stret long pablik, ol bisnis, skul, na olgeta lain insait long Papua Niugini husat i lukim na kisim helpim na save long wok bilong nius long radio, tv o niuspepa.

Olsem na tingting bilong mi em gavman i no ken pusim ol hatpela tingting bilong em i go insait long dispela gut-

Dia Edita

Mi tu mi sapatim ol komplek pas i kamap long Wantok long prais bilong samting long stua i go antap moa.

Gavman bilong Papua Niugini i mas glasim gut. I gat ol manmeri we sampela igat planti mani na sampela i no gat mani long kantri. Skelim na lukluk long tupela sait wantaim. Maski long wansait tasol na givim hevi long pipol long kantri nogat gutpela bisnis na save olsem narapela i gat.

Prais bilong stua i bringim hevi, wari, na komplek long wanem i bagarapim tru laip stail long pipol long ol taun na vilas.

Moa hat wok long wok moni tasol long baim wanpela samting tasol long stua bai i no helpim sindaun bilong pipol i kamap gutpela long kantri.

Yumi mas wok long mak, baim samting long mak na savim win moni long laip bilong yumi na long Kantri Papua Niugini we yumi mas stap amamas bai i gutpela.

Em tasol was bilong mi na husat i gat arapela tingting moa em laik tasol

Ottiro Rapo, Kubalia, Wewak

Sande em malolo de

Dia Edita,

Mi laik egensim pas bilong brata Paul Poro bilong Kabiufa long Goroka. Pas bilong brata ya i kamap long Wantok long septemba 12 1996. Pas bilong brata ya i tok egensim brata ya Paul E.P bilong Mendi.

Pas bilong brata ya Paul E.P. Pas bilong yu i tok long Sande em malolo de. Yes brata Paul E.P, pas bilong yu em mi sapatim na em i tru olgeta nau tete mi laik egensim brata Paul Poro, we pas bilong em i tok Sande em i no malolo dei. Brata mi laik tokim yu?" Yu lotu long wanem lotu na wanem malolo dei bilong yu. Mande,

**Dennis Yanu
Vanimo**

Fraide o Sarere em ol malolo dei bilong yu stret. Brata yu mas skelim pastaim na bihain yu ken rait na egensim. Brata mi laik tokim yu. Sapos yu gat baibel, plis inap yu ritim Jenesis 1 lain 1 igo long lain 31. So brata em bilong yu nau. Na Jenesis Saptu 2 vs 1 to 4 we em bai tokim yu wanem. Ok brata Paul Poro, bihain yu noken rait nating nating, na soim nem bilong yu long pablik laga? Em tasol na husat man o meri yu laik egensim o sapatim, em welkam tasol.

Makim gutpela saveman bilong Solt Nomane- Karamui

Dia Edita,

Elektret bilong Solt Nomane-Karamui save makim ol longlong man igo long palamen.

Mi wanpela wokman bilong S.D.A. sios na yangpela lida bilong Mirima villis long Solt Nomane, mi laik tokim ol pipol olsem eleksen i kam klostu nau.

20 yia bilong PNG kisim independen nau na olgeta hap long PNG em develop tasol Solt-Nomane Karamui em stap olsem ol tumbuna stap em yet. Nogat wanpela senis em kamap yet wanem as na senis i no kamap em as olsem. Yumi ol man we ino save long rot bilong bringim sevis igo long ples.

Em olsem yumi makim man we nogat save inap olsem Tisa, Dokta, Polis em ol gret ten tasol. Olsem na taim ol winim na go long palamen em ol save sindaun tasol i stap na ol bikipela saveman ol win na go em ol save kisim ministia na toktok na pait hat long bringim developmen i go long provins na elektorate bilong ol. Olsem na mi laik tokim yupela ol pipol bilong solt-Nomane Karamui olsem, 1997 eleksen em kam klostu so skelim olgeta kendidet bilong yumi husat bilong ol i gat bikipela save, em pinisim yunivesiti na holim bikipela wok mas givim vot long em. Taim em go

long palamen ol memba save long bikipela save bilong em na ol bai givim ministia na tu em bai pait hat long kisim sevis i kam long Solt Nomane-Karamui. Olsem na tingim gut na noken vot long ol liklik save-man ya olsem,Tisa, Dokta, Polis na didiman nambaut.

So bai yumi kisim liklik na heven na giraun bai pinis. Em tasol na husait yu bilong dispela elektoret laik sapatim em mi amamas tasol. Raitim long wantok olsem na bai mi lukim.

**Morex Joseph
South Simbu**

Noken pusim Torato long sanap gen

Dia Edita,

Paul Torato i tok em bai i no sanap gen long 1997 nesenelelek-

sen. Mi hamamas long ritim pas bilong yu Mr Man we i bin kamap long wantok niuspepa long 26-9-96. Yu bin i tok olsem, makim Paul Torato gen long palamen. Yu bin tok olsem. Brata yia 1992 nesenelelek em klostu 5-pela yia i go pinis, em yet Paul Torato i tok em bai i no nap sanap gen long 1997 nesenelelek- sen em laspela kempen bilong mi, em i tok olsem long Laigam taun long yia 1992 eleksen. Dispela tok olgeta manmeri bilong Laigaip Pogera i harim pinis. Yu Mr Man mi tokim yu. Mipela lukim pinis kala bilong em. Taim em wokim dispela tok yu bin istap we. Insait long 10-pela yia taim em i i stap memba i nogat han mak bilong em long Enga. Yu na Paul Torato yu tupela i go hait long wanpela hap na istap nogut yu tupela i sem long ai bilong ol manmeri. Yu tupela inogat nem liklik long Enga. Long tokples Enga man em pik i nogat tingting. Yu bin putim nem bilong yu Man em trupela nem bilong yu o giaman nem. Em olsem na mi tokim yu. Em tasol tenkyu.

**Kopex Maso Neapu
Mt Hagen**

Ol lida yet brukim lo na oda

Dia Edita,

Mi wanpela manki long Morobe Provins, tasol nau mi i stap long Wes Nu Briten Provins. Na mi laik autim wari bilong mi long Wantok. Taim mi i stap long ples na mi lukim wok bilong ol memba na mi no amamas long lo na pasin bilong ol. Taim ol i save kisim sas long go long kalabus o kot long mekim pasin stil o paulim samting, ol i save haitim ol yet na risain long long ministri o opis bilong ol olsem memba long palamen. Dispela i mekim ol i kamap olsem manmeri nating na em i no save kisim sas bilong sanap long kot bilong lida. Dispela pasin i no gutpela pasin long ai bilong manmeri. Dispela kain ol yangpela manmeri bai wokim bikheth pasin yet o mekim raskol pasin bai i go bikipela na i no bihainim gut lo na oda bilong gavman. Em tasol liklik wari bilong mi sapos yu husat brata o susa yu laik agensim mi em orait tasol long rait longwantok nius na mi lukim.

**Sagomba Hingi
Bialla**

Em i yia bilong Muruks/Naikos

Dia Edita

Mi wanpela manki Naiko tasol nau mi stap long Mosbi siti hia mi laik tok olsem olsem 1996 em i wanpela gutpela yia bilong ol manki nogut bilong las Papua. Long ol i go antap long top ples. Nau em i taim (gut) bilong ol long winim inta siti kap sil.

Insait long tu wiks bilong ol, ol i redi gut tru na lukaut long ol. Wina bilong Warriors wantaim Goroka yupela mas was aut long ol bikos ol i redi gut tru insait long tu wiks.

Long narapela sait, mi sapotim tupela tim wantaim bikos gren fainal bilong Inta siti ragbi resis i go long tupela tim wantaim. Mi laik askim yupela olgeta sapotas long sapotim tupela tim wantaim bikos em yumi yet.

Gutpela pasin bilong sapot inap mekim yumi strongim ol pilala na tim long kirapim na strongim spot bilong ragbi long hailans rijen.

Em tasol na gutpela tingting i stap long yupela yet.

**Patrick Peter
Una Nakisi, POM**

Olgeta hailans i no save katim man

Dia Edita,

Mi wanpela pikinini hailans we mi no save amamas tumas long planti nambis manmeri: Bilong wanem mi stap tripela yia long nambis na mi planti taim mi save harim olsem, ol hailans i save pait na katim man long tamiok na bus naip we em i no trupela tok.

Samting em wanwan man tasol i wokim. Dispela tasol na ol meri nambis i no save laikim ol manki hailans.

Olsem na nau plis mi laik ol brata na susa long nambis lusim dispela kain tok we em i ken bringim tingting nogut na pret long ol pipel bilong Papua Niugini we bai i nogat gutpela pasin na bung wantaim insait long kantri bilong yumi.

Mi laik tok olsem hailans tu em wanpela namba wan na gutpela ples tru long olgeta manmeri i ken stap amamas long en. Olsem Hollie Maia i singim pinis olsem Kerema em sapos yu no save, orait yu yet go na lukim. Hailans tu em wankain olsem we yu yet i mas go na lukim.

Em tasol toktok bilong mi na husat i laik bekim em laik tasol.

**Thomas Kapu
Lson Madang**

Salim pas i kam long:

**WANTOK NIUSPEPA
PO BOX 1982
BOROKO, NCD**

Ami noken sapot wantaim Bogenvil resisten paitman

Dia Edita,

Mi gat wari long soldia bilong mipela i dai long Bogenvil. Tasol mi gat sampela tingting bilong askim Chan na Haiveta gavman. Wanpela tingting bilong mi olsem. Gavman yu noken kisim resisten paitman long helpim ol soldia na pait wantaim BRA, bikos resisten paitman em bilong asples Bogenvil.

Ol gan na katris gavman i save givim resisten paitman ol save givim long BRA paitman. Ol i save givim i go long BRA. Ol resistan i save haitim ol yet, olsem ol i no save long ol BRA.

Na gavman i no save dispela samting ol i mekim long haitim ol yet. Givim samting bilong pait long ol. Bikos ol man bilong ples wantok ples bilong ol BRA. Na Tv ino istap wantaim ol soldia long ken bilong ken bilong ol. Ol i save igo long ples. Wanem samting ol i save mekim ol soldia ino save. Ol i save givim samting bilong pait i go long ol BRA. Bihain ol dispela samting ol i save pait bek i go long ol soldia. Olsem na mi tok strong olsem gavman ino ken kisim ol resistan. Larim ol soldia tasol i lukautim Bogenvil na mipela lukim. Em bai gutpela sindaun bai kamap.

Ol resisten paitman i stapna wokim wantok sistem tumas. Bikos mi ekensim ol resisten long wanem. 9-pela

soldia i dai na 5-pelaol i holim ol na kalabusim ol. Bikos ol resisten na ol manmeri bilong kea senta i toktok wantaim ol BRA na ol i kisim ol ikam na haitim ol insait long kea senta. Na ol i pait na kilim ol i dai. Pastaim ol i kilim man i save lukautim radio bihain ol i sutim komanda bilong ol. Tupela ki man ol i aut pastaim bihain o li sutim arapela 10-pela i dai.

Orait dispela i olsem ol resisten na man long ples o dil or toktok wantaim BRA na ol i mekim dispela pait. Bikos ol i kilim man i lukautim redio na komanda bilong ol. Ol BRA bai save olsem wanem hap we tupela man i stap. Ol resistan i mas tok save long ol BRA na ol i kam stret long tupela. Olsem na mi tok strong long gavman long noken kisim ol resisten pait man, sapos resistan i stap bai soldia bilong mipela bai wanmen bai pinis. Larim soldia tasol i lukautim ailan. Resisten i save wokim wantok sistem tumas.

Resisten aut na larim soldia i lukautim ailan em bai orait.

Em tasol tingting bilong mi husat i laik sapotim o egensim rait tasol longwantok niuspepa na mipela olgeta i ken lukim.

**Jeffery Nara
Kimbe**

Gavman mas lukluk gut long MBA balus

Dia Edita

Mi wanpela manki Mendi tasol nau mi i stap long Mosbi siti. Mi laik autim liklik wari bilong mi long Wantok Niuspepa. Nau em i olsem MBA balus i no ken ron moa long PNG. Gavman i mas kamapim wanpela samting long dispela hevi. Dispela balus i wok long kilim planti manmeri. Em i wok long bagarap klostu-klostu. Olsem na planti laip bilong planti manmeri wantaim pikinini tu i no stap gut long ron long dispela balus kampani bilong MBA. Dispela askim bilong mi i go long Minista bilong Sivil Eviesen Michael Nali wantaim gavman bilong em. Em tasol na husat i laik bekim em laik tasol.

Patrick Peter, Una Naki, POM

40 Mail maket i no bilong olgeta Makham pipel

Dia Edita,

Mi wanpela man bilong ples Chevasing, long Makam Morobe provins na mi save putim maket long ol buai na kokonas tasol mi save lukim ol lain long hap bilong Kaiapit tu i save maket long maket bilong mipela. Mi laik stret olsem Vilis kot mejistret i bin tambuim yupela long noken kam maket long eria bilong ol Wampar ating yupela yusim ai na tingting bilong yupela o i nogat? Yupela i laik maket orait yupela i ken putim ol samting bilong yupela long Mutsing stesin o Mapim maket o Umi maket na i no long 40 mail maket long wanem em yupela save pinis wara Riron em bikipela mak.

Ol man o meri i stap long Sasiang Fam na i go pinis long Nadzab maket i ken i kam maket long 40 mail tu het wara Rumu na tu ol lain tambu kandre long wara Watut na i no yu Kaiapit kain nem bilong ples olsem Watarais, Ragiampun, Narotumwa, Guruf, Mamaringan, Cicing Bampun, Mangiang, Biniman, Wafi Bampun na Siliwarang, lukim planti nem bilong em mi putim na sampela ples em mi no save long nem tu em mi laik save olsem ol brata long Liara na Zumpiaton, Guwalug i ken i kam maket long 40 mail maket.

Tu em mi laik tok save olsem Okuk Haiwe i kam olsem long mipela na i go olsem long yu na i go antap long Maunten Kassam Pas na i go olgeta. Em tasol liklik belhat toktok bilong mi na yu husat i laik sapotim o agensim em mi bai amamas tasol long lukim.

**Ben Gowef
Wamper Lae**

Madang musik i no gutpela

Dia Edita,

Noken giaman na apim nem bilong yu.

Mi wanpela boi Kainantu mi laik bekim pas bilong tupela brata Benson Kawagiri wantaim Lion A. Wapi bilong Madang. Tupela i bin egensim pas bilong brata Nizi Pellego i bin kamap long niuspepa yutupela i bin tok olsem olgeta song bilong Madang em long stail long yupela yet. Yutupela i bin tok olsem na daunim narapela brata ia em Nizi Pellengo. Mi tokim yutupela olsem traim na yu tupela pilaim kaset bilong Madang na harim nek bilong yupela yet pastaim bipo yu-giaman nabaut. Ating yupela i save painim hat tumas long komposim ol gutpela song.

Mi save harim olsem ol song yupela i singim i olsem yupela i singsing long ol man i dai.

Mi sapotim Niza Pellengo na yu husat i laik sapotim, mi amamas tasol long lukim.

**Tirinkas Beko
Kainantu**

Lukautim gut ol liklik bebi

Dia Edita

Mi laik autim wanpela wari or samting mi lukim long dispela toktok mi rait i long em. Mi ting olsem ol mama i mas i gat bikipela laikim (love) na lukautim (care) long ol liklik bebi pikinini-maski em i man o meri. Papa na mama i lukaut bilong ol kain ol liklik bebi olsem, na lainim ol long gutpela pasin na bihain ol bai kamap gutpela pikinini. Mi ting olsem papa mama bai soim dispela wok bilong lukautim pikinini. Tasol i no olsem mi lukim wanpela pasin nogut i kamap

namel long wanpela famili olsem na dispela i mekim mi na mi rait. Mi stap long Kreer Hieghts long seksen 49 lot 56 na long wanpela apinun na mi lukim wanpela mama klostu long haus bilong mipela i kros nogut na givim kain kain tok nogut long wanpela liklik bebi i olsem 6 o 9-pela mun bihain long amamas i harim em. Bebi i wok long krai na mama i no traim long soim dispela gutpela laik long bebi na traim long mekim em i stop krai o pilim gutpela nogat tru.

Mama i wok long kros tasol na

givim kain kain toktok nogut na arapela manmeri i harim i stap na nek bilong bebi i drai olgeta pinis long krai.

Mi ting olsem dispela i no gutpela bikos manki em i liklik bebi na em i no save long wanem samting em mama i wok long toktok o kros long en. Baibel i tok ol pikinini em presen bilong God na yumi mas amamaas long lukautim ol.

Em tasol toktok na bel wari bilong mi.

**Hohola Remand Centre
-Mosbi**

Painim prenmeri

Dia Edita,

Inap yu putim nem bilong mi long Wantok Niuspepa. Mi painim wanpela tambu meri bilong mi i bilong Morobe Provins. Nem bilong em SCHOLEY TUMANS. Scholey Tumans i bin go long Saint Benedicts Teachers College long Wewak long 1991 i go inap long 1993. Em i wan greduet wantaim brata bilong mi, tasol nau mi no save em i stap we o tisa long sampela hap long Morobe Provins. Sapos yu wanem gutpela kristen brata o susa long Morobe Provins i save long dispela tisa meri plis raitim pas long Adres bilong mi na toksave long mi. O plis sapos yu wanem tisa yu gat save long skul long Morobe Scholey Tumans i tisa long en orait plis rait na tok save long mi long adres bilong mi. Tenkyu.

Em adres bilong mi.

**Ms Clarice Samgur
St Martins Pastoral Centre
P.O. Box 179
Aitape, Sandaun Province**

Dia Edita


Mi painim tupela pren meri bilong mi. Tupela wantaim bilong Tari long Sauten hailans provins. Nem bilong tupela em, Margaret Napame na Julie Tendele Karibe.

Margaret em i bilong Pureni na Julie bilong Hoiobia. Na nau mi no save tupela i stap we. Olsem na sapos yu husat brata o susa save long wanpela bilong tupela orait tokim tupela long adres bilong mi.

Hia em nem na adres bilong mi:

**Susan Haralu
P.O. Box 209
Tabubil
Western Provins
Ph: 589710**

**Susan Haralu
Tabubil**



PUBLIC OFFICERS
SUPERANNUATION
FUND BOARD

PUBLIC NOTICE

POSF i toksave long ol memba bilong Fan i stap long olgeta provins olsem Fan i wok long karim aut ol fill wokabaut long wanwan provinsal hetkwata na ol distrik long bungim na toktok wantaim ol memba bilong Fan. Insait long ol dispela fil wokabaut, ol wokmanmeri bilong Bod bai givim aut ol Kontribiuta Rejistresen fom long ol memba bilong Fan long pulmapim na bihain salim i kam bek long Fan. Ol tim memba bai putim kamap opis long wanpela namel ples insait long wanwan distrik na bihain long wanwan provinsal hetkwata long givim sans i go long olgeta memba long pulmapim fom na givim i go bek.

Bihainim dispela astingting, ol tim bilong Bod bai go aut long ol dispela provins.

PROVINS

DEIT BILONG WOKABAUT

Sandaun Provins	18/11/96
Sauten Hailans Provins	18/11/96
Is Nu Briten Provins	18/11/96

Ol progem bilong Sandaun Provins, Sauten Hailans Provins na Is Nu Briten Provins em.

SANDAUN PROVINS

IS NU BRITEN

DATE	DISTRICT	TIME	DATE	DISTRICT	TIME
18/11/96	Telefomin	8.00 to 12.00	18/11/96	Palmalmal	8.00 to 4.00
18/11/96	Oksapmin	1.00 to 4.00	19/11/96	Lassul Bay	8.00 to 4.00
19/11/96	Lumi	8.00 to 12.00	20/11/96	Keravat	8.00 to 4.00
19/11/96	Nuku	1.00 to 4.00	20/11/96	Rabaul	1.00 to 4.00
20/11/96	Green River	8.00 to 12.00	21/11/96	Vunadidir	8.00 to 4.00
20/11/96	Amanab	1.00 to 4.00	22/11/96	Kokopo	8.00 to 4.00
21/11/96	Aitape	8.00 to 4.00			
22/11/96	Vanimo	8.00 to 4.00			

SAUTEN HAILANS PROVINS

DATE	DISTRICT	TIME
18/11/96	Tari	8.00 to 4.00
19/11/96	Yalibu	8.00 to 4.00
20/11/96	Pangia	8.00 to 4.00
21/11/96	Koroba	8.00 to 4.00
22/11/96	Mendi	8.00 to 4.00

Bod i putim bikpela askim i go long ol memba bilong Fan long bung wantaim ol wokmanmeri bilong Bod taim ol i go aut long ol dispela wokabaut. Em i impoten olsem yupela i mas helpim Bod long dispela bikpela wok.

NA TINGIM: HELP YOUR FUND SERVE YOU BETTER

EREMAN K. RAGI
MANAGING DIRECTOR

THE Independent

THE Independent

K74 million into pokies in July

...K87 million expected in August

IN JULY over K74 million was injected into pokie machines throughout Papua New Guinea.

About K87 million is expected to be injected in August.

For the first half year of 1996 alone a total of about K394 million was injected into pokie machines. This is increasing at a rate of 15 per cent and would equate to more than K1 billion every year according to figures obtained by *The Independent*.

For the seven months of 1995 from May, a total of K84 million was injected into pokie machines, grossing an income of about K6.7

million to the distributors, licensees as well as the provincial and national governments.

In January of this year, the gross revenue from ten provinces which had introduced pokie machines was about K2.7 million. The net gross revenue for the government - both national and provincial - was K64,208.64.

In February the gross revenue increased to K3.1 million, of which the both the national and provincial governments combined net revenue was K52,030.12. For the

other months:

• March - K3,789,834.69 (gross revenue) and K582,170.24 (combined government net revenue);

• April - K3,980,059.50 (gross revenue) and K712,510.71 (combined government net revenue);

• May - K4,782,821.50 (gross revenue) and K860,507.87 (combined government net revenue);

• June - K5,090,052.26 (gross revenue) and K907,052.26 (combined government net revenue); and

• July - K5,552,169.56 (gross revenue) and K953,388.72 (combined government net revenue).

This is alarming, according to Provincial Affairs and Local Government Services Minister Peter Barter.

He said, "The question is where is the money coming from. The answer, money that would normally be used for food, medicine, clothing and other essential services from the people who can least afford it".

It is estimated that 40 per cent of the money injected into pokie machines is retained by the distributors who own the machines, another 40 per cent remains with the site owners (hotels, clubs etc) and 20 per cent goes to provincial governments.

to page 2



Education Week special

One of Bavaroko Community School's program for the Education Week was traditional parade and young Elizabeth Alu in the photo is being prepared by her mother Shirley with the tattoo marks of Central province for the parade. Elizabeth is a grade two student and from Hula, Central province. Photo: Ivan Bayagau.

Neutral body for Bougainville

by VERONICA HATUTASI

... new report urges govt to give

THE government has again been called on to seriously consider engaging the support of a neutral body in the quest to find a lasting solution on Bougainville.

The call this time, comes from a National Planning Office senior officer, Simon Sipiau, who since 1992, has been tasked with coordinating the Bougainville restoration program for the national government.

In his latest report on the progress of the restoration and reconstruction program Mr Sipiau suggested regional groups such as

care-centres facing acute food shortages. The report stressed that achievement of peace and social order remained the priority objective of the government.

Mr Sipiau said the interim provincial government was also in full support of the objective.

"Increased access to basic services for people living in cleared areas as well as to half the Bougainville population living in care-centres is often hampered due to continued fighting.

The provision of food, health and educa-

initiatives aimed at addressing the care-centre problems.

The report pointed out that crime statistics were non-existent, and that the people were not prepared to report on offences for fear of their lives.

A lot of crime, the report said, related to payback.

Illegal weapons, produced either locally and supplemented by those stolen or lost from the security forces or obtained from the neighbouring Solomon Islands have aggravated the levels of crime on the

Making belts for a living

by IVAN BAYAGAU

MANY people who have been in jail do not talk much of their experiences whilst in there. For Henry Pokoraja (above), he has a very good reason to talk about his time in jail. In fact he is thankful for it.


Pokoraja from Southern Highlands province was sentenced to prison for four weeks at Baisu for smuggling alcohol in to the Enga province. He maintains that he was framed. But is glad anyhow because he taught himself to weave belts while in Baisu. Pokoraja now sells hand-woven belts for a living.

It was on a Sunday when Pokoraja attended a service which a pastor of a church he cannot remember came to preach. He noticed a member of a CIS office in civilian clothes wearing a waist belt with a pattern more similar to the hand-woven armlets worn by the Southern highlanders during singing which gave him the idea of making a belt using that pattern.

During his term he asked the prison cooks to give him empty bags of rice and flour which he twisted into out just as he imagined and he sold them each for a leaf of tobacco.



The Kangu Beach survivors tell their story. page 2 & 3



THE Independent

60t only!

THE VOICE OF PAPUA NEW GUINEA!

On sale from Friday afternoon in Port Moresby and Saturday Morning in the Provinces.

The Independent keeps you up to date with all the latest national and international news and sport plus seperate liftout sections on entertainment and education.

In - depth reports complemented by a professional team of regular columnists and international news services, The Independent makes great reading every week.

Don't Miss Your Copy!

PROUDLY PUBLISHED BY WORD PUBLISHING COMPANY PTY. LTD.

P.O. BOX 1982, BOROKO, NCD.

PHONE: 325 2500

FAX: 325 2579

Anda 16 soka tonamen pulim 7 senta olgeta

MAK bilong 7-pela tim olgeta i tokaut long laik bilong ol long stap insait long Nesenel Anda 16 soka tonamen we ol bai makim wanpela sait bilong Papua Niugini long pilai long Nu Silan long Wol Kap kwali-faia long neks yia.

Dispela tonamen bai kamap long Novemba 22-24 long Lae na Lae Futbol Asosiesen bai lukautim.

Ol senta bai pilai long dispela tonamen em Pot Mosbi Skul Bois, Simbu, Hagen, Wabag, Kaiapit na Lahi Soka Asosiesen bai kamapim tupela junia tim.

Papua Niugini Futbol Asosiesen presiden Peter Mommers i givim bikpela tok lukaut long olgeta senta olsem ol i mas bringim olgeta bet setifiket bilong olgeta pilaia bilong ol long soim olsem ol pilaia bilong ol i aninit long 16 krismas. Na sapos ol i no bringim dispela ol setifiket i kam, em ol bai rausim ol pilaia bilong ol long dispela tonamen.

"Ol kainkain hap pepa bilong kot nambaut em ol bai ino inap tok orait long en na maki bilong olgeta pilaia em mas Ogas 1 1980 em ol bai pilai wantaim ol narapela pilaia husat i bon bihain long dispela deit.

Em i tok olsem bihain long dispela tonamen, ol nesenel junia selekta bai makim 30 pilaia husat bai tren i go na bihain bai ol i katim dispela namba i go daun long ol pilaia bilong go long Nu Silan long pilai egensim ol narapela kantri long Osenia rijin.

"Peka bai ringim ol narapela kosa bilong ol narapela senta long givim nem bilong ol pilaia long senta bilong ol husat i no kamap long dispela tonamen long stap insait long trening skwat long wanem

PNGFA i laik makim wanpela strongpela tim tru bilong dispela tonamen," Mommers i tok.

Long narapela stori bilong soka yet, Mommers i gat strongpela bilip olsem nesenel wimens tim husat i pilai nau long Polynesian kap i gat bikpela sans long winim

dispela tonamen.

"Long pepa, mipela i gat gutpela sans long winim. Wantaim wanpela dro wantaim Nu Silan long las wik na stat pilai bilong mipela, mi bilip olsem mipela i gat sans long winim ol narapela kantri long gutpela skoa."



Strongpela salens tru i bin kamap namel long Defence na Ela United long semi fainel bilong Mosbi soka. Dispela em pilai bilong anda 19 divisen.

Bikpela taim bilong soka long Milne Bay

TUPELA bikpela soka salens bai kamap long Milne Bay long mun Novemba na Disemba bilong dispela yia bihain long wanpela smok kampani i givim K20,000 long kamapim dispela salens.

Dispela tupela salens em ol bai kolim Spear Salens em smok kampani Wills PNG Limited i sponsaim. Ol i lonsim dispela tonamen long las wik.


Tupela tonamen o salens olgeta bai kamap. Wanpela em Distrik Spear Salens na narapela em Provinsel Spear Salens. Toktok i kam long opis bilong spots long Milne Bay i tok olsem ol bai holim dispela tonamen em wanpela long distrik level na narapela long provinsel level.

Aninit long dispela sponsasip man em Wills i givim, dispela mani bai go long baim ol yunifom bilong ol pilaia, ol t set, bal na ol narapela samting bilong dispela tonamen. Na tu mani

bai go long wok bilong edministresen na baim rot bilong ol pilaia long go kam na pilai.

Dispela Distrik Spear Salens em ol bai holim long mun Novemba stat long 22 dei na pinis long 24 na ol bai holim long Alotau, Rabaraba, Esa'ala, Losuia na Bwagaioa. Taim Provinsel Spear Salens em ol bai holim long Alotau tasol. Em bai stat long 13 de bilong Disemba na pinis long 15 dei bilong mun Disemba. Dispela tupela tonamen wantaim i luk olsem bai bungim 26 tim olgeta we 20 bai salens long distrik level na 6-pela bai salens long provinsel level.

Long taim bilong givim dispela mani, ol lain bilong Wills i givim ol narapela helpim tu olsem bal, t set, gol net na yunifom. Long dispela gutpela sapot Wills i givim, gavana bilong Milne Bay Tim Neville tu i amamas na givim K10,000 moa antap long ronim dispela salens.




Soim stail . . . Pablik sevans volibal resis i kirap gen pinis long bungim Krismas na Niug yia.

GLASIM PILAI

WANIAM

YAKAM

KELO



Watpo Momase soka tonamen bagarap?

eksekyutiv bilong Momase Rijenol soka tonamen longpela taim i kam na long Vanimo em Vanimo Soka Soka Asosiesen (VSA) i go pas long sait bilong ol.

Olgeta dispela man i no nupela long dispela rijenol soka tonamen. Ol i luksave pinis long amas mani i stap long pasbuk bilong dispela asosiesen na wanem kain hevi em i gat. Ol i save long amas mani ol i mas painim na bungim long kamapim dispela tonamen. Olsem na ol i mas stretim na redim ol rot bilong painim mani, skelim ol hevi we inap kamap na redim ol samting bilong stretim dispela kain hevi. Taim de bilong tonamen i laik kamap, ol i redi pinis long daunim hevi we inap kamap long tonamen.

Las wik stori long i nogat Momase Rijenol soka tonamen i no gutpela tru long ia bilong olgeta soka manmeri bilong Momase rijen. Olgeta pilaia i redi gut tru long dispela tonamen na i wok hat tru long trening i stap. Taim ol i

harim dispela nius olsem tonamen i no inap kamap, bel na interes bilong olgeta pilaia i bagarap pinis.

I tru olsem yumi ken sutim tok long i no gat inap sapot o helpim i kam long opis bilong ol foapela gavana bilong Momase rijen. Dispela tonamen i olsem wanpela rot bilong bungim olgeta foapela provins wantaim na ol prima bilong bipo i bin kamapim wanbel long givim sapot long mani long olgeta yia long mekim dispela tonamen i kamap. Nau taim ol prima i pinis, ol gavana i kamap na i no rispektim dispela tok promis o wanbel we ol prima i bin pasim pinis. Dispela i soim yumi piksa olsem yumi no ken wetim na harim ol mauswara na swit toktok bilong ol politiks lain. Bikos planti dispela mauswara bai abrus. Yupela i mas mekim wok redi bilong yupela yet i go pas bikos olgeta hap, politiks i no save helpim ol tumas long sait bilong spot. Tru sapos dispela tonamen i kamap bikos long nem bilong dis-

pela politiksman, tru em bai givim mani. Skelim gut dispela poin na ino ken bilip moa long toktok bilong ol. Yupela yet i mas go pas long painim mani na redi ol wok bilong kamapim pilai ya.

Momase rijen i gat nem long kamapim gutpela nem bilong soka na em i gat dispela bikpela interes bilong soka i stap. Sapos yu skelim long arapela provins o senta, bai i no gat dispela bikpela interes bilong soka olsem Momase rijen i gat. Momase rijen i gat moa manmeri bilong lukim soka. Arapela senta i nogat dispela kain. Bai soka graun bilong ol i no gat planti manmeri tumas.

Ating wanpela samting i rong tu long ol eksekyutiv bilong Momase rijenol soka tonamen em ol i no bin mekim toksave i go longpela taim pastaimlong tonamen i kamap. Ating ol i givim sotpela toksave tasol we taim i no inap long olgeta asosiesen long redim ol yet long sait bilong fainens, menesen, tren-

ing na arapela samting moa bilong kisim wantaim ol i go long ples bilong tonamen (Vanimo). Dispela toksave i bin pulim pinis interes bilong ol lain bilong kantri sait. Madang kantri, Morobe Kantri sait tim, Wewak kantri na tu long Vanimo. Ol tim i redi pinis long hap olsem Maprik, Yangoru, Karkar Ailan, Makam Kaiapit na arapela. Tasol sori tru long bagarapim bel kirap bilong yupela, pilai i no kamap.

Neks yia na ol yia bihain, sapos yupela i laik kamapim dispela tonamen, yupela i mas wok hat na redim olgeta samting yupela yet. Bikos Momase rijen i gat olgeta stail pilaia na ol top pilaia husat i hait i stap na PNGFA seleksen komiti i no save raun na lukim. Yupela i gat sampela top pilaia winim ol PNG skwat pilaia i stap. Olsem na no ken bagarapim stail na pilaia bilong ol. Kamapim gut tonamen bai ol i ken pilai yet na holim yet pilai bilong ol.

D9 Cats wilwilim Bulldogs long Wewak PS soka

... lapun Kibma bosim ki bilong banis

GODFRIED YASSAFAR i raitim

OL ain sen bilong D9 Cats buldosa i wilwilim na bagarap tru ol West Coast Bulldogs long las wik Sande long Prins Charles soka long kik resis bilong Wewak Pablik Sevan soka.

I luk olsem ol D9 Cats i mas putim ol nupela autometik gia na ol nupela ain sen we i mekim tit na strong bilong ol Bulldogs i malmalum nating taim ol i traim long brukim ol sen bilong dosa. Na ol waia long bodi bilong ol Bulldogs i paia na slek na ol boi bilong D9 Cats i pulmapim tripela gol long golmak bilong ol Bulldogs.

Wanpela pilaia bilong D9 Cats, we i bin i gat bikpela luksave long las wik Sande, i stap olsem strongpela banis long beklain long kamapim dispela win bilong D9 Cats em wanpela lapun. I tru em i lapun tasol papa ya em i wanpela guttaim kaparesa man bilong pilai soka.

Man ya i no husat, em papa ya Michael Kibma tasol ya-strongpela banis na waia swipa long beklain bilong D9 Cats husat i gat stail na i winim ol arapela wanlain bilong em.

Kibma long yangpela bilong em long bipo, long 1960 na i kam long 1970, i bin wanpela top soka pilaia. Em i save pilai wantaim wanpela biknem soka klab long Mosbi ol i kolim GFC.

Taim yu lukim Kibma nau long dispela taim, yu bai ting olsem dispela lapun papa husat i wok olsem wanpela supavaisa long Woks dipatmen long Wewak, i nogat save bilong em long kikim, kontrolim o pilai pilai long soka bal. Sapos yu gat dispela kain tingting, sore tumas, tingting bilong yu, i giamanim yu. Traim givim em wanpela soka bal na yu bai lukim olsem papa ya i lapun tasol i pulap yet long ol teknik.

Kain stail bilong Kibma long beklain i stopim ol fowet o straika bilong ol Bulldogs na ol hatwok bilong ol i wara nating. Bikos dispela lapun ya i sanap traipela D9 buldosa long fran bilong golmak na ol straika bilong Bulldogs i go na pas long ain sen bilong dosa i go bek. Yu save, dosa ya dosa, bai yu rausim olsem wanem-foklif tu i no inap ya.

Taim namba wan gol bilong ol D9 Cats i kamap, dispela i mekim ol Bulldogs i nek drai na hangre long testim ain sen bilong ol D9 Cats. Ol Bulldogs i traim tasol lapun Kibma wantaim helpim bilong ol wanpaia bilong em i wokim bikpela na strongpela banis long ol sen bilong dosa pinis na wokim golkipa long sanap isi tasol na wisil i stap. Ol boi Bulldogs i traim na traim tasol ol boi D9 Cats i no givim sans. Ol i lokim beklain bilong ol bikpela ain lok na givim ki long Kibma bosim na was i stap.

Namba tu gol bilong D9 Cats i mekim ol Bulldogs i kamap moa hangre. Tasol i wankain yet, ol buldosa i ho pilai pilai wantaim ol



• Pasim gut bal ... Brata ya i mekim stail bilong em long Hohola tas resis long las wiken. Foto: Joe Ivaharia

Bulldogs. Ol i banisim gut golmak bilong ol wantaim gutpela na strongpela sekyuriti. Mekim i go na ol boi D9 Cats i supim namba tri gol i go insait long umben bilong ol Bulldogs.

Bulldogs i wanpela strongpela tim tasol ol manki wantok ya i no oganaisim ol yet gut. Ol i bin i gat planti gutpela sans tasol ol i no yusim ol dispela sans long brukim beklain bilong ol D9 Cats. Sapos ol i bin yusim ol sans ol i gat, ating ol i bin inap long draivim ol dosa bilong Woks dipatmen i go long Wes kos na lusim long ol eria olsem Hawaii o Boiken. Tasol ol hatwok bilong ol long stilim ki bilong dosa i popaia.

Lapun Kibma i pilai gut tru. Maski ol Bulldogs i laik putim bal i go antap long het bilong em long beklain, boi kalap i go antap na isi tasol tromoi het i go na rausim bal. Tru tumas, maski het i lapun tasol smel bilong bal i stap yet en.

Dispela supavaisa long Woks

dipatmen i sevim planti gol bilong ol Bulldogs. Na tu i yusim kain stail na teknik bilong em long givim opsait i go long ol straika bilong Bulldogs. Ol hatwok bilong em i givim fridom long goli bilong em na goli i wok long sanap isi tasol na Tok Pisin i stap.

Tripela wanlain bilong Kibma husat i bin mekimsave tu long helpim ol yangpela bilong D9 Cats long wilwilim ol boi Bulldogs em Thomas Kotile, Soon Tosilih na Speedy Kautka.

Long ol arapela gem, Medics i winim Seaside Eels 2-1, Water Rats i nekim Parrots 4-0, ol wanpisin bilong Prusua (Hogs) i nilim Rhinos 1-0, Heights Eagles na Valley Lions i pulim taitim i go i kam na dro 1-1 na Boram Flyers i holim ilektrisiti bilong ol Thunderbolts 2-0.

Volibal resis bilongol pablik sevian meri i stat long las wik Sande tasol Wantok i no inap long kisim sampela stori bilong ol

14 tim rejista long Not Flai soka tonamen

Mak bilong 14 tim olgeta long ol 7-pela soka asosiesen insait long Not Flai i rejista long resis insait long Not Flai Soka Tonamen em bai stat long Noovemba 22 i go pinis long Novemba 24 long Tabubil.

Asosiesen husat i no rejista yet long dispela tonamen em Tabubil Soka Asosiesen. Maski i planti planti kainkain toktok long dispela yia, i gat bikpela bilip olsem ol bai rejista na stap insait long dispela resis we i save kamap long olgeta yia.

Mani bilong holim dispela tonamen i bikpela tru na i gat gutpela sain pinis olsem bai i gat wanpela o tupela sponza long dispela resis.

Tonamen kodineta Gabriel Pise i tok, "Olgeta lain long komyunit i save olsem dispela tonamen em bilong bungim yumi wantaim olgeta seksen bilogn Not Flai, Telefomin, na Oksapmin long dispela soka tonamen long olgeta yia."

"Soka tu insait long tonamen ya bai

lukluk long gutpela pilai we ol yangpela pilaia i ken yusim dispela pasin long developim ol yet i go kamap gutpela pilaia na makim kantri. Dispela em bai driman bilong olgeta na dispela bai putim Not Flai sait long ol biknem lain bilong pilai soka olsem Pot Mosbi, Lae na Madang."

Planti ol asosiesen insait long Not Flai na Telefomin dsitrik i pilaim gren fainel bilong ol pinis na ol i wot tren hat tru long dispela tonamen

"Developmen bilong soka long dispela yia i kamap gut tru na planti moa samting bai kamap. Bikpela tenkyu tru i mas go long Mista Albert Eketone (olpela), Supevaisa bilong Spots, Mista John Anderson, Eksekutiv Menesa bilong Huma Risos na Mista John Grubb, Menesing Dairekta. Sapot bilong ol dispela lain taol long OTML i mekim na soka i kamap long wanem-hap em i stap nau," Mista Pise i tok.

Harrigan na Clark givim kos long ol PNGRFL referi

TUPELA biknem Supa Lig referi bilong Australian Supa Lig Bill Harrigan na Peter Clark i kamap pinis long Papua Niugini long las wik Sande long holim wanpela edvens kos bilong ol Papua Niugini Ragbi Futbol Lig referi. Dispela kos ya bai kamap long Goroka.

Harrigan na Clark em tupela i gat nem long blowim wisel long Australia bipo long pait namel long Australia Ragbi Lig na Supa Lig i kamap bai holim dispela wan wik kos i go inap long Fraide we ol lain husat i sindaun long dispela kos bai mekim wanpela tes.

PNGRFL referi dairekta John Numapo i tok olsem dispela kos em bilong ol referi husat

i save lukautim ol SP Inta Siti Kap pilai na tu ol narapela husat i soim olsem ol i ken referi long dispela semi profesinel pilai.

Paul Buri na Thomas Gigimat bai helpim Harrigan na Clark long holim dispela kos.

Buri em ol i makim em olsem kodineta na Gigimat olsem man bilong givim mak long ol referi.


Numapo tu i tokaut long nem bilong ol referi husat bai stap long dispela kos we Mt Hagen i gat planti, Lae, Goroka i gat tripela na tu Pot Mosbi, Rabaul na Madang i gat namba long dispela kos.

Ol 20 referi em PNGRFL i makim em Alphonse Pu'u, John

Ropa, Colin Balio, Thomas Minibi (Mt Hagen), Luxie Metta, Eric Kuman, Willie Eka (Lae), Roa Soph, Nathan Mote, William Tovavae, James Tore (Madang), Sari Fareho, Tony Kuni (Pot Mosbi), Richard Mathews, Wesley Tukar (Rabaul), John Siune (Kundiawa), na Nelson Koim bilong Mendi.

Numapo i tok olsem dispela ol kos bai i gat samting bilong lainim long klasrum na tu long pilai graun. Ol referi bai kisim namba bilong ol long mkim gut long klasrum na tu wanem samting ol i mekim long pilai graun.

Na dispela kos tu bai soim ol referi husat i ken kisim ol narapela kos moa aninit long ol



• Alphonse Pu'u



• Luxie metta

PORT MORESBY WOMENS SOFTBALL ASSOCIATION

Date: November 16, 1996.

Schedule No. 17

Diamond One

0930	C	Wantoks vs Garamut	KAR
1100	C	Malangan vs Gazelle	WAN
1230	B	Mazda vs Tarangau	UMP
1400	B	Malangan vs ICDC/Dolphins	UMP
1530	A	All Stars vs Wantoks	UMP

Diamond Two

0930	C	Royals vs ICDC/Dolphins	FUJ
1100	B	Fujitsu vs Yokemo	UMP
1230	C	University vs Karans	STR
1400	A	Mazda vs Chebu	UMP
1530	A	Gazelle vs Yokemo	UMP

Diamond Three

0830	C	Admiralty vs All Stars	PNG
0930	C	PNGBC vs Taurama	CHE
1100	B	Admiralty vs Chebu	UMP
1230	B	Royals vs Norths	UMP
1400	A	PNGBC vs Fujitsu	UMP
1530	A	Karanas vs Norths	UMP

PORT MORESBY MENS SOFTBALL

ROUND ONE 1 (WEEK FIVE)

Sunday November 10, 1996

DIAMOND ONE

TIME	GRADE	GAME
09.00	A	Hawks vs Admiralty
10.45	A	Manolos vs Elcom
12.30	A	Gazelle vs Tigers
14.15	A	NGI Tabular vs MSC
16.00	A	Fuji vs Malangan

DIAMOND TWO

09:00	B	NGI Tabular vs Karanas
10:45	B	Fuji vs Malagan
12:30	B	Hawks vs B/Raiders
14:15	B	NGI Tablar vs B/Raiders
16:00	B	Gazelle vs Dolphins

DIAMOND THREE

09.00	C	H/Bay vs Tigers
10.45	C	Unicorn vs MSC
12.30	C	Dolphins vs Admiralty
14.15	C	Karanas vs B/Eagles
16.00	C	Manolos vs B/Raiders



• Maria em wanpela tim i save resis long Pepsi op sisen lig resis long Mosbi.

PRIVATE COMPANIES NETBALL ASSOCIATION

SUNDAY NOVEMBER 17, 1996

TIME	DIV ONE	COURT ONE
100	Coca Cola (1) vs Travelodge (1)	
145	Post Courier vs Shell (1)	
225	PNG Motors vs Steamships (1)	
310	Courts (1) vs Theodist	

TIME	DIV TWO	COURT TWO
100	Deloitte vs Fairdeal (1)	
145	Steamships (2) vs Daltron	
225	Bishop Brothers vs Century	
310	Daikins vs SP Holdings (1)	

TIME	DIV THREE	COURT THREE
100	SP Holdings vs Steamships (3)	
145	Travelodge vs Boroko Motors	
225	SBS Electrical vs Coca Cola (2)	
310	Ela Motors vs PNG Stationery	

TIME	DIV FOUR	COURT FOUR
100	Gadens vs Mobil	
1.45	EF Management (1) vs Rothmans	
225	Steamships 4 vs Milne Bay Air (1)	
310	Word Publishing vs Shell (2)	

TIME	DIV FIVE	COURT EIGHT
100	Yellow Pages vs Brian Bell	
145	Fairdeal (2) vs Hastings Deering	
225	Ray White vs Courts (2)	
310	City Pharmacy vs Steamships (5)	

TIME	DIV SIX	COURT NINE
100	Thirlwall vs National	
145	Milne Bay Air (2) vs Pacom	
225	EF Management (2) vs Pacom	
310	Remington vs Steamships (6)	



• Morata Op sisen lig i kirap pinis na kainkain stail i save kamap. Long dispela yia, ol plisman long Waigani i putim wanpela tim bilong ol tu long dispela resis.

Public Servants Volleyball Association

Pre-season games - week three

Date: Sunday, 17 November 1996

Venue: Sir John Guise Indoor Stadium

Court one Womens division

Time	Teams	Officials
0900	RC vs N/Parliament	NPF/NCDC - 2
10.00	Uni Vs POSF	N/Parliament/IRC
11.00	Lands vs Works	Uni/POSF
12.00	House 500 vs NBC	Lands/Works
13.00	PTC vs S/Comm	House 5000/NBC
14.00	Finance vs Education	PTC/S/Comm
15.00	NPF vs NCDC-2	Finance/Education

Court two Mens Division

0900	House 500 vs IRC	Works/IPA
10.00	NPF Vs NBC	House 5000/IRC
11.00	PTC vs N/Parliament	NPF/NBC
12.00	Uni vs NCDC	PTC/N/Parliament
13.00	G/Printing vs D/Central	Uni/Parliament
14.00	RDB vs BPNG	G/Printing/D/Central
15.00	Works vs IPA	RDB/BPNG

Court three Womens/Mens Division

0900	RDB vs IPA-2 (W)	Education/POSF
10.00	BPNG vs NCDC-1 (W)	RDB/IPA-2
11.00	D/Central vs G/Printing (W)	BPNG/NCDC-1
12.00	PA-1 vs DEC (W)	D/Central/G/Printing
13.00	Lands vs DEC (M)	IPA-1/DEC
14.00	Education vs POSF (M)	Lands/DEC

Team on bye: S/Comm (Mens)



• Sale Malala bilong klap Paradise i ron i go insait long sait bilong ol Pirates long Hohola Tas ragbi resis.



• Lapun na wip yet . . . Siapea Michael Lahari i mekim wanpela sait step bilong em long Hohola Tas resis.

Gordons tas ragbi pulim moa sapot

. . . ol biknem spotsman tu save soim stail . . .

RODNEY KAMUS i raitim

LONG taim bilong op sisen bilong soka, ragbi lig na ol narapela pilai, planti ol spotsman na meri i save tanim i go pilai long ol narapela spots. Wanpela bikpela as em long

Medikel ripot stopim Pepsi op sisen lig long stat

RODNEY KAMUS

PEPSI Op Sisen Ragbi Lig resis i no tokaut yet long wanem taim ol bai statim dispela op sisen lig resis bilong ol.

Deit ol i makim long statim dispela resis em long Novemba 2 tasol i nogat wanpela samting o pilai i kamap long wanem olgeta klap i no givim medikel ripot bilong ol long ol lig eksekutiv na dispela em wanpela bikpela samting we i pasim dispela pilai long stat.

Long rekot bilong lig, samting olsem 16 tim olgeta i baim pinis ol fi bilong ol olsem rejistresen bilong ol pilaia na tu afiliesen fi bilong ol long stap insait long dispela resis. Sampela klab i mas baim yet ol fi bilong ol em K120 long afiliesen fi na K5 long pilaia rejistresen fi.

Presiden bilong lig ya Peter Aisi i tokaut olsem pilai bai ino inap stat long wanem olgeta klab i mas baim rejistresen fi bilong ol na tu givim olgeta medikel ripot bilong ol wanwan pilaia long wanem em i laikim olsem olgeta pilaia i mas stap aninit long insurens. Sapos husat i kisim bagarap long taim bilong dispela resis, insuren i ken helpim ol long baim ol samting bilong ol.

Em i tok olsem long sait bilong kompensesen i bikpela samting tru long PNG, em i laikim olsem olgeta pilaia bilong ol i mas fit na bai i nogat komplek i kamap.

Aisi i mekim strongpela toktok olsem ol klab husat i no baim fi bilong ol long resis em bai stat long dispela wiken bai no nap kisim wanpela points sapos ol i win.

Ol 16 klab husat i baim afiliesen fi bilong ol pinis em Poreporena, Hohola Dumpers, Hohola Flies, Gabagaba, Fairfax Brothers, Erom Tigers, Gabi Warriors, Tokarara, Gerehu Swamps, June Valley Tigers, Tatana, Poimo Sharks, Goi Pom Warriors, Gorobe Panthers, Ason Warriors na KK Cowboys em bipo nem bilong ol em Sab Sity Raiders.

mekim ol yet i fit na wetim sisen long kirap gen.

Wanpela bikpela spot em planti ol ragbi lig na soka pilaia i save go na pilai em tas ragbi. Em i wanpela pilai we bai yu mekim planti ron na muvim bodi bilong yu we yu

ken stap fit.

Wanpela tas asosiesen insait long Mosbi i wanpela gutpela na i strongpela asosiesen tru we i save bungim olgeta mangi long eria bilong ol na tu pulim ol bikpela nem pilaia bilong ragbi lig long stap insait long resis bilong ol.

Gordons Tas

Asosiesen em wanpela resis we i save kamap long Mosbi long olgeta krismas na nu yia. Resis ya i save stat taim ol pilai bilong Mosbi soka resis i pinis na tu-ol ragbi lig resis long PRL i pinis.

Bipo taim dispela asosiesen i stat, nogat planti manmeri na pikinini i gat intres long kamap long dispela resis. Tasol nau i luk olsem olgeta man, meri, pikinini na ol wan-tok nambaut i save kamap long Gordons Bareks long lukim dispela tas ragbi resis.

Resis bilong dispela yia i gat 12-pela tim olgeta we i pulim olgeta tim long ol strit bilong Gordons na sampela tu i save kam long Erima setelmen.

Wanpela mausman bilong dispela tas ragbi resis Nicky Bernard i tok olsem nau yet i nogat wanpela eksekutiv i

lukautim dispela resis. Tasol wanwan wiken em wanwan klab bai lukautim olgeta pilai.

"Dispela i wanpela gutpela rot we mipela i save givim sans long wanwan klab long mekim ol disisen bilong ol yet. Na tu olgeta mangi long Gordons eria i save bung na amamas wantaim," Nickey i tok.

Em i tok olsem nau yet dispela resis i no gat wanpela mesa sponsa we ol bai pilai long wanpela kap o tropi.

"Mipela i save pilai long olpela tropi bilong mipela na sapos wanpela gutpela kampani o bikman i laik sponsaim dispela resis em i welkam tasol."

Dispela Gordons tas resis i gat nem long ol bungim ol biknem spotsman bilong Mosbi long taim bilong op sisen.



Biknem olpela faiv-eit bilong Kumuls, Tuksy Karu i wanpela man husat i save pilai long dispela resis long taim bilong op sisen. Na dispela hap tu em planti kain kain stail na teknik i save kamap. Steven Mune na Brata bilogn em David, tupela biknem spotsman long Mosbi tu long sait bilong ragbi lig na soka i save pilai long dispela resis tu.

"Gordons Tas resis i save stat taim pilai bilong Mosbi soka i pinis na tu ragbi lig long PRL i pinis. Taim dispela tupela biknem spots i laik stat gen, em mipela i save pilaim ol fainels bilong mipela. Dispela em wanpela hap we mipela i ken bungim olgeta pilaia bilogn Gordons long stap fit na wetim sisen bai kirap gen."



• Tim bilong ol meri long Hohola Tas resis.

WANTOK SPOT



OI PNG meri nekim

Western Samoa 8-0

RODNEY KAMUS i raitim

OL MERI Papua Niugini Soka tim husat i wok long pilai long Tonga long Polynesia Kap i nekim Western Samoa 8-0 long asdei apinun 2 klok PNG taim.

Bihain tasol long ol meri i winim dispela pilai, planti bilong ol i go bek long hotel rum bilong ol bihain long strongpela win na ren i pundaun long biktaun bilong Tonga Nuku'alofa.

Kepten bilong ol meri PNG Cathay Davani i tokim Wantok Niuspepa olsem ol meri i sanan long bikpela sans tru long winim dispela taitel bihain long ol i kamapim wanpela strongpela difens geim tru na autim tikek bilong ol Western Samoa long dispela bikpela skoa.

Kain skoa olsem i soim olsem PNG i nap winim olgeta senta na narapela bikpela pilai bilong ol em bai kamap long Fraide taim PNG bai bungim mama kantri Tonga.

Davani i tok olsem long nau yet, olgeta pilai bilong ol i go gut na ol i no lusim wanpela yet. Na dispela em i apim tingting bilong ol pilaia tru olsem ol i mas winim dispela taitel.

Long winim dispela Polynesia kap, dispela i kamap tru long wanem insait long tripela pilai bilong ol olgeta ol i winim tupela na dro long wanpela.

Davani i tok long Tonga i tok olsem long namba wan pilai



• Tabitha Suwae, Josephine Waiwai, Joe Aisa na Annette Kora (long raitan) taim ol i greduet na kamap loya. Waiwai i wok long strongim PNG tim long winim Polinesia Kap.

...Raka, Siwin, Waiwai na Taman soim rot

bilong ol egensim Tonga Developmen skwat, Papua Niugini i nekim na bagarapim stret sindaun bilong ol meri ya wantaim 8-0.

Long namba tu pilai bilong ol egensim Nu Silan Maori, tupela tim wantaim i strong nogut tru na tupela i dro long 1-1.

Long namba wan pilai bilong ol wantaim Tonga Developmen skwat, straika bilong Mosbi Martha Raka i ron longlong na brukim banis bilong ol Tonga 4-pela taim na ol porman bilong em olsem Nellie Taman, Geraldine Eka, Josephine Waiwai na Fredrica Siwin i givim gutpela

bekap long ol na ol i soim olsem ol i wanpela strongpela sait tru long dispela tonamen.

Long dispela as tasol na ol meri PNG i soim olsem ol i ken winim dispela kap.

Na lukluk long skoa em ol narapela tim i wok long win, ol skoa i daunbilo tru na dispela bai

helpim tingting bilong ol meri PNG long winim dispela tonamen bilong ol.

Wantok i laik kisim moa toktok long pilai bilong ol egensim ol Tonga long Fraide long kosa Robert Popat tasol Popat i no kamap yet long hotel taim Wantok i printim dispela stori.

Pukpuk bilong Wewak redi long winim bek Momase Kap

HENRY MORABANG i raitim

WEWAK Soka Asosiesen i nakim pinis tim bilong long stap insait long Momase Rijnonel soka tonamen long Vanimo, Yes Sepik provins.

Tonamen ya i sapos long anrap las wiken tasol ol oge-aising komiti i surikim i go long isemba 4 long amamasim tu andaun Provinsal Gavman de. tomase Rijnonel soka tonamen i in stat long 1987 long Madang.

Kosa bilong Wewak David andi i tokim Wantok olsem tim long em i redi tasol bungim ol knem senta olsem Lahi, LFA 3 Madang. I tru ol i gat ol gutpela pilaia, Wewak bai no inap et long ol.

Bandi i tok tonamen bilong spela yia i pulim planti ol dis-

trik tim. Long Is Sepik provins yet, Angoram na Maprik tu bai salim tim bilong ol ya. Dispela i min, bai i gat tripela tim olgeta bilong Is Sepik.

Kosa bilong Wewak i tok tim bilong em i gat gutpela sans. Insait long tim i gat 4-pela ol biknem pilaia husat i helpim Wewak long winim Momase Kap las yia. Ol 4-pela pilaia em golkipa Max Motoku, Charlie Alung, Siwik Karo na David John.

Em i tok tasol skwat bai i no inap strong long ol dispela pilaia, em i gat ol nupela blut long strongim tim. Planti ol pilaia long skwat ya em bilong developmen skwat bilong Wewak ya.

Momase Rijnonel soka tona-

men i kisim bikpela sapat tru long 4-pela gavana ya. Is Sepik gavana, Sir Michael Somare i givim K2,500 i go long Wewak skwat. Na i luk olsem Angoram na Maprik tu bai singaut yet long helpim bilong Sir Somare tu ya.

Bandi i tokaut long skwat bilong Wewak - Max Motoku, Charlie Alung, Brian Siri, Peter Nine, Siwik Karo, Ruben Raymond, Vincent Jacob, David John, Jeffrey Saki, James Kiapen, Aginus Nongoromu, Philip Sakipa, Newman Timi, Stanley Kila na John Tim.

Hetkosa Adrian Mamate, Asisten kosa David Bandi, Teknikal Advaisa Zui Kumbia.

Ol tim husat bai stap insait long Momase tonamen em:

Vanimo, Vanimo Kantri, Wewak, Angoram, Maprik, Karkar, Madang, Madang Distrik, Lae, Lahi, Gaifarwap na Morobe Kantri,

Insait long ol arapela nius, presiden bilong Wewak Soka Asosiesen Michael Vee i saspindim kik resis bilong dispela yia bikos ol klap i no save kamap long miting.

Kik resis bai stat long neks yia na i min olsem ol klap husat long stap long resis i mas tingting gut.

Presiden Vee i askim olgeta klap na opisal long wokbung wantaim long strongim wok bilong soka. Sapos i nogat gutpela sapat, soka long Wewak bai dai ya.

INSAIT

- Ol soka nius ... Pes 27
- Ol spot dro ... Pes 26
- Gordon's tas ragbi pulim moa sapat ... Pes 24
- Under 16 tonamen pulim 7 senta olgeta ... Pes 25

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.